

藝文學

吳縣志卷第六十七

列傳五

長洲縣

唐

陸龜蒙字魯望元方七世孫父賓虞以文歷侍御史龜蒙少高放通六經大義尤明春秋舉進士一不中往從湖州刺史張搏游歷湖蘇二州辟以自佐嘗至饒州三日無所詣刺史蔡京率官屬就見之龜蒙不樂拂衣去居松江甫里多所論撰雖幽憂疾痛貲無十日計不少輟也文成竄篋中或歷年不省爲好事者盜去得書熟誦乃錄讎比勤勤朱黃不去手所藏雖少其精皆可傳借人書篇帙壞舛必爲輯褫刊正樂聞人學講論不倦有田數百畝屋三十楹田苦下雨潦則與江通故常苦饑身舂苴荇刺無休時或譏其勞答曰堯舜黷瘠禹胼胝彼聖人也吾一褐衣敢不勤乎嗜茶置園顧渚山下歲收茶租自判品第張又新爲水說七種其二惠山泉三虎邱井六松江人助其好者雖百里爲致之初病酒再期乃已其後客至絜壺置榻不復飲不喜與流俗交雖造門不肯見升舟設篷席齋

束書茶竈筆牀鈎具往來時謂江湖散人或號天隨子甫里先生自比涪翁漁父江上丈人後以高士召不至李蔚盧攜素與善及當國召拜左拾遺詔方下龜蒙卒光化中韋莊表龜蒙及孟郊等十人皆贈右補闕

唐書

宋

劉少逸年十一文辭精敏有老成體其師潘閔攜以見長洲令王元之吳縣令羅思純以所作贊二令二令名重當時疑其假手未之信因試與之聯句略不淹思思純曰無風燈燄直少逸曰有竹月陰寒元之曰一回酒渴思吞海少逸曰幾度詩狂欲上天凡數十聯皆敏妙二公驚異聞於朝陽進士及第官止尚書員外郎

吳郡志

胡稷言字正思其先婺州永康人兵部侍郎則之從子少學古文於宋祁嘗獻時議於范仲淹復從胡瑗學以特奏補官調晉陵尉歷鄞縣簿山陰丞自度不能究其所施遂致仕所居臨頓里唐陸龜蒙舊址也築圃鑿池追陶靖節之風種五柳以名其堂清修寡欲延納後進日晡後不復飲食客至蕭然具湯一杯而已卒年八十餘子暉字仲連姿稟瀟灑恬於榮利與方惟深林慮爲忘年交後以年格建炎登極推恩調迪功郎安遠尉非其好也

所居五柳園松窗蓬戶步趨言動皆有尺度賓嘉喪祭率循古法用杜詩名所居曰如村  
自號如村老人紹興中卒年七十九子百能字少朋紹興進士知江山縣有惠愛乾道初  
授諸王宮大小學教授致仕歸築堂曰宜休卒年七十四

乾隆志

方惟深字子通本莆田人父龜年官至屯田郎卒葬長洲因家焉惟深鄉貢第一試禮部不  
第卽棄去有田一廛與其弟躬耕閒則讀書至於黃帝老莊之言養生爲壽者之說及西  
方別傳皆得其大指尤長於詩每一篇出人爭傳誦王安石稱其精純驚絕元白皮陸有  
不到處惟深雖游安石之門無一毫迎合意又學行義與朱長文同爲一時所宗元符初  
郡將薦於朝崇寧中復以遺逸應詔皆不起有司舉貢籍以年格得興化軍助教就賜敕  
牒袍笏於家初年四十無子其弟有子謂吾先人有後足矣卽屏居於外預知死期喪葬  
皆有治命年八十三

乾隆志

楊懿孺字彛甫其先自浦城徙長洲以行義隱處與方惟深同時號吳中二老懿孺少孤力  
學言行相顧朝無夕儲讀書哦詩泊如也神夷氣昌未嘗有憂雖閭里不盡知其貧崇寧  
二年特奏名後調南昌簿居一年忽載妻子歸吳卽告老以承奉郎致仕平居直心自信

不知世閒有傾巧事自未仕及老於家不入州縣不事鄉里請謁閒一過所親厚歲不過數四雖嘗出仕而人猶謂隱者

吳郡志

林慮字德祖父旦自有傳

見流寓

慮少穎悟絕人能傳父祖業伯父希嘗獲古鏡背有龍朔二字

慮從旁曰是非唐大帝時物乎希奇之曰是兒眉過於目當復以文名可繼其祖矣遂以德祖字之既長益刻苦自淬厲故其學早成登紹聖四年進士第除潤州教授入爲太學錄復教授常州常號多士籍於學者千餘人時方以三舍取士乃身爲勸率從者風靡大觀三年廷試常士預選者五十三人上賜詔曰進賢受上賞知州教授特轉一官慮由奉議郎改宣德郎知州徐中於學南立進賢坊榮賜亭以侈之在職六年學者信服遷揚州教授擢河北西路提舉學事陸對曰上首以久歷師儒顧問甚渥且使徧行所部推廣風旨慮頓首奉詔因請加鄒堯二國公謚復捐公廨菜圃歸於學除開封府左司錄以府尹不之禮上章請老夜自書牘且報可家人無知者卽日束裝出國門士大夫奔走出餞皆不及既歸杜門一室不入州縣無一言及時事爲人強敏有志操自六經諸子而下錯綜貫穿無不記誦爲文章捉筆數百言閱易敷暢初若不經意然論辨研覈皆有抵宿晚

好浮屠說不肉食者十四年始疾卽不呼醫逮卒弗亂年六十六所居大雲坊自號大雲

翁廬志

葉夢得字少蘊清臣從曾孫

史作吳縣人

嗜學早成多識前言往行談論亶亶不窮紹聖四年登

進士第徽宗朝用蔡京薦召對言自古帝王爲治必先自治其心上異其言特遷祠部郎官大觀初京再相向所立法度已罷者復行夢得言周官太宰以八柄詔王馭羣臣所謂廢置賞罰者王之事也太宰得以詔王而不得自專夫事不過可不可二者而已以爲可而出於陛下則前日不應廢以爲不可而不出於陛下則今日不可復若徒以大臣進退爲可否無乃陛下有未了然於中者乎上喜曰邇來士多朋比媒進卿言獨無觀望遂除起居郎累遷翰林學士蔡京初欲以童貫宣撫陝西取青唐夢得見京曰祖宗時宣撫使皆是見任執政未有以中人爲之昨除貫節度使天下皆知非祖宗法今又付以執政之任使得青唐何以處之京有慚色然卒用貫取青唐政和五年知穎昌府發常平粟振民常平使劉寄惡之宦官楊戩用事寄括部內得常平錢五十萬緡請糶杭米輸後苑以媚戩戩委其屬持御筆來責以米樣如蘇州夢得上疏極論穎昌地力與東南異願隨品色

不報時旁部糾民輸餼就糴京師怨聲載道獨穎昌賴夢得免李彥括公田以黠吏告訐籍邨城舞陽隱田數千頃民詣府訴者八百戶夢得上其事捕吏按治之郡人大悅戡彥交怒尋提舉南京鴻慶宮高宗駐蹕揚州陳待敵之計有三曰形曰勢曰氣因請上南巡阻江爲險又請命重臣爲宣總使一居泗上總兩淮及東方之師以待敵一居金陵總江浙之路以備退保疏入不報紹興初起爲江東安撫大使兼知建康府兼壽春等六州宣撫使會王才降劉豫引兵入寇夢得遣使張偉諭才降之以其衆分隸諸軍濠壽叛將寇宏陳卞雖陽受朝命陰與豫通夢得諭以禍福皆聽命及豫入寇卞擊敗之八年除江東安撫制置大使兼知建康府行宮留守又奏防江措畫八事金宗弼犯含山進逼歷陽夢得勸張俊趣諸軍進發聲勢大振金人退屯昭關明年金復入寇遂至柘皋夢得團結沿江民兵數萬分據江津遣子模將千人守馬家渡金兵不得渡而去初建康屯兵歲費錢八百萬緡米八十萬斛榷貨務所入不足以支至是禁旅與諸道兵咸集夢得兼綜四路漕計以給饋餉軍用不乏故諸將得悉力以戰詔加觀文殿學士移知福州兼福建安撫使海寇朱明猖獗詔夢得挾御前將士便道之鎮遂平寇五十餘郡拜崇信軍節度使致

仕十八年卒於湖州贈檢校少保

宋史

胡元質字長文父珣治生大穰所親爲之宰負金萬數珣焚其書待之如常元質少穎悟尙行義未冠游太學紹興十八年進士第初寓臨安聞鄰有貧士夜哭乃爲人責償鬻其女與別元質慨然垂橐予之光宗卽政以薦爲太學正歷祕書省正字校書郎禮部兼兵部遷右司侍經帷直史筆參掌內外制給事黃門知貢舉嘗極論人主一言一動不可不謹至累百言帝書之座右恩眷特厚爲書王褒聖主得賢臣頌及親製大才論以賜出守和州太平建康皆有政績淳熙中爲四川制置使知成都奏減蜀鹽虛額錢大略謂鹽井重額沈痼百姓垂五六十年蓋蜀鹽取之於井山谷之民相地穿鑿深至六七十丈幸而得泉以石磴砌大者方五六尺以木革爲囊數十人引大繩汲取之自子至午泉脈漸竭乃絕人入井以手掬取投之於井引繩而上此數十人晝夜號呼推車挽繩不得停息然後得水入竈燒煎成鹽比東南煮海與陝西解池工力百倍又有小井謂之卓筒大不過數寸深亦數十丈以竹筒設機抽泉窮日之力所得無幾鹽戶窮困可以概見解池則不須煎煮止於池旁各分畦隴導水而入一夕得風並皆凝結鹹水之在江海旣無限量又省



工役故其鹽沛然有利無害四川產鹽地分除大寧監依山崖間鹹泉流出若小谿澗稍易分結燒煎其他州縣皆係鹽井汲泉煎煮大段費力簡州鹽額最重虛額尤多由是每歲計豁除折估錢五萬四千九百餘貫又請蠲夔路九州民間歲置金銀重幣蜀人德之關外西河階成鳳四州所聚民兵謂之忠勇皆以土兵爲之先是虞允文團結二千九十四人其後不能增募元質奏令四州守臣添招仍立賞格詔每州各先募五百人又奏唐之季年吐蕃寇至必入黎文南詔寇至必入沈黎吐蕃南詔合入寇必出灌口其黎文兩州去成都尙千里關隘險阻足以阻隔惟灌口一路去成都止百里又皆平陸朝發夕至大率沿邊諸州城資堡砦以爲蔽堡砦賴州城以爲援惟威茂兩州其堡砦參錯於中州城孤立於外而屬部蕃落周分環據二三百里之間官路僅留一線達於兩州若邊事不寧孤城坐見隔絕所奏利害似此者尙多元質吳中舊居卽程公闢南園故址旣歸杜門自適奉祠逾六七年以正奉大夫敷文閣學士致仕卒年六十三贈金紫光祿大夫少師諡獻惠平居未嘗疾言厲色及評人短長或告以人之傾己輒俯首欲寐好善樂施家貲多推予諸弟人皆義之

林樸字伯振乾道中與弟琰同舉進士爲長興簿知武昌縣嘗云交代有子孫之契不宜交

惡金穀倘有虧欠當即與交頭無令滯其批書時人稱其長厚琰字玉圭善篆書

志盧

黃由字子由弱冠有聲太學淳熙八年進士第一時甘昇爲入內押班用事二十年招權市

賄與曾覲王忭相盤結由對策及之吳自設科以來由始冠多士授南安軍簽判秩滿通

判紹興府往新嵒督行荒政由改糶爲賑擅發米五萬石予民不取其直除正字遷著作

佐郎使金還遷將作監嘉王府贊讀紹熙五年孝宗疾亟光宗不能視疾人情益懼由請

嘉王過重華宮問安孝宗爲感動寧宗即位累擢權禮部尙書兼吏部將大用矣會知綿

州王沈朝辭乞詔廟堂銓選若嘗受僞學薦舉陞改及衆論指爲僞黨者籍記姓名且與

勿用由奏謂人主不可待天下以黨與不必置籍以示不廣繼擢沈利路轉運判官由亦

出知成都殿中侍御史張巖奏由阿附權臣植立黨與遂以雜學士奉祠嘉定初知紹興

府浙東安撫使聞嵒縣昔有虎患訛言謂虎歲久有神變化叵測或爲僧形或爲獫狁儻

忽莫可蹤跡由禱於神厚賞募人捕之殄滅無遺種民賴以安三年除刑部尙書兼直學

士院官至正奉大夫自號盤野居士卒贈少師

志盧

顏直之字方叔生而端厚穎悟好讀書以弓矢應格差監省倉卽丐祠養親主管建昌軍仙都觀自號樂閒居士作退靜齋幅巾危坐焚香撫琴意泊如也平生施與尤樂以藥石濟病賴以全活者甚衆工小篆得詛楚文筆意年五十一以嘉定十五年卒子汝勛字元老有清行好爲詩亦工篆籀以表兄少傅趙師貢郊恩奏得官累至朝散大夫

盧志

阮登炳字顯之其先由閩徙吳遂爲長洲人世習禮記淳祐六年與計偕咸淳初免上南宮以亮陰賜狀元恩例授承事郎紹興府簽判福王府教導官改承議郎祕書省正字以論公田抗言迂衆斥予宮觀自號菊存居士閱二載起爲建寧府添差通判入爲祕書省校書郎祕書監丞權少監

國祕書監官

至朝請郎元兵取臨安隨例入燕以疾還鄉里年八

十二卒

盧志

鄭虎臣名景召以字行居鶴舞橋東以貲雄於鄉德祐元年賈似道循州安置遣使監押之貶所虎臣時爲會稽縣尉以父嘗爲似道所配欲報之欣然請行時似道寓建寧之開元寺侍妾尙數十人虎臣至悉屏去撤轎蓋暴行秋日中令舁轎夫唱杭州歌謔之每名斥似道窘辱備至一日入古寺壁上有吳潛南行所題字虎臣呼似道曰賈團練吳丞相何

以至此似道慚不能對舟次南劍州黯淡灘虎臣曰水清甚何以不死於此似道曰太皇許我不死候有詔即死十月至漳州木棉庵虎臣曰吾爲天下殺似道雖死何憾遂拘其子與妾於別館即廁上拉其胸殺之陳宜中至福州捕虎臣斃於獄

通鑑綱目參盧志

姚原字子東七歲而孤自知讀書舉進士以詞賦稱再試不合輒棄去曰窮達有分名不我

遂命也由是絕意仕進務著述號北窗居士

朱思銘

元

袁易字通甫五世祖珣宋京西提刑南渡時葬於吳曾祖璠始家於長洲之蛟龍浦易不樂

仕進東平徐公持部使者節聞其名延見與語大悅將薦之力謝不可徐公益賢之已而

行中書省署石洞山長乃就職既歸卒隱弗仕即所居西偏爲堂曰靜春壅水成池周於

四隅池上累石如山堂中有書萬卷悉手所校客至縱飲劇談留連竟夕乃已少敏於學

蘊積之素一發於詩吳興趙公嘗畫袁安臥雪圖以遺之曰予作此圖正以通甫好修之

士景慕其高節爾卒年四十五

黃潛墓志

子泰字仲長孫養福字能伯皆有詩名兼精書法

縣志

陸德原字靜遠甫里人天隨先生之後好學博古尊師敬友雖貲贍力給謙恭若出諸生之

下憤甫里之學不傳作義塾於城南祀天隨子撥良田千畝以給學徒遣重幣迎名儒龔  
璠柳貫爲之師中書省予額曰甫里書院署德原爲山長長洲縣學久廢德原以已貲重  
建秩滿陞徽州路學教授徽學亦久廢又將以已貲新之市材於吳屬疾卒年五十九家  
有杞菊軒人稱爲杞菊先生

乾隆志

李世英字伯英精六書作韻類三十卷其書以字爲本音爲幹義訓爲枝葉自一而二井井  
不紊凡十年而成書從子文仲又本說文作字鑑五篇辨點畫刊除外謬以備一家之言

干文傳黃潛爲之序

姑蘇志

浦源至正間仕至大中大天馬平路總管輕車都尉封京兆郡侯初未聞其有文學名嘗於  
景德寺旁見一石刻乃源爲同僉阿札刺室人童氏祠記其文宏博怪特字畫迺勁足爲

名家

姑蘇志

邊景元字長卿宋朝奉大夫珣八世孫自幼端謹喜讀書以累世明於春秋嘗指堂扁世麟  
二字以示子孫曰此宋丞相文天祥手書以美吾祖者也吾子孫可忘其家業乎元初由  
青陽教諭轉處州路學錄廷臣交薦爲國子伴讀以病辭居鄉里教生徒會長洲邑庠久

廢勸說郡之巨家度材庀工大興建焉

盧志

明

高啓字季迪博學工詩張士誠據吳依外家居吳淞江之青邱洪武初被薦偕同縣謝徽召修元史授翰林院國史編修官復命教授諸王三年秋帝御闕樓啓徽俱入對擢啓戶部右侍郎徽吏部郎中啓自陳年少不敢當重任徽亦固辭乃見許已並賜白金放還啓嘗賦詩有所諷刺帝嘆之未發也及歸居青邱授書自給知府魏觀爲移其家郡中旦夕延見甚歡觀以改修府治獲譴帝見啓所作上梁文因發怒腰斬於市年三十有九明初吳下多詩人啓與楊基張羽徐賁稱四傑以配唐王楊盧駱云

明史

傅著字則明洪武初召修元史史成歸爲常熟教諭魏觀行鄉飲酒禮長洲教諭周敏侍其父南老著侍其父玉皆降而北面立觀禮者以爲盛事焉歷官知府卒

乾隆志

謝徽字元懿洪武初召修元史史成授翰林國史院編修尋擢吏部郎中力辭不拜歸復起

國子助教卒徽博學工詩文與同邑高啓齊名弟恭字元功亦能詩

明史

申屠衡字仲權少從楊維禎學春秋爲古文有法元季不仕自號樹屋傭洪武三年徵至京

草諭蜀書稱旨授翰林修撰以病免尋謫居濠上卒同時陶琛字彥珩亦有文學洪武初以薦爲儒學官志尙高潔工古篆書多得籀法子繼字承伯枝江知縣亦有能書名

姑蘇志

劉以禮字德讓其先汴人祖順之仕平江路權茶提領因家於蘇以禮學識該博儀狀偉然洪武初以明經薦授沛縣儒學教諭時學徒久廢以禮力以興舉爲已任乃舉鄉人張倫爲訓導協心教之多所成就沛縣至今祀之

姑蘇志

周敏字遜學南老子少歲以儒士選備顧問太祖問小儒生何籍曰蘇州有父母乎曰臣父母年七十太祖命爲長洲縣教諭俾就家養親魏觀改修府治忌者蜚語上聞上使御史張度往覘度詭爲日者竄敏齋府治落成僚屬詣府賀敏不往度問之曰上命訓諸生賀上官非吾分也後觀獲罪賀者皆不免敏獨脫然遷安都尉以謹慎稱

縣志

張適字子宜父澤元海道萬戶府總管適十歲能詩賦彈琴時稱奇童嘗以詩經應浙江鄉試元季天下亂遂隱居不仕洪武初以秀才召擢水部郎中病免後復以明經薦授廣西布政司理問所提控案牘調滇池魚課司大使考滿改宣課司大使卒孫祝宣德間由進士除大理評事正統初上疏言畿甸旱蝗乞暫停征稅放免匠役蠲除倒斃馬匹以甦民

困後坐事左遷處州知州陞大理寺左正保定知府致仕卒適博學工詩文與高楊齊名

姑蘇志

宋通字文傑在元為萬戶侯壬辰兵起散家財為一方保障洪武時舉賢良方正不赴卜宅

楓江相地九龍塢曰吾家世有隱德吾子孫不敢望富貴得為善人保詩書澤足矣妻即

沈萬三女知有家難不受嫁貲亦奇女子也

庚熙志

虞堪字克用一字勝伯宋丞相允文諸孫後家長洲隱居行義不樂仕進家藏書甚富多手

自編輯其詩清順則麗間寫山水亦有思致雅重先世手澤聞有雍公遺文雖千里外必

購得之乃已其從祖伯生遺稿亦堪所編

姑蘇志

世武中為雲南府學教授卒於官

列朝詩集

趙友同字彥如系出宋南陽侯父良仁工醫在藝術傳友同沈實溫雅有行誼自少篤學嘗

從宋濂游洪武末授華亭學訓導永樂初滿考當遷會姚廣孝言其深於醫遂授太醫院

御醫又有言其知水事者詔從夏原吉治水浙西其後大臣數薦其文學及修永樂大典

遂用為副總裁又與修五經四書性理大全書成當遷翰林以母喪去卒於家弟友泰子

季敷孫同魯俱世其學

姑蘇志



梁時字用行始家吳江遷長洲博學工文章以氣格為主不事纖麗亦善筆札洪武中用薦

授岷府紀善遷翰林典籍修永樂大典充副總裁

姑蘇志

王汝玉名璫以字行其先蜀人六世祖極宋吏部侍郎僑居長洲父立中

字彥強

元末知松江

府明初致仕汝玉穎敏強記年十七中浙江鄉試以薦攝教授訓導擢翰林五經博士進

檢討再進春坊贊善預修永樂大典仁宗在東宮特深眷注嘗與學士解縉應制撰神龜

賦汝玉第一名大振然忌者多竟以他事下獄死洪熙初追贈太子賓客諡文靖弟璫字

汝嘉舉明經由訓導升教諭召修永樂大典及五經四書性理大全留爲翰林五經博士

晉侍講入直宏文館宣德元年卒汝玉兄璫字汝器洪武壬子簡會試七十八人授編修

使肄業文華堂命宋濂爲師璫在選中後爲吏部主事卒

節姑蘇志

俞士悅字仕朝永樂乙未進士擢御史陞湖廣按察副使綱紀振肅貪濁悉自引去民居不

戒於火延及臬署僚屬皆奔避士悅具衣冠向火再拜風徐返火滅歲旱有司用道法

焚蛇磔燕而旱彌甚亟命屏去乃齋沐露禱得雨連三日秩滿陞浙江參政初至佯若不

解事者羣吏易之越三日發奸梟伏如神豪猾破膽正統壬戌倭寇犯境士悅城作激二

浦以備至今賴之尋陞河南右布政使甫三日陞大理寺卿已巳之變陞右都御史留守京師協都督衛穎率師六萬守德勝後定二門士悅晝夜籌畫甲冑未嘗去體事平陞刑部尚書進太子太保天順改元謫戍遼東成化初赦還復其官卒年八十五悅儀表魁岸面色如鐵聲如洪鐘不類南產平生剛方侃侃見者畏服

姑蘇志

李蕡字茂實永樂乙未進士除兵部武選司主事歷員外郎郎中在武選二十年受知於尙書方賓陞太僕少卿靖遠伯王驥征麓川奏蕡為佐俄丁父憂詔起復視事事竣陞工部侍郎始乞持服服闋以兵部尙書鄺埜薦改兵部侍郎卒於官蕡勤敏有吏材習知兵事所在著聲性沈厚不苟居鄉里未嘗以貴加入每出必步過里門上馬終其身如一日同時有劉紹字繼初吳縣人永樂丙戌進士歷兵部郎中廣西副使時稱劉司馬亦以厚德稱蕡妻之父也

乾隆志

陸本字思名洪武三十一年由人材薦授甯海令先是瀕海之田為海潮所浸連歲無秋民困於逋租且徭役相仍逃亡者眾本涖治月餘推誠招撫修築隄岸給以穀種耕牛民多

復業浙江通志

趙文字宗文洪武中舉人材以母老歸養永樂五年以薦知鄱陽縣不阿權倖坐謫久之歸

卒弟宗禮洪武丙子鄉舉官至兵部郎中

姑蘇志

孔友諒永樂進士十六年改庶吉士出知雙流縣宣宗初上言六事一曰守令親民之官古者不拘資格必得其人不限歲月使盡其力今居職者多不知撫字之方而廉幹得民心者又遷調不常差遣不一或因小事連累朝夕營治往來道路日不暇給乞敕吏部擇才望素優及久歷京官者任之諭戒上司毋擅差遣假以歲月責成治效至遠缺佐貳多經裁減獨員居職或遇事赴京多委雜職署事因循苟且政令無常民不知畏今後路遠之缺常留一正員任事不得擅離庶法有常守二曰科舉所以求賢必名實相副非徒誇多而已今秋闈取士動一二百人弊既多端僥倖過半會試下第十常八九其登第者實行或乖請於開科之歲詳核諸生行履孝弟忠信學業優贍者乃許入試庶浮薄不致濫收而國家得真才之用三曰祿以養廉祿入過薄則生事不給國朝制祿之典視前代爲薄今京官及方面官稍增俸祿其餘大小官自折鈔外月不過米二石不足食數人仰事俯育與道路往來費安所取資貪者放利行私廉者終窶莫訴請敕戶部勘實天下糧儲以

歲支之餘量增官俸仍令內外風憲官採訪廉潔之吏重加旌賞則廉者知勸貪者知戒  
四曰古者賦役量土宜驗丁口不責所無不盡所有今自常賦外復有和買採辦諸事自  
朝廷視之不過令有司支官錢平買而無賴之輩關通胥吏壟斷貨物巧立辨驗折耗之  
名科取數倍奸弊百端乞盡停採買減諸不急務則國賦有常民無科擾其二事言汰冗  
員任風憲言者多及之不具載宣德八年命吏部擇外官有文學者六十八人試之得友  
諒及進士胡端禎等七人悉令辦事六科居二年皆授給事中惟友諒未授官而卒

明史  
姑

蘇志友諒知雙流縣時民初未知學友諒教其秀者親為講解士  
習稱變科第多得人鄰縣有劇寇過雙流友諒行境上掩捕之

仰瞻字宗泰永樂辛卯領鄉薦授虎賁右衛經歷歷熙熙初遷大理寺副嘗辨神武衛卒毛拜  
兒冤獄活數十人楊士奇薦為左寺丞正統中王振用事百司奔走其門振生日公卿皆  
至為壽瞻獨不往振銜之邏卒與蔚州衛兵沈榮有怨誣榮通二寡婦咒殺其夫獄具瞻  
駁之卒訴諸振言於上并逮辨勘官下錦衣獄窮治竟殺榮等大理卿薛瑄等罷降有差  
瞻獨謫戍大同凡七年景泰初召為右寺丞持法益堅久之衆寢不悅遂辭歸加少卿致  
仕瞻尤篤長者之行有夏時建中者為郡學訓導瞻嘗師之後經其門必下馬而趨人竊

窺之雖暮夜亦然

乾隆志

劉鉉字宗器生彌月而孤及長割股療母疾母卒哀毀以孝聞永樂中用善書徵入翰林舉順天鄉試授中書舍人宣德時預修成祖仁宗實錄遷兵部主事仍供事內廷正統中再修宣宗實錄進侍講以學士曹鼐等薦與修撰王振教習庶吉士景帝立進侍講學士直經筵三年以高穀薦遷國子祭酒時以國計不足放遣諸生不願歸者停其月廩鉉言養才國家急務今倉廩尙盈奈何靳此遂得復給又令甄別六館生年老貌寢學藝疏淺者斥爲民鉉言諸生荷教澤久豈無片長況離親戚棄墳墓艱苦備至一旦被斥非朝廷育才意乞揀年貌衰而有學者量授之官帝可其奏尋以母喪歸服闋赴都陳詢已爲祭酒帝重鉉命與詢並任天順初改少詹事侍東宮講讀明年十月卒帝及太子皆賜祭賻贈有加憲宗立贈禮部侍郎諡文恭鉉性介特言行不苟教庶吉士及課國子生規條嚴整讀書至老彌篤

明史

徐輔字輔德永樂辛卯舉人授安吉訓導擢兵科給事中封駁無所避陞湖廣按察僉事歷湖廣右叅政輔平生厚德長者同郡潘純字粹中徐傑字以立周賢字用希郭璘字孟潤

陸嗣昌字宗盛居官爲政皆清介醇謹而望亞於浦

姑蘇志

趙忠字行恕宣德五年進士由庶吉士授監察御史出按四川時松潘寨商巴刺麻叛忠率兵入其巢開示禍福其黨悉潰已劾邊將激擾之罪罷之邊境以寧再按浙江清軍廣東擢陝西參議進雲南參政遭疾歸卒年五十六忠操履端謹久任憲職囊其餘貲其歸也族子弟已賣其居忠攜家累無所歸其友朱名仲假餘屋以居既卒喪不能舉名仲復偕友倡助以襄厥事忠同年進士柳華同爲御史終按察副使名亞於忠

乾隆志

劉溥字原博祖彥敬父士賓皆以醫得官溥八歲賦溝水詩時目爲聖童長侍祖父游兩京研究經史兼通天文歷數宣德時以文學徵有言溥善醫者授惠民局副使調太醫院吏目恥以醫自名日吟咏爲事其詩初學西崑後更奇縱與湯允勤蘇平蘇正沈愚王淮安鐸鄒亮蔣忠王貞慶號景泰十才子溥爲主盟

明史

鄒亮字克明善屬文才思藻麗受知巡撫周忱正統初郡守況鍾薦其才擢吏部司務轉都察院司務遷監察御史爲人謙謹酷嗜書積至千餘卷手自抄錄讎校弟順字克和宣德乙卯以春秋中順天鄉試授工部主事改刑部歷員外郎郎中遷辰州知府致仕卒爲人

坦夷無他腸

姑蘇志

顧隴字德明父巽字順中受易於鄉儒周傳永樂二十二年登進士未授官卒當時從巽受

經者甚衆而賀廉孔友諒顧恂輩皆中魁選吳中易學實始於巽

姑蘇志

隴正統丙辰進士

選庶吉士授行人擢御史出理山東長蘆鹽法宿弊頓革再巡山東自布政使以下不職者輒劾退不少假借都御史王文移文御史凡出巡者當以隴爲法歲滿吏民奏留一年從之遷福建副使爲奸民所誣調知贛州府長河洞氓屢出劫掠隴率兵勦平之詔賜金綺隴有治才遇事裁決不動聲色聽訟民莫敢欺以老乞歸卒年八十五

吳寬墓碑

子餘慶成

化壬辰進士官至河南

志

祝顥字惟清正統四年進士內侍傳旨試能文者四人顥與焉入掖門知欲令教小內豎也不試而出授刑科給事中建白務特大體嘗奉命檢察在京寺觀無額者有青龍寺在檢中僧稱密旨所建卒奏毀之景泰間陞山西左參議遷右參政時北虜擾邊公私困竭顥規畫久之倉廩皆滿汾州有妖人作亂稱王年號天福顥馳赴擒十六人而攀援及千人欲爲簡釋三司難之顥執不可卒以善聞以邊郡少文民不知義爲博延儒士教導之表

洪洞縣臯陶墓祀裴晉公趙忠簡於聞喜程伊川於澤州改金人所塑先聖像之左衽者

成化初乞歸巖吏材精敏詩文典瞻言動引經傳聞者聳然卒年七十九乾隆志

劉珏字廷美少時知府況鍾推擇爲吏謝不願願得補諸生鍾許之正統戊午舉鄉試以才薦授刑部主事歷山西按察僉事年甫五十即致仕歸珏修身篤學動師古人初在刑部有莆田縣丞督賦侵漁事覺當訊以黃金二百兩託所親賂之珏斥去遂致於理居憂時無錫知縣某受賕繫獄知珏與當道善密遣人齎五百金求解珏曰爾主欲雪己而浼我耶不亟去當執之於官事毋篤孝女兄少子幼迎歸買田養之終身爲詩尤長七言對偶清麗當時稱爲劉八句書法出吳興畫師王叔明

王志堅府志稿

韓雍字永熙正統七年進士授御史負氣果敢以才略稱錄囚南畿碭山教諭某答膳夫膳

夫逃匿父訴教諭殺其子取他兒支解以證既誣服雍蹤跡得之白其冤出巡河道已巡

按江西黜貪墨吏五十七人廬陵太和盜起捕誅之十三年冬處州賊葉宗留自福建轉

犯江西官軍不利都督僉事陳榮指揮劉鎮遇伏死詔雍及鎮守侍郎楊寧督軍民協守

會福建巡按御史汪澄牒鄰境會討賊鄧茂七俄以賊議降止兵雍曰賊果降退未晚也



趨進賊已叛澄坐得罪死人以是服雍識景泰二年擢廣東副使大學士陳循薦爲右僉都御史代楊寧巡撫江西歲饑奏免秋糧劾奏寧王不法事王府官皆得罪時雍年甫三十赫然有才望所規畫措置咸可爲後法天順初罷天下巡撫官改山西副使寧王以前憾劾其擅乘肩輿諸事下獄奪官起大理少卿尋復爲右僉都御史母憂起復巡撫宣府大同議事入覲帝壯其貌留爲兵部右侍郎憲宗立坐學士錢溥累貶浙江左參政廣西猺獞流剽廣東殘破郡邑殆徧成化元年正月大發兵拜都督趙輔爲總兵官以太監盧永陳瑄監其軍兵部尙書王韓雍才氣無雙平賊非雍莫可乃改雍左僉都御史贊理軍務雍馳至南京集諸將議方略先是編修邱濬上書大學士李賢言賊在廣東者宜驅在廣西者宜困欲宿兵大藤峽扼其出入蹂其禾稼期一二年盡賊賢善之獻於朝詔錄示諸將主其說請令游擊將軍和勇卒番騎趨廣東而大軍直趨廣西分兵撲滅雍曰賊已蔓延數千里而所至與戰是自敝也當全直搗大藤峽南可援高肇雷廉東可應南韶西可取柳慶北可斷陽峒諸路首尾相應攻其腹心巢穴旣傾餘迎刃解耳舍此不圖而分兵四出賊益奔突郡邑益殘所謂救火而噓之也衆曰善輔亦知雍才足辦賊軍謀

一聽雍雍等遂倍道趨全州陽峒苗掠興安擊破之至桂林斬失機指揮李英等四人以徇按地圖與諸將議曰賊以修仁荔浦爲羽翼當先收二縣以孤賊勢乃督兵十六萬人分五道先破修仁賊窮追至力山禽千二百餘人斬首七千三百級荔浦亦定十月至潯州延問父老皆曰峽天險不可攻宜以計困雍曰峽延廣六百餘里安能使困兵分則力弱師老則財匱賊何時得平吾計決矣遂長驅至峽口儒生里老數十人伏道左願爲嚮導雍見卽罵曰賊敢給我叱左右縛斬之左右皆愕旣縛而袂中利刃出推問果賊也悉支解剝腸胃分挂林箐中纍纍相屬賊大驚曰韓公天神也雍令總兵官歐信等爲五哨自象州武宣攻其北身與輔督都指揮白全等爲八哨自桂平平南攻其南參將孫震等爲二哨從水路入而別分兵守諸隘口賊魁侯大狗等大懼先移其累重於桂州橫石塘而立柵南山多置滾木礮石鏢鎗藥弩拒官軍十二月朔雍等督諸軍水陸並進擁團牌登山殊死戰連破石門林峒沙田右營諸巢焚其室廬積聚賊皆奔潰伐木開道直抵橫石塘及九層樓諸山賊復立柵數重憑高以拒官軍誘賊發矢石度且盡雍躬督諸軍緣木攀藤上別遣壯士從閒道先登據山頂舉礮賊不能支遂大敗先後破賊三百二十四

若生擒大狗及其黨七百八十人斬首三千二百有奇墜溺死者不可勝紀峽有大藤如虹橫亙兩崖閒雍斧斷之改名斷藤峽勒石紀功而還分兵擊餘黨鬱林陽江洛容博白次第皆定帝大喜賜勅嘉勞召輔等還遷雍左副都御史提督兩廣軍務雍乃散遣諸軍以省饋餉而遺孽侯鄭昂等遂乘虛陷潯州及洛容北流二縣雍發兵撲討應時破殄尋以憂歸明年兩廣盜復起起復雍右都御史總督如故雍抵任遣參將張壽游擊馮昇等分道討賊皆摧破之蠻民素懾雍威寇盜浸息九年柳潯諸蠻復叛參將楊廣等俘斬九百人方更進而賊破懷集縣兵部劾雍奏報不實廣西鎮守中官黃沁素憾雍抑已因訐雍且言其貪欲縱酒濫賞帝遣給事中張謙等往勘而廣西布政使何宜副使張敷銜雍素輕已共醞釀其罪竟命致仕去雍洞達闔爽重信義撫江西時請追諡文天祥謝枋得雍雄略善斷動中事機臨戰率躬親矢石不目瞬自奉尊嚴三司皆長跪白事軍門設銅鼓數十儀節詳密裨將以下繩柙無所假兩地鎮守宦官素驕恣亦惕息無敢肆疾惡嚴坦中不爲崖岸揮斥財帛不少惜故雖令行禁止民得安堵而謗議亦易起爲中官所齟齬公論皆不平兩廣人念雍功尤惜其去爲立祠祀焉家居五年卒年五十七正德

間諡襄毅

史明

顧昌字德輝正統間領鄉薦授襄城教諭陞淮王府長史轉思恩府同知爲人清介絕俗平生未嘗受人一蔬之餽晚歲致仕家居詣人家誓不飲食留之輒起去雖遠去數里甯饑渴而歸其文章簡潔似其爲人

姑蘇志

陳鑑字緝熙父潤謫戍蓋州道京師過其故人范叔瓚卽以鑑託之久之叔瓚家人不能容乃以貽道士王一居爲弟子一居命索債浙東乃從師受學債一無所問徒市書數篋而歸一居奇之使卒儒業正統十三年進士及第授編修景泰中充講官進修撰天順初奉使朝鮮遷侍讀修英宗實錄成進侍讀學士未幾命爲祭酒初國子月給錢爲會饌費然斂散不常多不時給則貯爲公費其來已久會有不快於前祭酒邢讓者言讓以公錢入己事并及鑑會官廷問讓辨不已鑑曰吾爲祭酒安能對刀筆吏掉口舌竟不吐一辭適有從中醞釀之者與讓俱除名未幾卒鑑平生無聲色之奉多藏法書名畫其使朝鮮以妓女侍作詩卻之夷人敬服

姑蘇志

王肄字敏道受學於陳繼正統中以賢良舉爲安吉縣丞辭官歸授徒爲業父穆字仲遠築

王東郭草堂讀書不仕王汝玉嘗爲記博識古今吳中宿儒也

列朝詩集

練綱字從道祖則成洪武時御史

王志堅稿作祖頃字則成洪武中舉明經授春坊司直官所毒死綱舉鄉試入國子監歷事都察院郝王監國上中興八策也先將入犯復言和

議不可就南遷不可從有持此議者宜立誅安危所倚惟于謙石亨當主中軍而分遣大臣守九門擇親王忠孝著聞者令同守臣勤王檄陝西守將調番兵入衛帝悉從之綱有才辨急功名都御史陳鑑尙書俞士悅皆綱同里念綱敷陳時政有聲且畏其口遂薦之授御史景泰改元上時政五事巡視兩淮鹽政駙馬都尉趙輝侵利劾奏之三年冬偕同官應詔陳八事並允行亡何復偕同官上言吏部部推選不公任情高下請置尙書何文淵右侍郎項文曜於理尙書王直左侍郎俞山素行本端爲文曜等所罔均宜按問帝雖不罪終以綱等爲直時御史左鼎善爲章奏而綱以敢言名京師語曰左鼎手練綱口自公卿以下咸憚之明年命出贊延綏軍務自陳名輕責重乞授僉都御史帝曰選官可自求耶遂寢其命初京師戒嚴募四方民壯分營訓練歲久多逃或赴操不如期廷議編之尺籍綱等言召募之初激以忠義許事定罷遣今輾轉輪操已孤所望況其逃亡實迫寒

餒豈可遽著軍籍邊方多故倘更召募誰復應之詔卽除前令五年巡按福建與按察使

楊珏互訐俱下吏謫珏黃州知府綱鄂州判官久之卒

史明

邢量字用理隱居葑門以醫卜自給性狷介不娶與人無將迎足跡不出里門不畜奴婢敝屋三間青苔滿壁折鐺敗席蕭然如野僧長日或不舉火客至相與清坐而已其學自經史外凡釋老方技之說無所不通室中臥榻之外皆藏書並手自校定或叩之信手舉似不事翻檢文章古簡亦不苟作同邑沈誠字希明生稍後隱操亦高雖居通衢鄰里莫識其面朝士有欲過之者固謝不納誠博學問無不知然短無著述故無所傳云

姑蘇志

朱瑾字良德其先山東人以功授蘇州衛指揮遂爲郡人瑾出武胄能勤苦讀書與儒生埒都督翁紹宗守三吳將薦之瑾辭曰兄旣守官當勉力家事使兄無內顧不敢以菲薄叨一命徐有貞韓雍祝顥輩皆與交家有天光雲影亭俯葑溪清勝可愛每宴會詩酒留連往往至達旦有貞之歸也日奉以游山水酒饌絲竹之費傾家不吝有貞長短句數闋皆

與游時所作自號玉雪人稱玉雪朱公子

王志堅府志稿

孔鏞字韶文友諒子景泰五年進士知都昌縣分戶九等以定役設倉水次便收斂民甚賴

之以弟銘尙甯府郡主改知連山獠獞出沒鄰境縣民悉竄鏞往招之民驚走鏞炊飯民舍留錢償其直以去民乃漸知親鏞相率還鏞慰勞振恤俾復故業教以戰守道路漸通縣治遂復都御史葉盛征廣西以鏞從諸將妄殺者鏞輒力爭所全活甚衆成化元年用葉盛等薦擢高州試知府前知府劉海以獠警閉城門自護鄉民避獠至者輒不納還爲獠所戕又疑民陰附賊輒戮之賊緣是激衆怒爲內應城遂陷鏞至開門納來者流亡日歸城不能容別築城東北居之附郭多暴骸民以疫死復爲義塚瘞焉時賊屯境內者凡十餘部而其魁馮曉屯化州鄧公長屯茅峒屢招不就鏞一日單騎從二人直抵茅峒去城十里許道遇賊徒命遠告曰我新太守也公長驟聞新守至亟呼其黨擐甲迎及見鏞坦易無騶從氣大沮鏞徐下馬入坐庭中公長率其徒弛甲羅拜鏞諭曰汝曹故良民迫凍餒耳前守欲兵汝吾今奉命爲汝父母汝我子也信我則送我歸賚汝粟帛不信則殺我卽大軍至無遺種矣公長猶豫其黨皆感悟泣下鏞曰餒矣當食我公長爲跪上酒饌既食曰日且暮當止宿夜解衣酣寢賊相顧駭服再宿而返公長遣數十騎擁還城中人望見皆大驚謂知府被執來始降也盡登陴鏞止騎城外獨與羸卒入取穀帛使載歸

公長益感激遂焚其巢率黨數千人來降公長既降諸賊次第納款惟曉恃險不服鏞選壯士二百人乘夜抵化州曉倉皇走匿獲其妻子以歸撫卹甚厚曉亦以五百人降已與僉事陶魯敗賊廖婆保他賊先後來犯多敗去境內大定上官交薦擢按察副使分巡高雷二府益招劇賊梁定侯大六鄧辛酉等給田產分處內地爲官備他盜廣西賊犯信宜岑溪皆擊敗之治績聞賜誥命旌異遭喪服除改廣西徭僮聞鏞至悉遠遁十四年兵部上其功賚銀幣尋進按察使已遷左布政使旋以右副都御史巡撫貴州清平苗阿谿者桀驁多智其養子阿賴尤有力橫行諸郡中守臣皆納谿賂驕不可制鏞行部至清平詢得谿所昵者二人遂以計擒谿磔之並討平蠻背苗羣蠻震懾鏞居官廉歷任三十餘

年皆在邊陲觸瘴成疾乞骸骨不許弘治二年召爲工部右侍郎道卒年六十三

稿曰初鏞幼孤貧甚有林昌者識之妻以女弟昌宋寓公槩之後授徒爲業有醇德後以子符貴封御史以上壽終嘗自草墓誌

明史  
王志堅

杜庠字公序少從崑山張和學同輩忽之張曰此進士才也不二年遂占應天鄉試登進士知攸縣頃之罷歸庠有逸才嘗過赤壁題詩有驚人句人呼爲杜赤壁仕不得志遂放意

詩酒往來湖浙間嬉笑怒罵咸發於詩

乾隆  
志



陳頌字永之景泰元年領鄉薦明年以乙榜授湖州府學訓導內艱改荊州又以祖母喪改陽武年五十五乞致仕頌博學工古文而清修介特其爲師不立教條而人多感化之湖州發地得奇石或謂可載歸爲翫頌曰此固非吾家物也棄不取在荊州太守錢公故人

也知其貧贈一官馬他日納還之曰受則傷廉亦爲公汗少通醫及老亦資以自給

吳寬誌

李應禎名姓以字行更字貞伯景泰癸酉舉人入太學中官牛玉請爲塾師固拒之選授中書舍人直文華殿同官多由他途以進恥與爲伍乞改教官補外不許慶成宴中書舍人坐給事中御史下應禎奏非舊制詔命寫佛經抗疏上言臣聞爲天下國家有九經不聞有佛經也上怒命扑之後陞兵部郎中尙寶司卿再陞太僕寺少卿皆在南京引年致仕應禎好古博學篆楷俱入品格文詞簡健喜面折人多畏之卒之日無以爲斂友人

文林史鑑買地以葬焉

乾隆志

劉瀚字約之鉉子天順丁丑進士試政禮部頌詔至揚州峻拒餽金縉紳繪卻金圖賦詩頌之授大理評事嘗奉敕錄京畿江西重獄平反四百餘人歷大理知府鋤強抑暴民甚安之遷陝西副使尋致仕居鄉十七年足不至公府年八十一卒

李東陽誌

同縣張翥字汝振亦

丁丑進士由工部主事歷南京刑部郎中出知南昌府理冤獄發高安世豪毛姓縱火殺

人罪又折服中官之乘傳橫索者歷河南參政雲南按察使致仕

王整誌

沈鐘字仲律天順庚辰進士終山東提學副使與章懋羅倫友善時十君子好賦詩多至萬

餘首通志

陳震字起東少穎異數歲屬對驚絕時目為奇童弱冠領鄉薦授濟陽訓導陞寧德教諭所

至能率其職都御史張瑄薦於朝不報以例改江山縣卒震為人類簡率而清慎不苟居

官三十年家猶赤貧先是震嘗受知於郡守朱勝後考浙江鄉試其子懷金投之震峻拒

不與見士論益高之姑蘇志

胡琮字文德成化丙戌進士知江陵縣遼王縱其下劫奪為民患琮一繩以法王欲以利啗

琮因饋食置金其中琮拒卻之乃相戒斂戢徵授御史坐言事謫麻城知縣遷常德同知

嘗署府事有大璫自滇還所在索賄笞繫官吏琮召邏卒聲言欲檢視其橐璫懼亟引去

他日有詔括諸郡金檄牒旁午琮持不下僚屬懼得罪琮曰郡不產金又歲儉可加賦乎

即有罪罪主議者不以累諸君也已詔罷不徵他郡先徵發者聞之皆媿丁母憂服除為

處州同知民有掘地得金沙中官欲請開礦琮爭之不得抗疏言其害得免考滿乞休增秩以江西參議致仕琮在處州彭澤方撫浙屬其邑子爲尉者殊不法琮按斥不貸彭反益賢琮其以郡貳進藩參彭爲吏部有力焉人兩賢之有戴縉者與琮同年同御史其後爲權璫所引琮遂與絕他日入都縉爲刑部尙書數過琮避不與見既歸益自嚴重郡守慕其名強與宴醉偶謾語琮恚曰吾本不見時人無事輕出乃爲後生所侮拂衣竟出自是雖周親密友無能窺其面者年七十九卒

乾隆志

施悌字天祿成化辛卯舉人湖廣永州同知有恩威嘗勘事郴州道遇猺賊問姓名從者欲更名應之悌曰正欲賊知我名何更也賊曰吾聞施公好官忍犯耶解散去擢宗人府經歷出守姚安姚安遠在滇南民獠錯處號稱難治悌開示恩信烝烝向化旋乞休疾作殞於姚安土官高鳳哭之哀獠人有乞衣冠留葬者

元和縣志 元和縣志 雍正三年始分置凡縣志所載人物在雍正以前者皆

入長洲

吳寬字原博以文行有聲諸生閒成化八年會試廷試皆第一授修撰侍孝宗東宮秩滿進右諭德孝宗卽位以舊學遷左庶子預修憲宗實錄進少詹事兼侍讀學士宏治八年擢

吏部右侍郎丁繼母憂吏部員缺命虛位待之服滿還任轉左改掌詹事府入東閣專典  
誥敕仍侍武宗東宮宦豎多不欲太子近儒臣數移事閒講讀寬率其僚上疏曰東宮講  
學寒暑風雨則止朔望令節則止一年不過數月一月不過數日一日不過數刻是進講  
之時少輟講之時多也豈容復以他事妨誦讀古人八歲就傅卽居宿於外欲離近習親  
正人耳庶民且然矧太子天下本哉帝嘉納之十六年進禮部尙書餘如故先是孝莊錢  
太后崩廷議孝肅周太后萬歲後並葬裕陵祔廟禮皆如嫡至是孝肅崩將祔廟帝終  
以並祔爲疑下禮官集議寬言魯頌閟宮春秋若仲子之宮皆別廟漢唐亦然會大臣亦  
多主別廟帝乃從之時詞臣望重者寬爲最謝遷次之遷旣入閣嘗爲劉健言欲引寬共  
政健固不從他日又曰吳公科第年齒聞望皆先於遷遷實自媿豈有私於吳公耶及遷  
引退舉寬自代亦不果用中外皆爲之惜而寬甚安之曰吾初望不及此也年七十數引  
疾輒慰留竟卒於官贈太子太保諡文定授長子爽中書舍人補次子奧國子生異數也  
寬行履高潔不爲激矯而自守以正於書無不讀詩文有典則兼工書法有田數頃常以  
周親故之貧者友人賀恩疾遷至邸旦夕視之恩死爲衣素一月

史明

文林字宗儒其先出湖廣武甯祖惠始家長洲父洪字公大成化乙酉舉於鄉屢試不第以  
會試副榜授涑水教諭三載致仕歸卒洪嘗求葬地術者指一舊冢曰得此必世貴其家  
亦願遷以售之洪斥不用林以成化壬辰登進士授永嘉知縣英敏果斷每聽訟縱人環  
觀剖決神異輒傳爲故事市舶太監兄弟鳴張爲民患以計擒禁之卒瘦死通水利毀淫  
祠丈量漏落田地以足糧額邑大治父喪歸補博平陞南京太僕寺丞馬政久弛吏驕不  
奉法林奏案其罪不少貸上馬策三篇兵部議行之會病乞歸凡六年溫人以前永嘉之  
政思得林甚卽家起爲溫州知府旣至首釋繫徒千人郡多盜訟俗尙鬼好溺女林悉爲  
科條處分又作俗範訓其民民益敬事無敢欺而林竟以病不起林學該博以經濟自負  
遇事敢言在博平疏論德府莊田宜付有司徵納上報可在溫州連上七疏皆賦役章程  
一疏以災異自劾求退而論鎮守劔民尤切又因入覲進聖政十事惜不竟其所施

乾隆志

徐源字仲山居長洲之瓜涇成化乙未進士授工部主事改兵部歷職方員外郎武選郎中  
絕權貴請屬時天下武功爵幾二十萬坐耗不貲源奏罷不當襲者冗濫一清出爲廣東  
參政方勦雲桂猺源督餉有功遷浙江右布政湖廣左布政弘治十四年擢右副都御史

巡撫山東歲饑與侍郎何鑑分行賑濟割臨清米八萬餘石補漕額明年將徵償源奏民  
方賴賑稍蘇而又遽徵與不賑何異詔悉蠲之已致仕歸源少事母孝母病日朝夕飶之  
不少倦積二年復明詩文博雅書法米氏

乾隆志

劉杲字世熙成化乙未進士授南京禮部主事轉刑部員外郎歷四川按察司僉事湖廣副  
使貴州按察使陝西右布政使轉江西左布政使尋乞致仕進右副都御史歸正德八年  
卒於家杲所至皆有聲其在湖廣朝廷用言官計括流民議遣戍邊所在洵洵杲亟白當  
道驗其文引久近生業有無以爲去留其恣肆者始案以法民心乃安爲布政入覲時逆  
瑾脅諸藩臬邀重賄杲獨斷斷不可人至今稱之

獻徵錄

陳璠字玉汝家陳湖成化戊戌進士選庶吉士時吳寬在翰林璠初與同硯席遂屈己師之  
爲古文詞不屑尋常熟爛語授兵科給事中歷刑科左妖僧繼曉既就逮法司擬以常刑  
璠與同官暴其罪遂伏法妖人王良惑衆通鹵奏令撫臣禁絕因請重天下社學以端蒙  
養則邪慝不興有中人擊尙寶官於朝劾之俱坐黜彭城伯張信爲幸臣所誣璠辨其非  
又劾甯陽侯陳輔諸不法事奪其爵歷大理寺左右丞左右少卿南京左僉都御史召還

理院事周府莊田與屯田相錯互爭不決璫往勘歸之府人多非之璫著屯田十二難以辨遷南京左副都御史兼管操江劇賊施天泰等擾海上璫引兵會巡撫魏紳不卽捕滅

第誘降其首而黨復熾爲言者所論遂致仕家居不一年卒

乾隆志

蔣廷貴字大用堂之後成化戊戌進士知樂亭縣爲政以惠愛爲先歲稔役煩請寬其賦六

七建州役興守以廷貴才委之督諸縣調輕重事無不舉以勞瘁卒於官其少時嘗爲諸

姬所擁遑絕裾去故見謂介子肅有異質早卒

王志堅府志稿

戴冠字章甫博學多識刻意爲古文辭負氣矜伉無所推與王恕撫吳時重之後以貢至京

恕適掌銓冠列上十事多所規切授山陰訓導考論著述不少怠初冠爲諸生紹興有爲

御史督學南畿者以文學自負冠嘗有所指摘御史銜之欲論黜而不果至是邂逅有言

不相下他日其人病死其家誣冠以爲恚而死也遂歸卒年七十一

王志堅府志稿

沈林字材美成化辛丑進士除晉州知州有善政時年未三十民呼小沈公擢南京刑部員

外郎歷郎中出爲順慶知府初至謁鎮守見其無禮不顧而出詢風俗清告訐重建府學

興文教遷雲南參政或傳安南舉兵將內向遠近恇攘林曰我無費彼何得內侵已而訖

無事入賀京師忤劉瑾落職瑾誅起爲廣西左布政使尋擢右副都御使巡撫貴州平鎮  
箠銅仁烏羅諸叛苗丁父艱歸服闋起撫山東以疾致仕初林在順慶以郡無城方鑿石  
量工會遷去後守至遂城之未幾藍面二寇亂蜀中所過殘破惟順慶以有城不能入民  
德之爲立生祠

王鏊  
志

浦應祥字有徵爲諸生有文譽成化丁酉舉於鄉歷高州同知王鏊修姑蘇志應祥多所撰

述

康熙  
志

朱存理字性甫少學制科謝去從杜瓊游自少至老未嘗一日忘學居恆無他過從惟聞人  
有異書必從訪求以必得爲志手自繕錄前輩詩文積百餘家既老不厭而精力不加又  
坐貧無以自資其書旋亦散去每撫之歎息卒於正德間年七十同里朱凱字堯民與存  
理齊名文徵明誌存理墓曰兩人皆不仕又不隨俗爲塵井小人之事日惟挾冊呻吟求  
昔人理言遺事而識之對客舉似如引繩貫珠纏纏不能休素皆高貲悉費以資其好不  
惜也成化宏治間其名奕奕於郡城之東人稱兩朱先生正德壬申堯民死明年性甫死  
自兩人死吳中故實無所考徵明又言吳有閩起山秀卿者家惟一僮日走從人家借書



手抄口吟日夜不休所獲學俸盡費爲書資家貧不能炊質衣以食而翫其書不忍棄竟以積勞得疾歿死

列朝詩集

邢參字麗文或云卽量之族孫也爲人沈靜有醞藉固而不陋嘉遯城市貧無恆業惟教授鄉里以著述自娛無所干請雖朋友之門亦不輕過客至或無茗盃薪火斷則冷食嘗遇大雪累日囊無粟儲人往視之乃苦吟誦所得佳句絕無慘慄色又連日雨復往視屋三角已墊怡然執書坐一角不滲者早歲喪妻不再娶優游以終

乾隆志

王錡字元禹家世力農吳人因其所居稱荻扁王氏錡幼孤母滕氏守節以教及長益好學徧覽經傳百氏尤熟於史法剛直對客談辨輒觸忤人有所見聞卽筆之不顧忌諱號寓園雜記所居臨湖彌望皆田堂宇靜深閒以嘉樹客至必款曲或扁舟出沒烟汀月渚閒賦詩寄興事母四十年未嘗一日去左右卒年六十八

吳寬表

趙同魯字與哲友秦孫偉軀幹志氣高邁涉獵羣書下筆輒數千言喜論當世事急人之難有裘巡檢者誣民爲盜同魯諭之百方不聽乃曰若解盜將安之於縣於府於院我必隨之裘乃止御史王某理軍籍吳不煖原齊民以足其數同魯爭之曰軍以衛民也今誣民

爲軍軍足民亡何益王爲霽威每遇饑歲則預陳拯濟方於郡邑有司辛丑大饑爲書上  
巡撫王恕言宋元時蘇郡歲入止二十四萬九千斛至國朝乃至二百六十二萬五千九  
百地昔之地也何加多如是今積雨爲害吳幾爲沼而徵科不止民其若之何恕賞其文  
許減稅且欲薦之不果年八十一卒

王整墓志

沈杰字良臣成化甲辰進士除歸德知州州當黃河之衝隨築隨決杰相度地形於城外五  
里許建長隄捍水樹以榆柳又開白柳等河河水由之入淮睢民始免墊溺歲饑民流作  
粥以飼老弱少壯再給行糧使歸耕仍給以子粒牛具戶口日增鄰邑有訟久不決立爲  
剖析稍遷右軍都督府經歷出知南雄府以憂不赴後補衢州衢多水田雨則溢晴則嘆  
杰大興水利濬陂池修堰開民田得灌溉而城中無漂溢之患孔氏嫡孫儕於齊民杰始  
命復其家疏於朝得世襲五經博士擢山西左參政進河南右布政使再以憂歸逆瑾亂  
政坐罰米二千六百石言官有不協者因疏以老疾杰不辨遂臥不起年七十一卒

蘇郡學志

蔡昂字惟中本姓顧其曾祖少孤從母適蔡遂襲蔡姓昂少孤貧通經學尤精法律成化甲  
辰以諸生貢入南雍尋歷南大理寺有盜發牛首山麓秦檜墓捕得法司議大辟昂獨建

議檜罪通於天今墓被盜發殆天降之罰耳請從末減寺卿躉之昂由此知名以明法除九江府推官多雪冤獄久之謝歸於宅西種蔬自給自稱西圃老翁嘗創修郡學志四卷

以姑蘇志尙有牴漏作補遺以貽王鏊雖老著述不倦卒年八十八

黃省曾志

陸完字全卿成化間進士由御史出爲江西按察使寧王宸濠雅重之拜兵部侍郎霸州賊劉六劉七奉楊虎起事詔完督軍討之敗賊於霸州信安及阜城賊復南陷山東縣二十北殘威縣新河完益發兵逐之擊斬二千餘人獲其魁朱諒錄功進右都御史時劉六等縱橫沂莒間楊虎陷宿遷邳壁及歸德州縣官兵追賊至小黃河渡口虎溺死餘賊奔河南推劉惠爲首有陳翰者與寧龍謀奉惠爲大元帥趙燧副之翰自爲長史與龍立東西二廠治事聚衆至十三萬惠燧擾河南劉六齊彥名等擾山東復北趨霸州帝召完赴援完督軍將擊破之文安賊至湯陰文追敗之復突霸州京師戒嚴別命都御史彭澤同咸寧伯仇鉞辦河南賊以畿輔山東賊委完完追敗賊於宋家莊於滕縣於登萊海套師次平度會河南賊平劉六等走漢口爲指揮滿弼追及六中矢赴水死劉七齊彥名率五百人舟行自黃州順流抵鎮江完疾趨而南帝命彭澤仇鉞會完軍進剿賊抵通州颶風大

作棄舟走保狼山完夜導軍登山蹙之彥名中槍死七中矢亦赴水死餘賊盡平進完太子少保左都御史廕子錦衣世百戶明年代何鑑爲兵部尙書完有才智急功名善交權勢劉暉許泰江彬皆其部將後並寵倖用事完遂得其力時宸濠已萌異志聞完爲兵部致書盛陳舊好欲復護衛及屯田完答書令以祖制爲辭宸濠遂遣人輦金帛巨萬徧遣用事貴人屬錢寧爲內主比奏下完遂爲覆請上並與之舉朝譁然十年改吏部尙書宸濠反就執中官張永至南昌搜其籍得完平日交通事上之帝大怒執完收其母妻子女將置極刑值武宗崩世宗立廷臣復讞以平賊功在八議之列減死戍福建靖海衛節馮志引

明史馮志案乾隆志曰完交通宸濠敗於宋路入固無足取然其平賊之功自不可沒王志堅稿不爲立傳節府志太略今悉係明史

周詔字希正父泰字景通正統戊午舉人知樂會縣海寇竊發泰鳩集武勇觸冒炎瘴賊賴以平而泰竟疽發背歿縣民奔走號泣爭願出地爲葬泰妻樓奉遣骸歸衆乃斂衣冠聚土爲冢歲時祀之詔舉成化庚子鄉試授嘉祥教諭九載考績入京睿宗之國選爲伴讀遷紀善詔以國事草創宜有典則以垂後世乃本祖訓及中庸九經之旨爲書萬言以進多見採納丁內艱服闋睿宗爲請仍舊職食長史俸詔感知遇因事納忠言多切直睿宗

喜榜書君子懷德及諸詩賜之迨事世宗每進講古義附時事爲勸上爲悚聽及入嗣大  
統擢少詹事兼侍讀尋以病辭不允進太常卿是冬卒年八十贈禮部侍郎廕其子孫

王志

堅府志稿

文森字宗嚴林異母弟成化丁未進士授慶雲知縣歲大旱上疏乞免田租戶部以無撫按  
奏不報再疏語加切卒免其半一切力役皆以民饑力爭於上官得減境故高舊無渠堰  
民視雨澤以田遇旱則束手待槁森教民鑿塘蓄水以備旱滄州每役縣民民苦之森曰  
縣雖隸州然各有分土州安得擾縣民白於監司罷之內艱歸復補鄆城縣縣有德府莊  
田官校因而虐民森言於監司爲征取貯縣俾官校自取民得無擾慶雲與鄆皆多盜森  
所至置民兵分曹巡捕而高其賞格盜發境內無脫者召拜御史會吏部尙書缺大臣有  
夤緣求進者森疏論之因舉劉大夏周經或以爲非所宜言下詔獄上知其直答而不問  
正德中逆瑾用事例致仕瑾誅起故官陞南京太僕少卿十一年擢右僉都御史巡撫南  
贛以疾乞休兵部尙書王瓊劾其託疾罷歸又十餘年而卒

王志堅府志稿

吳一鵬字南夫宏治六年進士選庶吉士授編修正德初進侍講充經筵講官劉瑾出諸翰

皇林爲部曹一鵬得南京刑部員外郎中瑾誅復爲侍講進侍講學士歷國子祭酒太常卿  
並在南京母喪除起故官世宗踐阼名拜禮部右侍郎尋轉左數與尙書毛澄汪俊力爭  
大禮俊去國一鵬署部事而帝趣建獻帝廟甚亟一鵬集廷臣上議曰前世入繼之君閒  
有爲本生立廟園陵及京師者第歲時遣官致祀尋亦奏罷然猶見非常時取議後代若  
立廟大內而親享之從古以來未有也臣等寧得罪陛下不欲陛下失禮於天下後世今  
張璠桂萼欲改稱孝宗爲皇伯考肆言無忌乞速罷建室之議立廟安陸下璠萼等法司  
按治帝不從頃之一鵬極陳四方災異言自去年迄今非常之變倍於往時願陛下率先  
臣工救疾苦罷營繕信大臣納忠諫用回天意詔報之踰月手敕名奉先殿西室爲  
觀德殿遂命一鵬偕中官賴義京山侯崔元迎獻帝神主於安陸一鵬等復上言歷考前  
史並無自寢園迎主入大內者此天下後世觀瞻所係非細故也且安陸爲恭穆啓封之  
疆神靈所戀又陛下龍興之地王氣所鍾故我太祖重中都太宗重留都皆以王業所基  
永修世祀伏乞陛下俯納羣言改題神主奉安故宮爲百世不遷其觀德殿中別設神位  
香几以慰孝思則本生之情既隆正統之義亦盡奏入不納一鵬乃行慮使者爲道途患

疏請禁約帝善其言而戒飭之比還朝則廷臣已伏闕哭爭朝事大變而給事中陳洸譴張尤甚一鵬抗疏曰大禮之議斷自聖心正統本生昭然不紊而洸妄謂陛下誕生於孝宗歿後三年嗣位於武宗歿後二月無從授受其說尤爲不經洸本小人不痛加懲艾無以杜效尤之漸不聽其年九月以本官入內閣專典誥敕兼掌詹事府事武宗實錄成進尙書加太子少保居二年致仕卒贈太子太保諡文端明史子子孝字純叔嘉靖八年進士由庶吉士改台州推官選廣平通判歷南吏部主事乞終養歸後補禮部主事陞光祿寺丞出爲湖廣參議坐計典子子孝穎敏絕倫博覽文籍爲文章典則雅馴嘗欲重修宋史未就而卒

王志  
堅傳

沈燾字良德杰弟弘治六年進士入翰林十六年詔修本革命爲總裁有姦人劉文泰結司禮監張瑜掌醫院通政施欽等謀誦名編纂倖進燾恥與爲伍疏辭十八年冬與修孝宗實錄正德元年冊封安南國王充正使悉卻餽遺南人歎服還朝累遷右春坊右諭德卒

縣志

皇甫錄字世庸祖通好爲德於里錄登弘治丙辰進士授都水主事改禮部歷儀制郎中逆

文瑾用事欲私進譯字生不可又欲借河泊稅隨請改印文又不可出爲順慶知府時藍鄢寇起蔓延全蜀錄預爲設備卒以全郡然竟以被劾歸有別業在虎丘之旁因號近峯日以著述游覽爲事尤善教子四子相繼登科而錄夫婦偕老優游祿養歸時四十五又二十六六年而卒弟銖字世鳴幼精舉子業十試不售貢入太學授惠州府推官恩威並施民夷悅服績最著上官不悅檄送吏部遂歸家有亭沼花竹日與賓客以詩酒爲樂有詩文

二百餘首藏於家

王志堅府志稿

祝允明字希顥孫弘治五年舉於鄉久之不第授廣東興甯知縣捕戮盜魁三十餘邑以

無警稍遷應天通判謝病歸嘉靖五年卒允明生而枝指故自號枝山又號枝指生五歲作徑尺字九歲能詩稍長博覽羣集文章有奇氣當筵疾書思若湧泉尤工書法名動海內好酒色六博善新聲求文及書者踵至多賄妓掩得之惡禮法士亦不問生產有所入輒召客豪飲費盡乃已或分與持去不留一錢晚益困每出追呼索逋者相隨於後允明益自喜子續正德中進士仕至廣西布政使

明史

錢貴字元抑弘治戊午鄉薦選太常寺典簿時太常方用羽流爲卿貴上言秩宗之任典司



禮樂統和神人不宜以異類參時論臆之嘉靖初論劾中官蕭敬貪饕不法又集王振曹  
吉祥劉瑾事著三患傳上之大禮議起貴因明職掌籩豆之數乘閒論列會議禮者皆得  
罪遂乞致仕進鴻臚寺丞歸時年甫艾卽所居旁穿冢治木以待盡月舉善族會會必申  
以禮法或有緩急極力拯之忘其家之貧也貴學務綜博文詞爾雅旣官中朝與應良鄒  
守益諸人游始從事於性命老退林下益集諸生講明其說

姑蘇名  
賢小紀

查應兆字瑞徵正德辛巳進士除工部主事權浙江木稅時鎮守中官方倨侮應兆適偕二  
御史同報謁中官將據上坐笑引卻之曰公眞耄耶何忘主客禮中官無以答卒讓席尙  
書林俊以忤中官被逐應兆疏請召還俊等遷兵部郎中出爲山東參議轉餉遼東實邊  
儲修守械將校冒首功腴削其下者皆以法繩之遷淮徐兵備副使獄有久冤者一訊得  
其情立釋之擢河南布政使帝幸奉天次衛輝行宮火吏多被逮兵部尙書王廷相薦應  
兆才俾專辦供張歲大饑命尙書王杲以帑金往賑杲檄應兆監其事全活甚衆未幾謝  
卒

劉鳳  
志

文徵明初名璧以字行更字徵仲別號衡山父林爲溫州知府卒於官吏民釀千金爲賻徵

明年十六悉郤之吏民修故郤金亭以配前守何文淵而記其事徵明幼不慧稍長穎異挺發學文於吳寬學書於李應禎學畫於沈周皆父友也又與祝允明唐寅徐禎卿輩相切磨名日益著其爲人和而介巡撫劾諫欲遺之金指所衣藍衫謂曰敝至此耶徵明佯不喻曰遭雨敝耳諫竟不敢言遺金事寧王宸濠慕其名貽書幣聘之辭病不赴正德末巡撫李充嗣薦之會徵明亦以歲貢生詣吏部試奏授翰林院待詔世宗立預修武宗實錄侍經筵歲時頒賜與諸詞臣齒而是時專尚科目徵明意不自得連歲乞歸先是林知溫州識張璁諸生中璁既得勢諷徵明附之辭不就楊一清召入輔政徵明見獨後亟謂曰子不知乃翁與吾友耶徵明正色曰先君某不肖三十餘年苟一字及者弗敢忘實不知相公與先君友也一清有慙色尋與璁謀欲徙徵明官徵明乞歸益力乃致仕四方乞詩文書畫者接踵於道而富貴人不易得片楮尤不肯與王府及中人曰此法所禁也周徽諸王以寶玩爲贈不啓封而還之外國使者道吳門望里肅拜以不獲見爲恨文筆徧天下門下士贗作者頗多徵明亦不禁嘉靖三十八年卒年九十矣長子彭字壽承國子博士次子嘉字休承和州學正並能詩工書畫篆刻世其家

(王世貞吳中住哲傳)彭號三橋善正行草書尤工古隸以

諸生久次貢授秀水訓導擢南京國子助教時七十餘矣為人敦直坦易取予皆稱心而受不爲飾讓卒年七十六嘉書不能如兄工而畫得待詔一體鑒賞古跡亦相埒以貢授烏程訓導擢和州學正老矣乃乞歸卒年八十三(舊府志)彭又善篆印逼真漢人嘉爲吉水訓導導時識鄒元標於童子中薦補弟子員嘉子元善亦能詩畫曲盡孝養性好施與

年僅三卒彭孫震孟自有傳吳中自吳寬王鏊以文章領袖館閣一時名士沈周祝允明輩

與並馳騁文風極盛徵明及蔡羽黃省曾袁表皇甫冲兄弟稍後出而徵明主風雅數十年與之游者王寵陸師道陳道復王穀祥彭年周天球錢穀之屬亦皆以詞翰名於世

史明

王庭字直夫家貧教授以養初舉鄉試赴公車念親老不及至都而返父旋卒時謂能孝嘉

靖癸未第進士知許州以母老改國子博士歷南禮部刑部郎官福建僉事乞終養母卒擢江西參議以禱雨暴烈日中得疾疾遽謝歸庭性恬退少宦情然吏事實精敏許有殺人而不得主名者庭禱於神明日果得殺人者嘗鞠一劇賊未服庭廉得其同飲食者隔別訊之遂伏建寧礦賊聚衆至千人戕本府同知庭密捕其黨一人與爲約遂擒其魁壽甯地險民黠監司未有至者犬猾數人常持吏短長庭冒險入縣捕數人者寘之法其歸也年甫五十六與文徵明王穀祥陸師道日從事山水觴咏閒故人門生按部於吳者知其貧欲資助之艱然而辭人有過推惡聞卒年八十四初庭父頤好行陰德所瘞道殮不

可數計嘗以貢計偕有同人失錢二千意頗私之頗絕口不辨但曰緩償之已而知爲家  
人所盜也同舟愧服頤亦湛然不較

英供  
愈傳

陸燾字子餘少謁同里王鏊鏊異之曰此子必以文名天下嘉靖五年成進士選庶吉士七  
試皆第一張璫桂萼盡出庶吉士爲部曹縣令燾以才獨得工科給事中勁挺敢言疏言  
我朝太祖至宣宗大臣造膝陳謀不啻家人父子自英宗幼冲大臣爲權宜計常朝奏事  
先日擬旨其餘政事具疏封進沿襲至今今陛下銳意圖治願每日朝罷退御便殿延見  
大臣侍從臺諫輪日奏對撫按藩臬廷辭入謝召訪便宜復妙選博聞有道之士更番入  
直講論經史如仁宗宏文閣故事則上下情通而天下事畢陳於前矣帝不能用旣言資  
格獨重進士致貢舉無上進階州縣教職過輕王官終身禁錮皆宜變通因陳久任使慎  
考察汰冗官諸事而終之以復制科倣唐宋法數歲一舉以待異才高者儲之禁近其次  
分寘諸曹先有官者遞進庶人才畢出野無遺賢尋偕御史郝元洪清覈馬房錢穀抗疏  
折御馬太監閻洪宿弊爲清與同官劉希簡爭張福達獄帝怒俱下詔獄杖三十釋還職  
張璫桂萼並居政府專擅朝事燾不勝憤上疏曰璫萼克險之資乖僻之學曩自小臣贊

大禮拔置近侍不三四年位至宰弼恩隆寵異振古未聞乃敢罔上逞私專權招賄擅作威福報復恩仇璫狼復自用執拘多私萼外若寬迂中實深刻伎忍之毒一發於心如蝮蛇猛獸犯者必死臣請姑舉數端言之萼受尙書王瓊賂遺鉅萬連章力薦璫從中主之遂得起用昌化伯邵杰本邵氏養子萼納重賄竟使奴隸小人濫襲伯爵萼所厚醫官李夢鶴假託進書夤緣受職居室相鄰中開便戶往來常與萼家人吳從周等居閒又引鄉人周時望爲選郎交通鬻爵時望既去胡森代之森與主事楊麟王激又輔臣鄉里親戚也銓司要地盡布私人典選僅踰年引用鄉故不可悉數如致仕尙書劉麟其中表親也侍郎嚴嵩其子之師也今都御史李如圭由按察使一轉徑入內臺南京太僕少卿夏尙朴由知府期月遂得清卿禮部員外張敵假歷律而結知御史戴金承風搏擊甘心鷹犬皆萼姻黨相與朋比爲奸者也禮部尙書李時柔和善逢狡猾多智南京禮部尙書黃綰曲學阿世虛談眩人諭德彭澤夤緣改秩躡玷清華皆陰厚於璫而陽附於萼者也璫等威權旣盛黨與復多天下畏惡莫敢訟言不亟去之凶人之性不移將來必爲社稷患帝大感悟立下詔暴璫萼罪狀罷其相而以燾不早發下之吏旣而詹事霍韜力詆燾謂楊

一清曠之帝竟納韜言召璫還奪一清官謫粲貴州都鎮驛丞稍遷永新知縣前後獲盜數百人姦猾并跡久之以念母乞歸論薦者三十餘疏皆報罷霍韜亦薦粲粲曰天下事大壞儉人手尙欲以餘波汚我耶母歿喪甚未終喪而卒

明史(王志堅)府志(稿)粲弟采字子元少讀書不屑章句從婦翁

都穆學古文詞於文喜六代詩宗盛唐晚好謝康樂造語往往似之時爲近體樂府亦蘊藉可喜爲諸生累試不利卒

俞國振字終玉號萬谿少穎敏有遠志師事錢貴銳意於學汎濫經史百家文詞蠶涌援筆數千言立就已從魏校游聞辨志之說又從鄒守益聞良知之學遠近來學者甚衆以貢選袁州府學訓導日課諸生以經術行業相切劘袁人士重國振他學官忌之遂免歸貧居吟誦不輟一日夢道士索烟霞二十斛求寄兩股閒驚寤曰吾將逝矣閱二日竟卒國

振平居喜論當世事以經濟自負

王志堅府志稿

錢同愛字孔周祖瑛見藝術同愛博學好結納先與唐寅徐楨卿文徵明善唐徐既歿又與王寵湯珍游好時日不見輒奔走相覓見則文酒談笑評騭古今或書所爲詩文相討質性喜書每併金懸購所積甚厚爲文奇崛深奧尤長尺牘浮沈諸生者二十年遂自免卒

文徵明誌其墓

王志堅府志稿

王渙字渙文正德己卯舉於鄉授嘉興府通判改東川軍民府未上而卒渙博綜羣集鑄詞多不經人道少與文徵明齊名吳俗祀神必祝云生子當如陸南王渙文徵明南亦吳人

與渙同舉於鄉者渙尤攻古賦得漢魏遺意詩宗白傅晚喜陸放翁范石湖

乾隆志

湯珍字子重本嘉定人徙長洲之碧鳳里爲郡諸生有名博綜羣籍以貢入太學謁選時或勸爲之地謝不往得崇德縣丞一以平易爲治嘗一再攝縣不加咎責而事自辦民愛之稱爲佛子而上官顧以爲遲頓竟以罷官歸珍爲文富瞻典則尤長於詩與文徵明蔡羽王寵兄弟友善彭年及徵明子彭嘉俱師事焉既歸治別業虎邱之側讀書著文以老

卒年六十六

文徵明誌

皇甫洵字子安父錄

前傳見

生四子冲洵沆洵同登嘉靖七年鄉薦明年沆第進士又三

年洵第進士又十三年洵亦第進士而冲尙爲舉子兄弟並好學工詩稱皇甫四傑冲字

子浚善騎射好談兵遇南北內訌譟幾策兵統枕戈雜言三書凡數十萬言洵初授工部

主事改禮部歷儀制員外郎主客郎中在儀制時夏言爲尙書連疏請建儲皆洵起草故

言深知洵才比簡宮僚遂用爲春坊司直兼翰林檢討言者論洵改官有私謫廣平通判

量移南京刑部主事進員外郎遷浙江僉事大計京官以南曹事論罷邑邑發病卒淳沈  
靜寡與自負高俊稍不當意終日相對無一言居官砥廉隅然頗操切多忤物故數被讒  
謗云沆字子循七歲能詩官工部主事名動公卿沾沾自喜用是貶秩爲黃州推官屢遷  
南京稽勳郎中再貶開州同知量移處州府同知擢雲南僉事以計典論黜沆和易近聲  
色好狎游於兄弟中最老壽年八十乃卒濂字子約初授工部主事母喪除起故官典惜  
薪廠賈人僞增數罔利濂按其罪賈人女爲尚書文明妾明召濂切責之濂抗言曰公掌  
邦政縱姦人干紀又欲奪郎官法守耶明爲斂容謝大計謫河南布政司理問終興化同  
知濂兄弟與黃魯曾省曾爲中表兄弟文藻亦相似

史明

王懋明字僅初早歲英爽讀書經目輒誦哀撮舊聞多所撰述人稱爲經笥爲學士華察所  
知僑居錫山時以察與懋明及施漸姚咨爲錫山四友

列朝詩集

彭年字孔嘉父昉正德辛未進士知新會縣以不阿上官去家益落年性穎異嗜讀書所讀  
多六經諸子史兩漢古金石言而不喜習舉子業爲文章工詳映尤長記傳頌誅詩宗盛  
唐旁及香山郢州精法書宗顏歐知府王庭薦年孝廉上提學徵入府學而歲廩之已又



檄應鄉試之南都登鍾山望大江而返卒不請廩曰此天子所養士以需異日用者吾安得食之無何竟請於後御史以免所交皆賢豪長者然不肯一言干乞餽遺雖升斗粟非文字交峻辭若浼卒以貧死卒之前能預爲日至日炷香以測晷且盡曰未也更炷至半

曰是矣遂翛然而逝

乾隆志

王穀祥字祿之家世名醫

藝術盛寅傳附其師王賓事云賓無子故以授寅賓本傳亦言賓不娶而長洲縣志有王觀傳稱觀爲賓曾孫穀祥之父爲醫多奇

效穀祥始讀書性穎敏美姿容善書畫屬古文詞嘉靖己丑成進士選庶吉士改工部主

事調考功進文選員外郎中司選事尚書汪鋈秉銓不公穀祥持法不阿因數與忤意忽忽不樂念母老乞歸養而其兄故在鋈用例格之謫真定通判遂歸養母幾三十年持身峻潔不妄交一人手錄古文籍至數百千卷成精好不忍觸手以詞翰徵者輒不應杜門卻掃焚香而坐一室之內琳琅金薤謚如也李默爲吏部尚書奏起之穀祥不赴最後徐階當國起補南選部復不赴或勸駕者穀祥笑曰豈有青年解綬白首彈冠者乎卒

年六十七

姑蘇名賢小紀

顧存仁字伯剛其先太倉人父啓明徙長洲存仁登嘉靖壬辰進士授餘姚知縣餘姚多豪

黠吏存仁初至若無能者已得其出沒狀一日召數吏數之曰某弊由某某舞某法立改之否者非死卽戍矣諸吏咸股慄夙蠶爲掃每均役先計邑歲所需有成則而始按丁盈縮之卒無浮入者縣有三老知經賦而屬之不能無所私存仁若弗屬也朔旦大會猝召三老爲我第賦長上下三老出不意吐實卽令賦長前受牒去無譁者入爲禮科給事中會蜀王與都指揮劉永昌相詰奏永昌故黠又武定侯郭勛私人存仁奉敕往勘盡得其實竟抵永昌罪還疏陳五事首言宜廣曠蕩恩赦楊慎馬錄馮恩呂經等末言敗俗傷農莫甚釋氏葉凝秀何人而敢乞度帝方崇道家言凝秀道士也帝以爲刺已且惡其欲釋楊慎等遂責存仁妄指凝秀爲釋氏廷杖之六十編管保安州三年聞母病請執政暫歸得視含殮自此往來塞上幾三十年隆慶元年召爲南京通政參議尋遷順天府丞再遷大理少卿進太僕卿存仁自流人起不二年至九列感上恩條論時事皆可見施行又請重太僕丞選及論馬政之弊於是聘寺丞歸有光草寺志而身經理其凡書成上疏乞歸許之存仁爲人敦謹重然諾好行義嘗捐田六百畝置義莊以贍族卒年七十予祭葬如

顧元慶字大有家近澹市兄弟多織膏治產元慶獨以圖書自娛自經史以至叢說多所纂述所居曰顧家青山在大石左麓山中有勝跡八自爲之記名其堂曰夷白藏書萬卷擇

其善本刻之署曰陽山顧氏文房王穉登往訪之時年七十五猶吟對不倦

列朝詩集

岳岱字東伯先世以軍功隸蘇州衛至其父始好讀書闢草堂於陽山花木翳然修竹萬挺

岱結廬其中自稱秦餘山人又以系出相臺號漳餘子中年出游恆岱諸嶽泛大江覽留都名勝訪豐坊於四明歷覽天姥天台鴈宕武夷匡廬而返遂不復出性狷介不妄與人

交能詩善畫嘗采時人詩爲金雨瑤華集傳於世

列朝詩集

居節字士貞少從文徵明游學其書畫徵明之門人未能或先也家故隸織局織監孫隆聞其名召見不肯往孫怒坐以逋帑拘繫破家儻居半塘數椽蕭然所與交多山人衲子落

落寡諧每過辰未舉火吟嘯自若也年六十以窮死

列朝詩集

金世龍字孟陽嘉靖辛丑成進士授嚴州府推官歸乘車張蓋持蓋者誤觸諸生卽下車引咎自此終身不乘車秩滿遷大理評事陞四川僉事貴州參議湖廣副使所在以廉謹聞自謂早登第有官守不得精研六經之旨因乞致仕歸歸而家無一椽下榻蕭寺閉戶攻

苦不交一客考索經文奧旨而精思之窮日夜不厭日食饊一二片腐湯一杯而已給事  
蒼頭都無一人蕭然如苦行僧有呂季不知其名責以踐更卽倩人往役宰後聞之慙急  
叩門請罪弗應也郡守王公雅慕其名三造請其廬曰是不可爲泄柳矣開戶入守索衣  
冠不得假於人始出迎語及刑政得失豐贖中綵王退而歎曰吾始慕金先生清德足爲  
鴻羽不知其經緯條暢又龍變如此年八十四乃歿歿時謂其子曰吾雖貧生平不假人  
一錢惟張幼于書一篋讀覽未徧猶在牀頭可亟返之

乾隆

陸宏字汝充嘉靖癸卯舉人隆慶閒知平和縣革舊例除火耗一絲一粟未嘗取於民以憂

去行李蕭然

福建通志

劉鳳字子威鉉族孫生時母夢白鳳集於房故以爲名登嘉靖甲辰進士授中書舍人選御  
史中考功法從謫籍沿牒至廣東僉事又補河南僉事被論歸遂一意著述終其身年八  
十四其文頗奧勁自爲一家晚好禪旨自云悔其宿習

王志堅府志稿

徐勳嘉靖閒以任子知永安縣清慎有才察民欲惡與爲興廢時有龔渤海之稱卒於官

福建

通志

許文獻嘉靖間知永定縣俗多人命誣陷之案文獻痛革之俗遂變山賊溫祖謀逆計擒之

民賴以安

福建通志

張勉學字益甫嘉靖丁未進士選庶吉士改吏科給事中疏駁方士陶仲文不當封爵忤旨奪俸二十九年俺答入寇後奉敕勘邊躬歷薊鎮覈傷殘之數上聞併論仇鸞濫殺冒功鸞銜之被誣謫內黃丞遷吉安推官擢南京刑部主事轉郎中陞湖廣荊岳道僉事長沙大盜李萬克聚黨為亂以計擒之藩府莊田房租稅重豪奴倍收沒人子女為奴婢勉學悉平其額歲聽縣官徵解民便之進參議分守衡永先是道臣所鎮地無城每山水溢民登高以避勉學檄郡縣發公帑鳩工築城工始竣而水又至民有甯宇名其城曰永安會有修卻者蜚語中傷解任歸林居十餘年

乾隆志

郭仁字子靜嘉靖丁未進士官御史時俺答犯京師兵部尚書孫應奎以兵餉不給建議加

派蘇州派銀八萬五千兩仁詣應奎請減不從遂劾奏其罪應奎疏辨

明史孫應奎傳

仁謫官福

建永安知縣在縣核糧冊杜飛詭汰冗甲冗費擢刑部主事

福建通志

劉畿字子京號羽泉鉉曾孫嘉靖二十九年進士除知瑞安縣以九等別戶產以九則定徭

役邑人便之俄島寇犯黃巖去邑尙遠畿趣徙旁地子女貨賄納內城而增其雉堞儲糧  
振募兵壯爲守備月餘寇果至無所得乃遁去復募壯士並邑中子弟教之爲陸陣遏賊  
於飛雲江又殲賊銅嶺入爲吏科終事中進通政司參議陞太僕卿遷順天府尹彈射豪  
貴無所避以築張家灣城功進右副都御史巡撫兩浙時礦賊起婺源流劫德興玉山遂  
犯常山勢張甚畿疏請會直隸江西兵會勦先發所部兵由衢州分三道入大破之俘斬  
勁賊七百餘悉解散初疏上陞畿兵部右侍郎總督三省軍務會賊已平而止尋遷南京

兵部侍郎以疾乞歸卒

王世貞  
神道碑

邱宏更名鵬字志宏嘉靖二十九年進士由行人歷吏部主事戶部員外郎在吏部尙書李  
默欲大用之宏以默嚴嵩私人不爲用故仕不顯八歲時嘗隨父謁楊潛潛問何名曰名  
宏潛曰試以名作一破題應曰姓同聖人之名名同聖人之德潛曰圭璋器也及長通五  
經尤邃於易無子身後事皆弟子金應徵經紀之歲時祭祀惟謹有著述必援引邱先生

云

縣志

楊成字汝大嘉靖丙辰進士授工部營繕主事遷都水郎中出爲浙江副使轉四川參政蜀

王故貴倨監司見王恭謹踰節成據禮爭之復按王所侵山林陂田悉還之民累遷廣西左布政使府江用師成調畫軍需不趣而辦入覲京師吏請以羨金治裝成不受擢應天府尹尋進右副都御史巡撫江西時久旱成至禱雨隨澍仍飭有司發粟賑民溢城昭武閒歲常苦潦成度地形剽築堤堰蓄洩兼施鑿支港以殺水勢水患遂除巨盜楊鳳鸞李大鸞等蔓延江楚成會楚撫夾勦擒其魁復以計平積盜葉隆盛等轉工部侍郎進南京兵部尚書轉禮部乞骸骨歸尋起南京吏部尚書改兵部時神宗久不視朝儲位未定罪奄張鯨夤緣思復用成借帝九卿上疏請御朝講建儲位斥罪奄語極剴切年七十力求去加太子少保致仕卒年八十諡莊簡

乾隆志

宋純仁字孝甫嘉靖己酉舉於鄉隆慶五年除武岡知州大豪文廷源因姦殺人而滅其屍獄久不決純仁廉得其狀寘之法時稱神明築濟水石防五百丈以遏泛溢建石梁其上以通行旅潭谿蠻仇亮寨與五開蠻相攻黎平守被執道路阻絕巡按御史檄純仁偕官兵進勦遂擒其魁在州四年以最遷九江府同知郡濱江帶湖爲盜藪純仁選豪敢爲邏卒令乘舩晝夜督巡盜多就擒又繕治城陣建澄江樓增置戰艦清釐九江衛屯田得

豪猾隱占者十四萬餘畝歸之衛卒以充軍食郡境沿江諸田歲苦衝齧純仁請於撫按於桑落洲築隄八千餘丈植柳四萬餘株又鑿宿松渠六百丈洩積潦入湖陂自是歲獲

豐收遷南京刑部郎中致仕歸

蔣夢龍宋濂川墓誌

郭諫臣字子忠嘉靖壬戌進士授袁州推官時嚴嵩方罷其子世蕃當戍雷州留家不赴潛與其黨羅龍文往來計事諫臣廉得其狀以告巡江御史林潤潤馳疏以聞世蕃由此伏誅擢吏部主事遷員外郎中官殿御史闕不抗疏請正其罪前後奏疏數十餘轉郎中出為江西參政累擢鄖陽巡撫未任卒

乾隆志

張鳳翼字伯起曾祖景字景春好讀書著吳中人物志祖準以心計起家父沖賈而俠皆有聞於時鳳翼生五齡猶不言一日見大父掃除遽謂姆汝當代掃聞者異之稍長日益開敏補諸生已入太學皆屈其曹嘉靖甲子舉於鄉四上春官報罷遂棄去讀書養母杜門不出以終其身家本素封以不事生產日落乃鬻書自給性至孝童子時父怒捽其髮遽曰徐之是有簪末銳懼傷大人手父意遂解母年九十餘卒鳳翼年七十一鬚髮一夕盡白卒年八十七初鳳翼與弟獻翼燕翼並有才名吳人以比皇甫氏兄弟曰前有四皇



後有三張獻翼字幼于一名枚年十六以詩贊文徵明徵明語其徒陸子傳曰吾與子俱弗如也入貲爲國學生祭酒姜寶停車造門歸而與皇甫汈黃姬水徐緯刻意爲詩於是三張之名獨獻翼藉甚獻翼好易十年中箋注凡三易好游大人狎聲妓以通隱自擬晚年與王穉爭名不能勝頽然自放與所善張生孝資行越禮任誕之事年七十餘攜妓居荒圃中盜逾垣殺之燕翼字叔貽亦有文與鳳翼同舉於鄉早卒

乾隆志

金應徵字懋德家貧刻意勵學嘉靖甲子乙丑聯捷除奉新縣縣傍山無城郭出俸金興築歲大旱他邑雩禱多不應懋徵徒跣走禱雨大沛奉新獨有秋設學田立文社以勸士先是鄰邑有大豪陷人於獄應徵得情立出之有權貴道邑中希厚賄堅持不與以最陞刑部主事有中貴請正色拒之閱獄見囚著械凍瘃墮指命得用襪大司寇受詔修明律例久而未定屬應徵定焉歷官員外郎郎中恤刑兩浙時張居正當國尙操切應徵列上矜疑狀竟得俞旨浙人至今尸祝之居正常言於朝曰做官當如金刑部也外艱服闋補工部郎中以幹理稱當國者示風旨於其鄉人將拔置卿寺力辭補外兵備贛南赤白丸爲寇相機宜搗其穴長寧民有倡亂者或請發兵捕之應徵曰此屬皆迫於飢寒素無教化

所致諭以順逆皆投戈降檄屬郡邑修葺學宮重新濂洛書院又念奉新城庫捐俸增築未幾寇變奉新賴以完人尤感之陞雲南參政往事兵餉川貴協辦時當事以桑梓故曲爲護庇滇民憤應徵爭之不得鬱鬱成疾請告歸卒年五十六祀奉新名宦

康熙志

蔣育馨字明琅原名茂才隆慶丁卯舉人授福建清流知縣繕城隍清浮糧理學校俗多蠱親捕其魁置之法並施治蠱藥民女多遲嫁令女二十弗嫁重治其父母一夕遣嫁數千人民尸祝調汀州歸賜卹鄉里崇祀鄉賢祠

吳門表隱

韓世能字存良隆慶戊辰進士選庶吉士時同館三十人世能爲之長館師趙貞吉意不可一世獨目之曰韓存良佛地位中人也授編修與修世宗穆宗實錄陞修撰充經筵日講官歷侍讀祭酒南京禮部侍郎丁父憂時年已六十以哀毀病怔忡服闋召爲禮部右侍郎教習己丑科庶吉士館閣文字是科爲最盛轉左侍郎尋以疾乞歸卒年七十一世能恬於榮利嘗奉使朝鮮冊封楚藩餽遺一無所受生平持論以孝弟爲本課子必令先讀小學嘗自言無一事無一語不實而亦不務矯抗以博聲譽

乾隆志

湯聘尹字國衡隆慶戊辰進士嘗爲浙江仙居令爲治務節冗費并里甲興水利

浙江通志

又嘗

知江西進賢縣先是糧差析爲二糧輸官差則隨事分派於民富者至破產聘尹至用一條鞭法百姓戴之賑饑修學雅多善政

江西通志

顧其志字太冲父汝玉能詩其志登隆慶辛未進士授長興知縣遷南昌府同知晉工部員外郎出爲荊南道副使轉陝西參政疇拜反其志聞變疾馳詣督府言靈武要地無爲賊所得請以身當之比至賊所鹵騎充斥近郊城中守衛單弱指揮吳世顯者故降鹵與拜有約謀以城叛軍中數夜驚其志日夕治軍餉勉將吏以忠義士氣稍奮遂以計斬世顯靈州以安同事忌之調廣西賊平以功進按察使丁外艱起補山西歷山東右布政陝西左布政擢右副都御史巡撫其地稅監梁永貪橫不法咸陽知縣宋時際咸寧知縣滿朝薦持之急永誣時際朝薦劫稅銀帝命逮時際鐫朝薦級其志上疏極論永貪殘狀且言秦民萬衆共圖殺永乃釋時際復朝薦官己永誣奏朝薦劫奪上供物殺人投屍河中朝薦被逮秦民益洶洶其志諭安之而連疏救朝薦會永撤還關中始靖其志在鎮久能甄別將吏奏築永泰鎮虜二城募民屯種遂成巨鎮以功加兵部侍郎擢總督三邊軍務進南京兵部尙書卒贈太子太保

隆志

丁元復字仲心年十二補諸生隆慶五年進士除陽信令勸農桑省徭役催科聽斷具有規程修敬一亭以崇文教召拜南京御史首勸講學請停織造故事鹽艘集龍江關行萬金賄先發元復峻却之召諸商以次受符廉聲大震張居正奪情或勸疏留元復曰衆欲做官我亦欲做人不能爲宰相作私人也居正怒出爲四川僉事清驛傳簡兵役犂然就綱紀遷浙江參議分守溫處因病乞歸林居三十年民間疾苦如吳長二邑門攤銀外復有家資名色言於巡撫革除之地字三四圖苦重役請按院併二爲一衆皆歡忭卒祀陽信名宦清乾隆八年祀鄉賢建專祠於郡城東子文起郡學生次子文美

同治府志

顧九思字與睿長洲下堡人隆慶辛未進士除豐城知縣縣故難治有三不在之謠謂吏不在舍卷不在廊囚不在獄也九思清出乾沒官銀造廬舍以棲吏建廊廡以署牘築圉圉以居囚嚴禁黠徒之包攬稅糧者革耗羨寬程限使鄉民詣縣自輸姦弊無所容縣之長安鄉素稱盜藪悉倚大俠爲囊橐九思偵知通賊者爲鄉三老召至諭以禍福使誘入其家遂擒其魁誅之而散其黨四境晏然以治行第一擢戶科給事中歷禮兵都給事中條奏皆關軍國大計陞太僕少卿改南太常遷右通政謝病歸

乾隆志

何萬鍾字世錄其先景陵人世襲蘇州衛指揮使萬鍾中武會試掌衛事振刷戎政爲巡撫海瑞所稱曰武臣不朘削以媚有司僅見何萬鍾一人而已用薦補漳汀把總以擒獲盜魁賜金幣萬歷初進都司倭犯海上兵未集萬鍾選千人分十營夜則多舉炬火以疑之倭遂遁調守興都大學士張居正還鄉文武將吏奔走俯伏萬鍾不介冑獨以冠服見居正不懌當事懼遂令解任歸俄得疾卒年僅五十

劉鳳誌

歸大賓貢生萬歷十五年通判泉州公羨贖鍰悉分給貧生署晉江南安同安三劇縣均以

廉慎著巡撫周寀書其考曰冰鑒絕倫蓋實錄也

福建通志

陸檄字羽行萬歷甲戌進士授工部主事分署夏鎮以隄束水以水滌沙疏濬啓閉親自經畫尚書才之進郎中遷山西副使督學政士習丕變以不附權要投劾歸杜門讀書家居

二十餘年卒

縣志

張鼎思字睿甫萬歷丁丑進士選入翰林改授吏科給事中歷兵科都給事中江南水災疏請蠲賑嘗有詔取庫銀十萬兩具言邊餉所仰給不宜以供賚予上爲停詔張真人請祭金修壇廟執不與中官出守太

疏力爭事得寢內艱服闋補吏科都給事中時當大計條上五事命著爲令累擢江西按

察使

康熙志

尤錫類字孝徵萬歷庚辰進士知真定府吏進羨餘萬金卻不受巡撫檄取例金持不與被劾部議直之調錫類襄陽而罷巡撫在襄陽清節益厲擢貴州副使楊應龍叛署監軍預平播功晉雲南布政使致仕

縣志

何思佐字穎凡諸生與兄思任俱師事王敬臣砥行端方尤精禮記著說約行世

縣志

顧祖辰字子武祖蘭弘治戊午鄉舉令樂安於晉工縣歸隱吳之臨頓里有地數弓竹木翳然結椽三楹署曰春潛隱其中二十餘年清風穆如也蘭子德育家貧好學手錄幾數千卷祖辰襲祖父餘風時春潛小圃已屬他人獨存老屋三間破榻竹几淨無纖塵庭中古松一株雜花數本苔痕滿階景色幽茂所居雖闔閭中荆扉晝掩寂若空山閒作小詩及畫不以示人自娛而已臨頓爲陸魯望故里其中多名藍蕭寺風日晴美步屨過從僧徒好事者埽地折花以候其至至必留連移日亦終不就人一飯也年七十四卒

乾隆志

吳之佳字公美萬歷庚辰進士授襄陽知縣有善政擢兵科給事中歷刑科都給事中以儻

直著時冊立久稽禮科給事中李獻可以豫教請上嚴謫之之佳偕同官張棟葉初春等  
上疏力爭並削籍時稱吳中三諫天啓初贈太僕少卿孫适自有傳

乾隆志

陸經字載道由進士任嚴州推官時遇大荒流亡滿路疫癘繼作經捐俸施糜施藥死無歸  
者給櫬葬之任滿被召仍捐俸分散六邑積穀備賑造讀書樓五間於署之東儲書一百

部於上

浙江通志案選舉有萬歷丙戌進士長洲陸經

金士衡字秉中應徵子舉萬歷二十年進士授永豐知縣擢南京工科給事中疏陳礦稅之  
害言曩者採於山樵於市今則不山而采不市而樵矣刑餘小醜市井無賴安知遠謀假  
以利柄貪饕無厭楊榮啓豐於麗江高淮肆毒於遼左孫朝造患於石嶺其尤著者也今  
天下水旱盜賊所在而有蕭楊豐沛閒河流決隄居人爲魚鼈乃復橫征巧取以蹙之獸  
窮則攫鳥窮則啄禍將有不可言者甘肅地震復上疏歷陳災變因極言邊糴告匱宜急  
出內帑濟餽罷撤稅使毋事掣克引鹿臺西園爲戒帝皆不聽南京督儲尙書王基雲南  
巡撫陳用賓拾遺被劾給事中錢夢皋御史張以渠等考察被黜爲沈一貫所庇帝皆留  
之士衡疏爭侍郎周應賓黃汝貞李廷機當預推內閣士衡以不協人望抗章論之給事

中王元翰言軍國機密不宜抄傳詔并禁章奏未下者由是中朝政事四方寂然不得聞  
士衡力陳其非便疏多不行帝召王錫爵爲首輔以被劾奏辨語過憤激士衡馳疏劾之  
尋擢南京通政參議時元翰及李三才先後爲言者所攻士衡並爲申雪三十九年大計  
京官掌南察者南京吏部侍郎史繼偕齊楚浙人之黨也與孫丕揚北察相反凡助三才  
元翰者悉斥之士衡亦謫兩浙鹽運副使不赴天啓初起兵部員外郎累遷太僕少卿引  
疾去卒於家先是楊應龍伏誅貴州宣慰使安疆臣邀據故所侵地總督王象乾不許士  
衡遂劾象乾起釁後象乾弟象恆巡撫蘇松以兄故頗銜士衡廉知其清介狀稱說不置

云  
史明

李鴻字宗儀萬歷乙未進士授上饒知縣礦監潘相銜命至江西姦徒陸泰等助其攫噬鴻  
多方抵格凡寢其欲開者六銅塘山地連閩浙中多豫章榷楠銅鐵之饒流民易聚爲亂  
自宣德以來禁不得窺足而泰等說相必欲違禁開入鴻力爭不從乃請相先行按其處  
密令人偵山之童者路險陬不可輿者偕之步行預戒邑人敢以食物市者死相素貴不  
勝步欲還鴻曰貴監不信令疑此山多異材故至此不深入令無以自白相不得已行蹕



跚不能進思飲食又不得固乞歸慙忿對其下泣然開採之議遂寢壬寅四月有旨停礦稅鴻遂擒泰等三十餘人寘之獄急搜其寓得諸寃器反具及招集亡命約劑傾有司奏揭獄具巡撫奏上鴻坐奪俸會相過建昌諸生噪而逐之遂誣鴻喉鄰郡狂生劫奪稅鞘削其職鴻歸五年卒年五十上饒民思而祠之

王志堅府志稿

丁文蔚字仲理萬歷戊子以歲貢授南康府通判潔已奉公屢攝郡邑所至以能顯遷馬龍州知州州故牂牁郡民夷雜處管條五事招流亡清軍伍濬陂堰廣屯貯甦馬役上官檄行之未幾鳳賊造逆兵圍尋甸距州四十里烽火不絕居民欲竄入山谷文蔚於龍興寺呼父老泣諭以忠義乃止親冒矢石逆戰五坡嶺拔五寨巡按周懋相錄其功上聞會武定失事撫鎮逮繫奏遂寢踰年適與部使議不合解組歸

康熙志

姚光祚字鳳梧萬歷戊子舉於鄉授無爲教諭遷保定府同知用刑不忍傷人盜亦自息歲除家人進二雞卵作食光祚曰民膏也敬用之嘗攝府事有邑令赴京考績進羨金數百

光祚貯之庫以爲救荒之費二子來省布袍歸里竟不能饘粥也卒於官

續名賢小紀

凌漢翀字有莪

府志選舉作存莪

萬歷甲辰進士

知福清縣爲政公明不畏強禦人稱凌鐵面

福建通志

劉錫玄字玉受萬歷丁未進士歷官貴州提學僉事天啓元年永寧宣撫奢崇明反陷遵義貴陽大震巡撫李標遣錫玄與總兵官張彥方等援四川方告捷而貴州宣慰同知安邦彥反連陷諸城直趨貴陽時藩臬咸入覲城中文武無幾李標與巡按御史永安分兵爲五令錫玄及參議邵應禎等分禦各門學官及諸生亦督民兵分守賊盡銳攻北城標迎戰敗之轉攻東門爲錫玄所卻乃日夜攻擊城中食盡至生食人錫玄議發兵護標永安出城身留死守會新撫王三善師進圍始解凡圍困三百日城中十萬戶存者千餘人孤城卒定皆錫玄與永安功進右參政吏部尚書趙南星等請更優敘卒無他擢遂還里崇禎中再任寧夏參政

見明史李標傳府縣志皆不載

俞琬綸字君宣萬歷癸丑進士授西安知縣卒年僅四十二琬綸性疏簡有高韻與同里陳元素最善過從無虛日書出入晉唐詩文亦推名家

續名賢小紀

陳元素字古白諸生早負才名萬歷丙午鄉試卷已擬解首同鄉司提調者以小嫌厄之竟落去元素以義命自安無幾微見於顏色一時名輩多從之游能詩文尤擅臨池楷書法歐陽行草入二王之室兼善畫蘭寸縑尺牘人爭寶之歿後同志私謚貞文先生

陸世廉傳

張丑字青甫情

見崑山

之孫父應文字茂實博綜古今與王世貞相善自嘉定徙居長洲丑少

習舉子業不售遂潛心古文辭二十年杜門不出博覽子史尤嗜太史公書考訂諸家之

注正其譌謬越十年乃成名其堂曰鐫史晚好法書名畫搜討古今自上自秦漢下及當代

為清河書畫舫十二卷鑒古家皆服其精詳云

文情青  
氈雜志

文震孟字文起徵明曾孫祖國子博士彭父衛輝同知元發並有名行

王志堅傳元發字子  
悌以貢選浦江知縣

辨析疑獄多異政遷衛輝同知  
遂乞歸既卒鄉人私諡端靖

震孟弱冠以春秋舉於鄉十赴會試至天啓二年殿試第

一授修撰時魏忠賢漸用事外廷應之數斥逐大臣震孟憤於是冬十月上勤政講學疏

言今四方多故無歲不蹙地陷城覆軍殺將乃大小臣工臥薪嘗膽之日而因循粉飾非

大破常格鼓舞豪傑心天下事未知所終也陛下臨朝非不勤然鴻臚引奏跪拜起立如

傀儡登場已耳請按祖宗制六部六科以次白事糾彈敷奏陛下與輔弼大臣面裁決焉

則聖智日益明習而百執事各有奮心經筵臨御學非不講然鋪敘文辭如蒙師誦說已

耳祖宗之朝君臣相對如家人父子咨訪軍國重事閤隱微情形畢照姦詐無所藏左

右近習亦無緣蒙蔽若僅尊嚴如神上下拱手經傳典謨徒循故事安取此正笏垂紳展

書簪筆者爲且陛下既與羣臣不洽朝夕侍御不越中涓之輩豈知帝王宏遠規模於是危如山海而閣臣一出莫挽偷安之習慘如黔圍而撫臣坐視不聞嚴譴之施近日舉動尤可異者鄒元標去位馮從吾杜門首按冢宰亦相率求退空入國以營私窟幾似濁流之投筮道學以逐名賢有甚僞學之禁唐宋末季可爲前鑒疏入忠賢屏不卽奏乘帝觀劇摘疏中傀儡登場語謂比帝於偶人不殺無以示天下帝領之一日講筵畢忠賢傳旨廷杖震孟八十輔臣韓爌力爭會庶吉士鄭鄮疏復入內批俱貶秩調外言官文章論救不納震孟亦不赴調而歸六年冬太倉進士顧同寅生員孫文彥坐以詩悼惜熊廷弼爲兵馬司緝獲御史門克新指爲妖言波及震孟與編修陳仁錫庶吉士鄭鄮並斥爲民崇禎元年以侍讀召改左中允充日講官三年春輔臣定逆案者相繼去國忠賢遣黨王永光輩日乘機報復震孟抗疏糾之帝方眷永光不報震孟尋進左諭德掌司經局直講如故五月復上疏極論永光姦狀永光辨疏得溫旨而責震孟任情牽詆然羣小翻案之謀亦由是中沮震孟在講筵最嚴正時大臣數逮繫震孟講魯論君使臣以禮一章反覆規諷帝卽降旨出尙書喬允升侍郎胡世賞於獄帝嘗足加於膝適講五子之歌至爲人上

者奈何不敬以目視帝足帝卽袖掩之徐爲引下時稱真講官既忤權臣欲避去出封益府使道歸遂不復出五年卽家擢右庶子久之進少詹事初天啓時詔修光宗實錄禮部侍郎周炳謨載神宗時儲位艱危及妖書梃擊諸事直筆無所阿其後忠賢盜柄使其黨重修是非倒置震孟摘尤謬者數條疏請改正帝特御平臺召廷臣面議卒爲溫體仁王應熊所沮八年正月賊犯鳳陽皇陵震孟力陳致亂之源因言當事諸臣不能憂國奉公陛下宜奮然一怒發哀痛之詔按失律之誅正誤國之罪行撫綏之實政寬閭閻之積逋盡斥患得患失之鄙夫續集羣免羣力以定亂帝優旨報之然亦不能盡行也故事講筵不列春秋帝以有裨治亂令擇人進講震孟春秋名家爲體仁所隱忌不舉次輔錢士升指及之體仁佯驚曰幾失此人遂以其名上及進講果稱帝旨七月特擢震孟禮部左侍郎兼東閣大學士入閣預政兩疏固辭不許閣臣被命卽投刺司禮大奄兼致儀狀震孟獨否掌司禮者曹化淳故屬王安從奄雅慕震孟令人輾轉道意卒不往震孟旣入直體仁每擬旨必商之有所改必從喜謂人曰溫公虛懷何云姦也同官何吾驕曰此人機深詎可輕信越十餘日體仁窺其疏所擬不當輒令改不從則竟抹去震孟大愠以諸疏擲

體仁前體仁亦不顧都給事中許譽卿者故劾忠賢有聲震孟及吾騶欲用爲南京太常卿體仁忌譽卿抗直諷吏部尙書謝勳其與福建布政使申紹芳營求美官體仁擬以貶謫度帝欲重擬必發改已而果然遂擬斥譽卿爲民紹芳提問震孟爭之不得弗然曰科道爲民是天下極榮事賴公玉成之體仁遽以聞帝果怒責吾騶震孟徇私撓亂吾騶罷震孟落職閑住方震孟之拜命也卽有旨撤鎮守中官及次輔王應熊之去忌者謂震孟爲之由是有譖其居功者帝意遂移震孟剛方貞介有古大臣風惜三月而斥未竟其用歸半歲會甥姚希孟卒哭之慟亦卒廷臣請卹不允十二年詔復故官十五年贈禮部

尙書賜祭葬官一子福王時追諡文肅二子秉

明

陳仁錫字明卿父允堅進士歷知諸暨崇德二縣

王志堅傳允堅字貞甫瑞之族曾孫也少時卽以學行爲鄉里所推從游常百人萬

歷乙未登第在二縣皆以賢能異等著聞秩滿推吏部主事未下而卒年四十六

仁錫年十九舉萬歷二十五年鄉試聞武進錢

一本善易往師之得其旨要久不第一爲文震孟亦老成宿學海內咸慶得人明年丁內艱廬墓次服闋起故官尋直經筵典誥救魏忠賢冒邊功矯旨錫上公爵給世券仁錫當視草持不可其黨以威劫之毅然曰世自有視草者何必我忠賢聞之怒不數日里人孫

文彖以誦步天歌見捕坐妖言鍛鍊成獄詞連仁錫及震孟罪將不測有密教者得削籍歸崇禎改元召復故官旋進右中允署國子司業事再直經筵以預修神光二朝實錄進右諭德乞假歸越三年卽家起南京國子祭酒甫拜命得疾卒福王時贈詹事諡文莊仁錫講求經濟有志天下事性好學喜著書一時館閣中博洽者鮮其儔云明史長子濟生字

皇士少師事黃道周劉宗周皆傳其學以蔭官太僕寺丞明亡後隱居奉母著書甚多所

編啓禎遺詩皆海內忠臣義士之作尤有裨世教卒年四十七門人私諡節孝先生乾隆志

尤淪挺秀子挺秀見孝義傳字遠公爲行高材著述自好喜山水之遊著西山虎邱竹枝詞兩舉鄉

飲大賓不赴子貴貶封亦不冠蓋里人高之年八十有一無疾而逝唯亭志引舊府志

管玉音字振之與文震孟姚希孟俱春秋名家中天啓乙丑進士歷工部營繕司郎中督造

德陵殫心節費崇禎己巳各京師嚴議造城上箭簾大璫欲爲破冒本部尙書張鳳翔

特薦玉音任之不日完工省費鉅萬璫銜之蜚語中傷廷杖歸養病數年卒康熙志

管正傳字元心崇禎辛未進士年方弱冠雅負才名爲江西永新令悉心問民疾苦禁卒牘

絕苞苴尤折節下士手自課程多所成就至設彙封定官造歸條編毀淫詞後世多遵守

之江  
西  
通  
志

吳适字幼洪之佳孫崇禎十年進士授衢州推官以卓異徵甫去任而福王南渡入除戶科給事中時馬阮擅政招致羣小閣臣姜曰廣尙書張慎言都御史劉宗周相繼去适憤激極言老成淪棄可惜請申明祖制以清議歸吾官不報忻城伯趙之龍疏薦逆案中前少卿陳爾翼适又劾之明年進兵科右而總兵官左良玉方與馬阮交惡舉兵內向初适在衢嘗奉檄會勘蔡奕琛夤緣事執法無所屈至是奕琛居內閣思因事中傷之以适薦侍郎楊鶚疏中有與良玉慷慨同仇語遂誣以黨逆下錦衣獄將殺之會南京失守得脫歸杜門卻掃十七年居母喪以哀毀卒

王璠  
誌

顧凝遠字青霞九思孫少負驚才長而好學於古今墳典無所不窺畫師董巨間出入荆關居北郭之花谿亭館蕭閑愛畜商周秦漢法物一時名士多與爲雲霞交

乾隆  
誌

陳宗之字玉立祖光祖父繼華皆舉人宗之攻苦力學崇禎癸酉以春秋舉於鄉癸未會試

中乙榜授推官以親老辭歸性端方沈篤邃於古學博洽多聞詩文無纖靡之習

康熙  
誌

文棟字端文從簡子

從簡見  
孝義傳

狷介絕俗從父隱居終身女倣嫁趙均亦有才名文氏自徵明



以來世善書畫從簡父子能傳其法行誼尤爲時人所重云

姚宗典述

許元溥字孟宏父自昌中書舍人以篤行稱構梅花墅聚書連屋元溥生而沈靜日出其書徧觀之於經藝罔不淹通尤邃於易立高陽社課子弟喜購書自號千卷生崇禎庚午舉於鄉不仕卒友人私諡曰孝文

康熙志

陳裸初名瓚字叔裸後以字行號白室熟精離騷文選工山水一竹一石俱古人意名流入

吳者爭購裸縑素晚遁跡虎邱專於詩

元和縣志

沈璜字璧甫與王德操林若撫先後稱詩人長身頰面狀貌類河朔閒人重氣任俠好爲人

急難畫策嘗游遼左督師袁崇煥延致幕下劇論兵事往往屈其坐客崇煥歿後痛其罪

疑辟重酒間歎息聲淚俱下卜居虎邱之西亂後還吳城兵至倉皇之虞山次近郊白刃

及之夫婦皆遇害

列朝詩集

林雲鳳字若撫啓禎間以詩名吳中其詩穩順聲勢格在中晚間不爲一時鍾譚所移年八

十餘卒

徐晟存友札小引

王人鑑字德操少學詩於居節居吳門彩雲橋堂供古佛一燈熒然庭前雙檜可二百年物

凝塵滿席階下幽花小草手自灌刈數世不食葷血面削形癯見者知爲枯禪逸叟也

列朝

集詩

陸世廉字起頑祖象閩嘉靖己酉舉人世廉爲諸生有文譽試輒高等儀度修偉長於說經

從學者衆九試鄉闈不售崇禎庚辰以薦授廣州府通判在南中累遷光祿卿遭亂崎嶇

歸隱里門二十年屢空晏如著述甚富年八十五卒

乾隆志

莫叔明字公遠徙居武林好爲詩好苦吟務道人所未經道游燕齊及楚反葬武林自伐石

爲表曰明詩人莫公遠之墓

浙江通志

施武字魯孫事親孝佯狂玩世工詩善草書又張屈字醒公鄉里私謚貞節先生其詩高寒

類孟東野而幽渺過之

明詩綜

蔣永譽字公郁諸生有文望鼎革時奉節母陸隱西山母物游滇吳三桂未叛時屢聘不赴

康親王慕其名三聘不就自稱故明逸士親王歎曰此今之巢許也

楚游記參吳門補乘

蔣鉉字伯玉諸生幼與南刑部侍郎王心一同學時流寇蜂起朝命心一修留都所屬城心

一專委鉉費帑金數萬事速而工致當路知其才巡撫張國維尤敬禮之訪以人材鉉薦

布衣程周祐智勇可用國維授爲守備先後破賊於江浦六合斬首數萬級賊遁入廬霍國維寓書於鉉曰使賊不得渡江而南者薦士之力也拔周祐爲副將積戰功至總兵官國變後遁爲僧崇禎十二年詔舉賢良方正國維首薦鉉鉉筮之得隨之明夷色愀然遂稱疾不應以諸生終於家

縣志兩  
條合纂

盛王贊字子裁其先本吳江人曾祖應陽嚴州太守王贊少孤苦依外家陽城張氏遂占籍焉力學強記年幾四十補縣學生又十年崇禎丁丑成進士授浙江蘭溪令鄰邑湯溪有一山洞方廣數十里闢葺大植香錠其中盡多富饒願婚巨族邑人擯不與齒遂聚衆出抄掠令不能治巡撫素重王贊名曰蘭令可辦此趣至單車按行境上率里老講明鄉約具陳古今忠義之事詞旨慷慨聞者心動因使人持檄賊中諭以恩信爭縛首惡以獻事遂定蘭民素健訟王贊平心聽斷攝伏如神御史喬可聘按浙至縣遇山水暴漲舟不得進索挽舟者王贊呼曰農忙矣令請以身挽喬遂改陸行仍薦之於朝時兩賢之王贊素清苦自食粗糲妻布素衙齋中不輟紡織居三年舉卓異第一當入覲有贖鍰四百金或請爲貲王贊曰非吾志也卽召吏以首陔塘之圯廢者扁舟就道惟衣囊書篋兩肩而已

時詔入覲諸臣得直陳地方利病王贊條奏三事曰南糧曰驛遞曰盜賊上深嘉之命復任巡按王範行部訪逮姦蠹王贊獨無所舉屢檄不應範怒監司素不快王贊者搆之範遂劾其偏執乖張調去士民巷哭罷市至擁塞城門不得行乃微服潛歸廷臣倪元璐范景文鄭三俊等交章薦之上一日御經筵顧輔臣曰人臣難得盛王贊何如人對曰潔已愛民上曰何故被劾對曰不善事上官上曰此強項吏也越數日復問輔臣有一賢令未用乃手出一摺具載劾疏始末曰盛王贊也此人宜在銓部命未下北都變南都再造戎政尙書張國維首舉王贊時東陽新遭許都之亂都已禽而其黨懼罪猶負固劫掠國維東陽人故以爲請遂補東陽縣至則首驗獄以凡事連許都者悉論遣之其黨遂散去甫七日以母喪棄官邑民援軍中奪情例詣闕請留不得蘭溪人立祠祀之歲以生日爲盛公會吳人經其地者必問訊盛公安否南都破後削髮爲僧避居陽城故里家無長物日不再食屋旁有田二畝卒之日屬其子曰此吾祖宗所貽也年六十有五

唯亭志引邑志  
參吳門補乘

鄭敷教字士敬光宙

見吳縣

子湛深經術天啓中吳中倡爲文社敷教與焉崇禎庚午與同社

楊廷樞張溥陳子龍夏允彝同舉應天鄉試是時東南文士統會於吳號爲復社敷教生

徒之盛亞於廷樞兩人俱爲鄉里所宗時人語曰前有朱張後有鄭楊丁丑舉賢良方正以母老辭晚歲隱居教授著述甚富尤深於易詩宗社陵書法在蘇米閒年七十卒門人私謚貞獻先生同榜舉人陸坦字履常自嘉定徙居郡城有學行與廷樞敷教及許元溥稱吳門四孝廉明末授南豐知縣不赴隱支硎鄧尉間年六十餘以窮餓死

乾隆志

顧苓字云美存仁後少篤學尤潛心篆隸凡金石碑版及鼎彝刀尺款識蟲魚蝌蚪之書皆能誦之晚而篆隸益精臨摹秦漢銅章玉印見者以爲不減吾衍文彭居虎邱山塘蕭然敝廬中懸思陵御書時肅衣冠再拜歛歎太息女一妻桂林留守瞿式耜子易其名姓俾

脫於禍人尤高之

元和縣志

葉襄字聖野少穎敏父教授在外從母張受學銳志經籍爲名諸生楊廷樞倡復社襄執經稱高弟子甲申後隱居不出專工詩律屏鍾譚餘論一以唐人爲宗尤工儷語有六朝風致同邑黃始字靜御亦工詩善駢體

乾隆志

文秉字蓀符震孟長子諸生國變後居山中矢志肥遯自署曰竺塢遺民著烈皇小識甲乙事案等書黃梨洲至吳門上靈巖乘與徐枋周茂蘭等共集天山閣縱談七晝夜不休皆

故遺民也

家傳參黃梨洲遺著

子點自有傳

沈明掄字伯敘精春秋得安成閩喜之傳與同里徐汧李模鄭敷教友善從遊甚衆崇禎癸

酉以恩貢中順天副榜乙酉後授徒自給三十餘年卒

康熙志

徐枋字昭法號俟齋汧長子少有才名年二十一舉崇禎壬午鄉試南都失守汧將殉國枋日夜號泣欲從死汧曰吾不可以不死若長爲農夫以沒世可也乃奉父命拮据營葬遁跡不出初居鄧尉山中後隱靈巖之上沙土舍數椽讀書其中布衣草履終身不入城市家貧常賣畫自給雖藜藿不繼而莫能強以一錢之餽平日往來同志數人外雖至戚罕得見面時以枋與宣城沈壽民嘉興巢鳴鶴爲海內三遺民川湖總督蔡毓榮慕其名具書致名藥厚幣託幕下友馮羽道意謝不受遺書馮生略曰僕年二十四守先人沒世之言長往避世今已五十一矣親知故舊都謝往還絕問遺顧敢與當世之公侯卿相通交際邪且當世之公侯卿相亦安用此衰悴廢民爲也幸爲我善辭以安我素拜賜多矣睢陽湯斌撫吳尤欽其節嘗屏騶從兩詣山中訪之卒不得見歎息而去所著居易堂集二十卷文辭健拔大抵主於扶世教植綱常無一諛墓應酬之作山水宗董巨閒法倪黃當

其得意自謂前無古人書善行草俱爲世所重康熙甲戌年七十三卒弟柯字貫時年十五補諸生父汧殉節後遂杜門不出所居二株園四方賓從文酒宴集有貴公子之風善

屬文尤長於詩兼工書法晚自號東海一老卒年七十五

乾隆志

韓洽字君望郡學生深潛篤學於書無所不窺性簡亢絕俗晚歲隱居羊山自稱羊山畸人

足跡不入城市藜藿不充晏如也朱彝尊稱其詩爲明季以來吳中第一

乾隆志

韓馨字幼明父治萬歷丙戌舉人知雲和黃巖二縣有惠政馨八歲作擘窠大字書虎邱五

人墓碣董其昌陳元素贈詩以贈年十三遊郡庠入南雍司成王某評其文曰文兼韓柳

書擅羲獻閣黨阮大鍼居金陵慕其名以金幣招致拒不受黨人獄起馨名在復社幾陷

不測家遭兵火時平卜居洽隱園與鄭敷教金俊明諸遺老結社廣生禪院自號少微真

人卒諡貞文先生

道光志

卷

吳縣志卷第六十八上

列傳六

長洲

清

朱隗字雲子治博士業雅尚文藻天啓中吳中復社聚四方積學之士隗與張溥張采楊廷

樞楊彝顧夢麟等分主五經馳驅江表爲一時蔚顧詩宗中晚唐時稱爲徐禎卿唐寅之

流亞晚歲當貢隱居不出弟陵字望之亦能詩畫

乾隆志

史北斗字辰伯吳江鑑之後先世徙居長洲北斗嘗受學於劉鳳王穉登爲諸生不得意

卽棄去力學於古尤博通前明典故下至故家遺老流風佚事無不備熟於中暇則爲人

抵掌稱說移日夜不倦性尤喜蓄書所購率皆祕本或手自繕錄積至數千百卷齋居蕭

然惟事校讎或偶有所得輒作小行楷疏注其旁爲人剛直見少年浮薄者數叱斥之雖

其人內愧面發赤弗顧也順治乙未年八十餘矣告其友汪琬曰長洲縣志絕不稱志中

所難者人物耳吾刪定已久今老矣無所用之當以授子其後亦竟不果後四年卒



彭德先字敬輿父汝諧明萬歷丙辰進士甫釋褐而卒德先生萬歷中倜儻有奇氣以諸生貢太學時天下方有事遂究討兵師算數之略及水利邊防星占諸家言習弓矢慨然有四方之志福王立阮大鍼當國爲汝諧同年進士或勸德先干之德先笑不答巡撫祁忠敏公彪佳開禮賢館德先上書陳兵食事宜並請蠲苛稅彪佳得書驚異延德先釐正賦役綜故籍斟酌出入爲書書垂成彪佳罷去清定江南故籍散失司理沈以曦復請德先因前書爲據順治二年釐定賦額悉委德先晚歲出入震澤之濱晨煙夕靄嘯歌自得自稱漁叟已而買地玉遮山吳門號玉遮山樵康熙四年卒年七十有六補乘

彭行先字務敏德先弟少補諸生讀書僧寺奮志自立會友人以場屋事被訐陰援行先爲左證遂牽連見褫行先走京師上書自雪終未嘗歸獄其友人明季用拔貢考授知縣見國事不支遂絕意仕進隱居教授家貧不能購書數借人書繕錄日課數十紙雅善書法出入晉唐諸家尤習前明典故對客談論娓娓晚歲與鄭敷教金俊明稱吳中三老已而從孫定求孤孫寧求相繼登上第入翰林行先益鍵戶謝賓客巡撫湯斌推重行先舊德每月吉讀法命有司延致輒固辭友斌還朝上問吳中人物遂舉行先與其兄子龍以對

年九十二卒

汪琬墓誌

顧韓字開林明季補諸生甲申後謝去躬耕養母子六人有爲諸生者聽其浮沈不以科名迫之弟芳菁舉於鄉諸子焯成進士韓一過爲之經紀酒食燕會悉不與子弟知其意弗強也韓於世事無所好顧獨好書其非力所能得則手自鈔錄窮日夜可盡百十紙夜常不寐寐亦數刻張燈披衣往往達旦手不釋卷不停鈔雖老至不知也尤嗜古金石文蠹蝕焚餘皆所珍惜與人交當其意一日十往返非其意求一顧不可得其居在黃埭河濱

橋自稱河濱漁人子孫家焉

吳德旋初月樓聞見錄

俞榮字受之幼孤力學年十七補諸生潛心六經尤邃於易晚年隱居山館學者稱芹菴先生所著有論語述說孟子詳說大衍說喪禮報本書論孝詳說先儒言行錄及詩歌序傳

五十卷

康熙志

徐樹丕字武子少補諸生姚希孟器重之妻以長女屢試不利益博覽羣籍善楷書兼工八分國變後隱匿不出卒年八十八子晟字禎起博學工文鼎革時年甫壯卽棄諸生從父隱居家貧授徒養親垂四十年康熙癸亥樹丕歿亦六十六矣哀毀得疾營葬甫畢而

卒時有陳三島字鶴客與晟善晟稱其負逸才而有奇志古詩追風蘇李律體亦在王孟  
間年僅三十七咯血死

乾隆志

張鳳儀字德文號聖來其先世爲宋大學士封鄜伯號橫渠之裔南渡後居浙右始遷吳江  
者曰讓四五傳至應魁移居府城生鳳儀鳳儀少治舉子業不得志於有司輒棄去思爲  
有用才深究前代治亂往復所由以達於當世之務前明時應臬憲之徵凡兵刑錢穀諸  
務絲棼節錯者無不迎刃立解汝南周公四明馮公萊陽宋公永豐程公無不器重之壬  
午平海之役大集舟師檄諭交馳行擒渠宥脅之令不數月渠魁解甲投誠公與諸將吏  
勤撫事蹟備載平海集中迨清初中州王公以名給諫權知臬政時公高蹈不出王公強  
之至幕諮諷掌故條舉憲章使開國之日無淫刑無秕政者皆公之力也後遼陽趙公金  
公倚重之如左右手旣而撫軍周公特爲旌召庚子多臺張公又以茂才檄徵商推時政  
惜廷議撤差未竟其用生平制行醇慤尤嚴守雌防川之戒雖寄跡案牘中其束修之謹  
學殖之富卽一時荐紳先生咸不逮焉晚歲頗究出世法號了空道人卒年七十有一

張氏

張朝端字治公號正庵鳳儀之孫父性善字慧鈞倜儻有奇氣所與交皆賢豪長者以名諸生客游入幕府爲當世所倚重朝端由貢士官鳳陽訓導尋遷靖江雍正間歷署知縣事所至寬柔以教士有困阨輒爲解救鳳陽進士田大璽先時入試院遇疾被斥得公力以免靖江諸生與縣令構怨起大獄公申救多所輕減幼善強記精經學嘗掩卷熟誦詔其子在川曰吾祖讀書畜德志在經濟汝勉之性渾厚事親與人居家服官皆率真去僞閒論今古語不及老莊而行事昭合年八十八無疾而終沈文愨公銘其墓在川名曰在字嘉起爲名諸生執經文愨門下湛深經術尤以理學相切劘爲文和平中正不蹈怪僻險澀之習文愨公爲撰張文學傳入文集中公慨然有經世之志乾隆初劉某視學江蘇以優行舉每謁見必詢以當時得失乃上書劉公一曰善保題之法二曰立書院之規三曰清漕糧之弊劉公嘉納之他所著書甚具多切於日用者性伉爽交朋友是非可否輒直斥不避嫌怨故人子有失業不自存者偕同人謀務使之得所遠近交重之脩脯所入銖積寸累復先世舊產若干畝設爲祭田供時祭墓祭修葺先人兆域作記戒子孫世守敦本崇先可爲清門式晚歲錄所著詩文一卷顏曰偶存卒年六十五

同上參沈歸愚張文學傳

陳匡國字均盜爲人沈靜澹雅不及汲於名利年未壯值明亡卽棄諸生隱居東郊外婁江  
上教授自給尤好著書管輯吳逸民傳始仲雍訖金孝章共如干人以自寓其志

汪婉吳逸民傳

序

蔣元允前明諸生鼎革後鍵戶著述韓葵未遇時嘗袖文謁之元允曰子異日名臣也屬其  
加墨不可曰我爲世外人尙欲品題天下士耶子示吉字仲芳工詩精岐黃術卒於康熙

中 錢泳履園叢話

李之蕃舉人順治十年知 清洛縣 兵燹之後規模未立之蕃下車卽捐資建縣治招撫羣盜

解散餘黨境內肅清清兵入閩羽檄旁午供應裕如以事解任邑人立祠祀之

福建通志案府志

選舉有崇禎丙子舉人長洲李之蕃

顧予咸字小阮順治丁亥進士授 寧晉 知縣畿南多盜廉其魁數人捕弗誅厚衣食之使爲  
耳目他盜悉驚散縣地多不耕上官徵賦如故力爭乃免豪家多賄胥匿田以累貧弱乃  
閉胥室中使盡書所匿又令民得自首實而賦役平居數月縣大治調知山陰時浙東初  
附山藪多不靖官兵所至殺平民爲功而俘其婦女予咸悉縱遣之請於督撫但罷兵以

屬令一月可辦如其言兵罷而民歸兩舉卓異擢刑部主事調吏部遷考功員外郎時當掌計遂移疾歸十八年春順治大行遺詔至蘇巡撫以下大臨府治有諸生十八人面詰吳縣令不法事巡撫失國治庇令欲坐諸生重辟而畏予咸剛直從而請曰令無罪當罪諸生予咸正色曰諸生託令事皆實何罪當罪令國治忌之遂密告金陵會勘大臣逮予咸繫獄坐以指使論絞獄上奉旨復官尋入以奏銷案落職居鄉風采峻整爲後進所憚歿後數十年里人立祠祀之

乾隆志

何棟字與偕由崇明籍舉順治丁亥進士除邵武府推官攝福州府篆時閩師悉赴泉州經略廈門會城空虛海寇鄭成功率衆自海道襲福州巡撫宜永貴瘍發於首不能視事因素重棟才盡以城守事委之棟力請釋原任布政周亮工於獄共扼險禦賊賊攻城十三晝夜棟竭力固守危城獲全入爲戶部主事歷江西提學僉事告歸卒子炯字倬雲煜字章漢並舉進士有名炯累官雲南僉事煜終南陽知府

通志

韓樵字聲谷馨子行藝兼修晚年嗜朱子綱目常曰學者懲忿窒慾無踰此書乾隆中舉孝廉方正不就舉鄉飲又辭不赴當事重樵行誼致四豆焉樵子騏字其武幼有異稟五歲

辨四聲長而博覽嗜史漢書以諸生終

道光志

宋實穎字既庭少爲諸生受知於徐汧順治辛卯舉順天鄉試與吳下諸名人倡慎交社聲譽藉甚後以江南奏銷案註誤康熙戊午復還舉人已未以博學宏詞召試罷歸久之授揚州興化教諭課士尙經術斥浮夸歷十六年告歸諸生祀之學宮旁實穎淹貫經史詩文典雅爲詞壇名宿侍講繆彤少從受經其學得於實穎者爲多而宅心淳厚喜獎拔後進以故人益重之年八十五卒

乾隆志

施敬先字爾恭中順治辛卯鄉試性嗜學博極羣書與兄學先相師友生平日以著述爲業

孫震銓康熙乙卯鄉試第一戊辰成進士四方傳誦其文稟承家學爲多

元和縣志

許定升字升年順治甲午副榜授禹城知縣決斷明敏俗多投繯赴井以中怨家定升覽牘立察其虛實受事三年止定眞命兩案凡詞中牽連婦女者盡勾去不問邑有豪奴高士偉李重榮等倚巨室勢橫里中定升以計掩捕立斃杖下一時有菩薩變金剛之謠邑中丁籍前此虛增二千有奇核實悉與減除建樂采亭於泮池南以課士潔河石橋久圯修復以利渡者治聲大著引疾歸里力行善事與同志積粟賑饑倡設育嬰堂鄉里稱之

乾隆

汪琬字茗文少孤自奮讀書五行俱下舉順治乙未進士觀政通政司假歸銳意爲古文辭以起衰自命尋授戶部主事分司大通橋進員外郎改刑部遷郎中河南民張潮兒以報母讎殺其族兄三春巡按御史論潮死琬爲復讎論引律文罪止杖爲據以奏銷案降北城兵馬司指揮兵馬司秩卑職冗左官者多偃蹇不屑意琬剛直不撓理冤誣決疑獄懲奸豪任滿去民炷香攜酒送者塞道復爲戶部主事權江寧西新倉以病假歸結廬堯峯山益閉戶著書家居九年以博學宏詞召試授編修與修明史在史館六十日撰史彙百七十篇卽杜門稱疾踰年仍告歸歸十年而卒年六十七琬爲文根柢六經浸淫史漢取法唐宋元明諸大家立言命意皆有所本嘗自言吾文從廬陵入非從廬陵出於易書詩春秋三禮喪服咸有發明其敘事尤有法度一時名公鉅卿誌銘表傳必以琬爲歸性伉直不能容人過雖賢人文士交遊遍天下而忌之者亦衆自知不容於流俗故前後閑居二十餘年泊然自樂也

陳廷敬  
墓誌

宋德宜字右之學朱子順治乙未進士選庶吉士授編修遷司業累官至左都御史上疏請



弛海禁俾濱海民藉田漁爲資生計請定鹽法考課裁省筆帖式禁通販硫黃硝以殄寇盜又言捐納授官非經久制請限以月或以年庶官方可澄所言次第舉行又率同寮上言各處統兵大將軍王以下玩寇殃民遷延歲月或掠取婦女或攘奪財物請嚴飭禁絕上是之命王大臣速議行山東大帥柯永綦縱兵鼓譟德宜疏劾卽命逮訊進兵部尙書蜀地初定大軍糗糧皆運自陝西棧道顛踣秦民大困會星變德宜言今大軍趨黔望秦蜀之餉然徵秦則以道遠諉之蜀徵蜀則以歲饑諉之秦彼此觀望莫若併川陝總督爲一人則痛癢相關可以隨時調發詔從之在部三年滇黔粵蜀以次削平時俘獲賊中婦女並著籍旗下德宜言脅從者不與倡亂同罪且婦女何辜宜聽收贖於是所釋甚衆尋轉吏部康熙二十三年拜文華殿大學士加太子太傅二十六年以疾卒於官年六十二德宜口訥造次不能達其詞至於國家大事議論侃侃同列意見不同輒爲剖晰是非反覆開導或自爲一議上善其所陳多報可性孝友年十七以父學朱巡按山東死事狀伏闕上書得贈卹在都聞弟喪兼程還經紀其後事撫育孤女踰已出惇於宗族貧者輒周以粟與兄德宸弟德宏蚤著文譽一時有三宋之目

德宸字御之後改名必康熙丁巳舉順天鄉試德宏字疇三少負才名出

兩兄上與諸文士倡榘交社順治辛卯舉順天鄉試年甫三十四卒寒峻有文采者雖不相識汲引不倦其卒也上聞軫悼

予祭葬諡文恪長子駿業字聲求輕財好施善書畫由副榜累官兵部右侍郎次子大業

字念功康熙乙丑進士選庶吉士授編修癸酉主江西鄉試得朱軾於落卷中拔實第一

士論翕服大兵征噶爾丹大業自請運糧千石以軍功陞右贊善累遷內閣學士卒乾隆

吳愉字敬生生而端慤言規行矩工舉子業授徒數十輩日披閱數百牘不少倦每當省會

試索閱闈牘決其雋否不爽豪黍而愉獨屢蹶僅以歲貢授溧水訓導勤於課士學使者

為書經義齋額以贈之年八十卒門人私論端仁先生乾隆

宋廣業知臨城縣俗健訟有大猾俗稱一門五虎者置之法民得安枕邑遇荒旱捐俸煮粥

活飢民設義學輯邑志未竟以艱去後歷任山左卒刻成書康熙六十年祀名宦畿輔通志

許虬字竹隱順治戊戌進士授思州府推官再遷永州知府其制義文彙家絃戶誦同邑陸

壽名字處實順治壬辰進士官監國教授蔣埴字曠生順治辛丑進士官樂清知縣皆以

文學稱於時通志

尤侗字同人一字展成生而警敏博聞強記有才名歷試不利以貢謁選除永平府推官不

大畏強禦坐撻旗丁鐫級歸初侗所作詩文順治朝流傳禁中上覽而稱善嘗問其門人修撰徐元文爾師年幾何以何事降調當補何官有意用之不果康熙十七年始以博學宏詞召試授檢討纂修明史分撰列傳三百餘篇藝文志五卷居三年長子珍登進士選庶吉士侗遂告歸家居鍵戶著書求詩文者無虛日侗亦應之不倦已卯上南巡至吳侗獻平朔頌萬壽詩御書鶴栖堂三大字賜之癸未駕復南巡卽家晉侍講明年卒年八十七珍字慧珠一字謹庸康熙壬戌進士入翰林遷右贊善念親老乞養歸遂不復出年七十

四卒珍恬退好學尤喜爲詩初宗唐人後出入蘇陸所著有滄湄詩鈔

乾隆志

張壘字牖如以諸生就鑲藍旗官學爲教習師選河南登封知縣登封自明季遭寇亂比歲不登民多失業壘至革除私斂招徠流亡督之耕種蒞官五月大修學宮會諸生明倫堂講萬物一體之義復嵩陽書院導諸生以程朱之學自縣治達郊鄙立學舍二十一所課諸童子月再集民讀法置善惡簿爲勸懲間策驢歷民間問所苦有小爭訟輒從阡陌間決之俗好訟壘舉善士爲鄉約俾行化尊俗爲一變路不拾遺獄訟日尠衙胥閒則操耒耜爲農開萼嶺二百里復輟轅路建古賢令祠修舊令馭廷誨墓廷誨崇禎末守城抗賊

死者康熙二十一年自春徂夏不雨墮囚服繫頸暴烈日中拜表引罪步登少室東峽汲泉水反獄廟俄而雨大注以卓異薦遷廣西南寧通判民遮道痛哭既去立四祠於四鄉

肖像以祀榜曰天下清官第一旋遭母喪服除赴京師卒於旅館年五十六

彭紹升良吏述

彭龍字雲客行先兄子少喜讀先儒書方言矩步為文沈深浩博與宋德宜兄弟訂慎交社

不為馳騫聲名計順治己亥舉進士授廣東長寧知縣邑小在山谷中當前官腴削後瓏

革火耗恤里排戢衙役息訟興文期月間士民翕然愛戴失郡守意誣劾去官既歸授徒

講學題所居室曰志矩齋每月朔望集諸生會文文星閣下閱數年不廢出其門者多謹

飭之士巡撫湯斌重其學行嘗屏騶從過訪焉年七十七卒門人私謚仁簡先生

子定求專狀

朱嶸字與西府學諸生喜攻詩南歷閩越北遊燕冀所見聞皆發於詩性孝友父歿遺產悉

讓之兄

康熙志

朱嘉遇字上萃希文子嘗請行銷圩法絕虛田賠累吳人德之子澄字天鑑石埭縣教諭廉

潔持已訓課有方改授江陵縣縣丞崇祀石埭名宦以子肇基貴贈中憲大夫

元和縣志

陸在新字蔚文康熙丙午舉人除松江府教授巡撫湯斌察其廉勤特舉卓異是年江南七

郡一州長吏無登薦書者獨在新一儒官而已擢廬陵知縣不以家口自隨誓不受民一錢每晨拜誦戒石四箴乃視事建二亭縣門榜曰問苦息事每置投牒者於中令諦思之  
宋多自悔求息者不息乃詳訊之曲直立判嘗裹糧詣鄉郵勸民孝悌力田藹如家人暇則與諸生講德論文士習益醇邑大治甫三年卒於官其子鬻書以斂民罷市巷哭祀吉州

名宦祠

乾隆志

趙炳字明遠徐聞令一鶴孫少爲諸生見稱於楊廷樞徐沂文筆超雋獨冠一時順治甲午舉於鄉至康熙丁未成進士年已老矣未仕卒同里章在茲字素文自明季至順治間前後所選制義名曰清音風行海內顧久困諸生丁酉始中副榜入太學方謁選病卒  
乾隆志

吳一蜚字翼生少孤兄愉教之讀書康熙丁未成進士授山西山陰知縣歲凶頻請緩征寬賦賑粟平糶又連決疑獄人稱爲神內艱服闋補洪雅縣時巡撫姚某方行開墾增稅之令洪雅見徵纔七百九十四兩欲加至五千兩一蜚力爭得減三千四百餘兩入爲工部主事擢御史糾儀失察降補行人司副浮沈十餘年歷鴻臚少卿奉天府丞大理少卿光祿卿太常卿擢戶部右侍郎調吏部轉左尋晉刑部尙書時有重案株連者衆一蜚苦心

消釋人多陰受其庇轉吏部在職廉慎卒於位貧無以斂朝士賻之始克庀喪事

彭定求墓誌

韓莢字元少祖治父勣世有文行莢少失母從父讀書研精經史貫穿百家不屑爲俗儒章句剽竊之學已而孤貧益甚乃入京師康熙壬子國子監生中順天鄉試明年會試殿試皆第一授修撰初制科之文士子承明季餘習頗傷繁縟後降而爲空疏浮滑自莢出而文風翕然一變尋充日講官纂修孝經衍義主乙卯順天鄉試歷贊善侍講學士擢內閣學士莢在館閣凡應奉文字多出其手上眷注方深而是時南北分黨禍機將發莢中立無倚決計勇退遂以疾請假歸家居八載點勘六經凡漢唐宋儒箋疏章句靡不采獲而裁其中於史稱馬班陳壽文宗唐宋六家詩尚唐書將著書以老三十三年復召命充一統志總裁遷禮部右侍郎仍掌翰林院學士調吏部命教習庶吉士三十九年陞禮部尙書掌院教習如故再疏乞歸不許卒於官年六十八莢和平樂易以文章荷上知未嘗自矜與人言訥然不出口及遇大事持論侃侃不阿當廷試日吳三桂逆跡已萌莢對策力言三藩當撤無少瞻顧永定河臣請廣開捐納事例莢獨持不可祭酒阿理瑚請以故大學士達海從祀孔廟莢言達海造國書一藝爾於從祀之典未合御史鄭維孜請令監生

各回原籍應試莫言如此則太學一空非京師首善之義及議海關不當設各關稅不當增私錢禁不當過嚴所建白甚多待故舊不以貴賤異視獎拔後進如不及初入監時受知於祭酒徐元文壬子鄉試主考徐乾學實拔其文莫敦師生之誼及兩人致政家居終日憂患平時故人門人避禍絕跡莫挺身周旋百端慰藉卒亦無事也乾隆乾隆十七年追諡文懿子孝嗣字祖語康熙己丑進士能世其家學道光孝基自有傳乾隆志曰時游

杜定京字世求康熙己卯舉人文筆秀韶為葵所稱以無事實附見於此

顧汧字伊在天朗子少勤學於文康熙癸丑進士選庶吉士授編修丙辰充會試同考官得人稱盛歷左中允左右諭德御試班馬異同辨上嘉其立說平正俄遷左庶子侍講學士陞內閣學士進禮部右侍郎憂歸服闋特命巡撫河南先是陝西告饑詔運湖廣粟往賑而河南民獨當轉輸之役因其上念陸運艱難命水運二十萬石入關汧甫下車馳赴渭川酌定運費又相度水勢備述荊子關至龍駒寨數百里谿灘險惡之狀上報時運五萬餘石遂命停運河南諸郡去水遠聖時歲漕二十五萬石皆赴大名府小灘鎮採辦以地非所屬國戶姦牙任意阻遏浮費不貲汧疏請改徵折色官為督辦部議不允上特從其

請民始脫重累坐才力不及罷歸久之起補四譯館太常少卿歷遷宗人府丞致仕卒

王鴻

誌墓

彭定求字勤止號訪濂又曰南昫老人雍正康熙丙辰會試殿試皆第一授修撰遷國子司業以身率教積弊盡革升侍講丁外內艱服闋起補未幾謝病歸定求少承家學澹於榮利初好宋五子書已而徧讀諸儒先書輯其要為儒門法語又以入德之方莫先主靜大本立而後達道行濂谿之蘊發於延平默坐澄心乃其要領作密證錄又以寡過之方莫備於易喜伊川易傳兼採瞿塘來氏說旁通諸家纂周易集注居常閉關謝客雞鳴起出謁先師及家廟焚香宴坐有得輒發之於詩灑如也年七十五卒卒後八年孫啓豐復以會試殿試皆第一授修撰祖孫濟美為吳中盛事

增刪乾隆志

張登第字賡俞以順天籍中康熙十六年舉人授武進縣教諭持身端謹遇士以禮既去士

子思之祀名宦祠

吳門補乘

陳學洙字左原明湖廣提學僉事允升曾孫父衷悃自崑山徙長洲學洙少孤事母孝與弟學泗孳生相友愛肆力於學有聲文社康熙甲子舉順天鄉試以子璋貴遂不仕為人寬



厚而有特操妻劉氏早亡念同貧苦遂不再娶亦不畜婢妾戊辰會試主司徐乾學先期羅致諸名士有友約學洙往會行至中途忽自念曰吾生平未嘗有私請中不中命也半世守節老而失身可乎竟不往年八十二卒子璋字臨湘康熙甲戌進士選庶吉士授編修充日講起居注官歷遷侍讀學士提督順天學政

乾隆志

陸肯堂字邃升幼穎悟日誦數千言爲文信筆而成凌厲頓挫康熙乙丑會試殿試皆第一授修撰丁卯主試江西所得多名士充日講起居注官歷左右中允侍讀侍講朝廷大著作多出其手未幾卒年四十七

張伯行墓誌

長子秉鑑字冰言以吳縣籍登康熙癸未進士

次子賜書字宣穎康熙丙戌進士授禮部主事擢御史耿直敢言尋出爲陝西涼莊道調四川東道布政使司參議雍正朝命仍兼御史銜賜密摺奏字乾隆四年以疾告歸卒

於家

道光志

潘恬如字客先諸生其學切於內省聲光闐然以師道推重鄉里與彭定求尤侗爲友年八十以疾終先一日致書侗曰生吾順及吾寧到此覺真實受用也定求聞而歎曰潘先生

其知命矣乎

吳門補乘

張孟球字夔石康熙乙丑進士授山東昌樂知縣昌樂地瘠民貧孟球省徭役課農桑邑有起色入爲工部主事陞郎中出視雲南學政著廉明聲補河南糧驛道陞按察使護撫篆

雲南蘭陽縣有白蓮教煽惑愚民事洩孟球檄杞令甯佑扃城嚴索盡獲其黨有司概擬作叛孟球以愚民被誘與謀逆異分別核釋南陽守與遊擊某有隙守以賭博責營兵合營大噪縛守圍總兵署孟球嚴守禦得倡亂者七人其餘自首者免兵心乃定人稱其得大體

內陞京堂歸年八十卒子學庠紹賢並已丑進士應造乙未進士企齡戊子舉人景祁癸

卯舉人五子並登科甲吳中稱盛事云

縣志

文點字與也震孟孫幼能詩仲父乘殉難家盡破依墓田以居肆力詩古文辭兼縱筆爲山水人物年四十遊京師有欲以國子博士薦者點謝不可遂引去嘗舍蓮涇慧慶寺賣書畫自給巡撫湯斌屏車騎入寺問爲政之要點曰愛民先務在去其害如虎邱采茶府縣吏絡繹徵辦積弊有年公能除之卽善政矣斌乃伐其樹斌嘗謂曰聞先生止存田三畝何以爲饘粥計對曰菜羹蔬食足以安人性情堅人操行少或有餘將移所守負先世家誠矣斌稱善晚自號南雲山樵子赤字周鳥

朱彝尊墓誌

文揆字賓日從簡孫栢子志尚高潔不交當世所居停雲舊館傍老屋數楹庭植古松幽蘭

揆讀書其中終歲不出客至則使女僮謝之詩初學高岑後出入蘇陸顧需傳

楮篆字蒼書諸生遂於經學年既老同學者半為古人而篆以前明遺老抱遺經待人叩問

時比之伏生申公所居松吟堂不遠市廛翛然若世外前人碑版羅列棐几暇則作書求

者輒應康熙己卯南巡召見吳中耆碩於行在命篆書行草各一幅上嘉獎賜海鶴風姿

四大字時年九十三矣又一年而終元和縣志

金居敬字穀似士衡曾孫少敏才名遂於經史為文取法歸有光遊京師三十年屢躋場屋

嘗舉博學鴻詞又見黜康熙乙丑成進士年已暮矣知靈邱縣人吏浹和未幾卒於官通志

俞瑒字犀月通經史上下千百年徵引考據原原本本如燭照數計顧嗣立選元詩詩注韓愈

溫庭筠集商榷為多通志

張映葵字勤若弱冠補諸生從彭瓏吳愉遊有文名屢試不售康熙二十四年以拔貢選天

長教諭訓諸生以讀書敦行旬課月試次第甲乙歷寒暑無間一時來學者甚眾嘗攝縣

篆有廉辦稱以老乞休不及歸卒將葬天長門生有徒步數百里來會葬者徐陶璋傳

謝濟選字覺周諸生以經書友教吳中每講期聽講者環坐館舍幾不能容嘗謂學者於四子書宜先冥心搜索思路斷絕然後取宋元明儒先語證之其爲制義穿穴六籍不隨風氣弟子多相次取科第去而濟選獨不遇歿後門人祀之吳端仁書院中以少時從端仁

受經也

元和縣志

湯傅渠字子方康熙戊辰進士除清流知縣下車盡革里甲陋規驛遞悉歸官辦夢谿芹谿炭山羅村諸遠鄉歷年抗賦官吏無如之何傅渠單騎往諭曉以大義衆遂感服積逋一清居六年惠政甚多以母老力請終養既歸從學者衆評選制義重編明儒四書大全與前所纂四書合參春秋講義並行於世以侍母疾積勞卒年八十五

彭定求墓誌

顧楷仁字晉裴汧子康熙庚辰進士官雲南道監察御史居官盡職當稽察錢局商人辦銅不以時至或倡收廢銅鼓鑄之議楷仁謂收毀之間轉多隱弊不可不慮議遂止秋朝兩審取各省揭帖摘錄小冊自隨苟可平反雖獄成必力爭駁正父歿方羈官京師恨弗視含斂服闋終身不出初大父天朗哭母死一日兩喪其禮未詳徐尙書乾學張相國玉書酌定設位之次訃帖之序奠祭之主得變禮之正楷仁恐事久失傳箸兩喪行禮節略及

連幕圖以爲遭變之式性甘淡泊戒子孫遠紛華絕奔競嘗曰國奢示儉吳下尤急不必

問外論云何也年七十一卒 縣志道光志合纂

韓孝基字祖昭葵子康熙庚辰進士選庶吉士乞假歸旋丁父憂養母十餘年不離左右事

伯兄若父友愛諸弟無閒言雍正初召修明史以原銜食俸事竣移疾歸掌教紫陽書院

乾隆十六年春上南巡孝基年八十八矣召見行宮慰問者再自浙回鑾書家學者儒四

字賜之越二年卒子彥曾字瀝芳雍正庚戌進士官至洗馬孝基兄子曾字續古與彥曾

同舉鄉試治古文有聲乾隆元年薦舉博學鴻詞泗州學正 道光志

顧三典字有常少師兄希喆希喆敦崇實行不務名譽爲汪琬高弟古文根据六經 子求懿諸生力

學能文尤工書三典爲文超曠雄雋而一繩以法登康熙庚辰進士未仕而卒 道光志

何焯字岬瞻先世曾以義門旌學者稱義門先生少讀書數行齊下爲文才思橫溢天性耿

介廉於財康熙二十四年拔貢入都嘗及某公之門某公受要人指劾睢州湯文正公斌

焯上書請削門生籍天下快焉然卒以是潦倒場屋不得志最後爲李光地所知四十一

年康熙南巡駐涿州光地時撫直隸謁道左上從容問野豈有遺賢乎光地以焯對召試

命直南書房明年賜舉人會試下第復賜進士選庶吉士尋命侍讀皇八子府兼武英殿纂修然忌者滋多散館置下等得旨再教習三年旋丁外艱歸初悼選刻四書文行遠集數種及從光地遊得前明成弘先輩宗傳復選歷科程墨海內知名晚歲益有見於儒者之大原嘗歎王厚齋雖魁宿尙未脫盡詞科習氣五十二年再以光地薦召試赴闕仍直武英殿明年授編修又明年有構蜚語以聞於上者命收繫盡籍邸中書以進檢勘無狂謬語又草稿中有辭吳縣令餽金札上覽之怒漸解且嘉其有守僅坐免官還其書命仍直武英殿六十一年病詔賜醫藥未幾卒年六十二上軫憫命復原官超贈侍讀學士賜金歸葬命有司存恤其孤悼蓄書數萬卷參互鈎稽購宋元舊槧及故家善本細讎正之丹黃積數十過所校定兩漢書三國志尤精核乾隆五年侍郎方苞奏取其書付國子監爲新刊本所取正悼凡有評識必洞徹其表裏通核其時勢利病無一語無根據讀書論世精審絕倫所箸道古齋識小錄多刺取諸題識爲之最矜慎繫獄時門人意其中有忌諱語投諸火其讀書記五十八卷刻以行世得晉唐人法先正事略弟煌字仲友初隨兄往京師歸里後與蔣杲陳景雲輩以文字往來所居曰語古齋喜收舊籍遇宋槧卽一二殘本

皆購藏之平生校書頗富經籍而外若前後漢書說文通典流傳至今最著有國初說文  
汲古閣本毛斧季因筆墨小譌每多剗改致失宋版之真煌以朱筆糾正且譏之曰勸君  
慎下雌黃筆幸勿刊成項宥鄉見說文版  
玉裁跋阮文達校勘十三經註疏於公羊穀梁皆據煌  
所校宋槧官本又校孟子經註舊刻嘉慶時元和顧廣圻以樸學名家極稱煌所校本爲  
精碁云

張畹字蓀九布衣窮居郊外世緣半絕素交二三人外車騎造訪之弗接也論詩必溯源唐  
人以前有與爭辨者至而亦不顧或目爲詩癖爲詩愚乃大喜身後詩篇零落祇存移木

芙蓉植後圃一篇

國朝詩  
別裁集

徐昂發字大臨少負才名博學工詩兼精書翰爲時所稱康熙庚辰舉進士由庶吉士授編

修提督江西學政

乾隆  
志

汪份字武曹明廣東布政起鳳曾孫年十四隨大父希汲沂州知州任希汲以官逋繫獄份  
侍側讀書連日夜不輟獄吏奇之爲文辭氣雄邁康熙癸未成進士選庶吉士丁繼母憂  
歸築室城東隅家居近十年癸巳授編修甲午典廣東鄉試辛丑冬督雲南學政未之官

卒年六十七當丁卯戊辰間吳中以文學知名者份與常熟陶子師同里何焯稱最皆與桐城方苞遊時同郡司寇徐乾學司成翁叔元方收召後進所善名立起舉甲乙科若操券然三人素遊其門並自矜重不求親昵士以此重之份氣和而性伉直遊太學時嘗與益都趙執信會廣坐中趙年少負才名傲睨一世份憤發面數其過失趙雖交訐而氣爲之奪方苞初之京師見時輩言古文多稱錢謙益嘗私語份收齋文穢惡藏於骨髓一如其人效之不可滌濯子師與焯皆不謂然份亦訝之既老乃曰今而知望溪非過言也

先正

略事弟鈞字右衡康熙壬午舉人句容教諭善屬文嘗箋注陸宣公集士鉉字文升工詩古文尤善書法行楷秀逸獨步一時康熙丁丑會試第一由庶吉士授編修入直南書房官

至左中允從弟倓字安公弱冠文名藉甚康熙辛未進士官編修蚤卒

乾隆志

吳廷楨字山掄夙慧工文康熙丙子舉順天鄉試以寄籍被黜己卯康熙南巡廷楨獻迎鑾詩得復還舉人奉召入南薰殿癸未成進士選庶吉士授編修歷諭德纂佩文韻府月令

輯要兼教習進士以勞卒官

通志

張大受字日容其先嘉定人祖徙長洲父慶孫順治甲午舉人廬於匠門谿上聚徒說書學



者稱履素先生大受弱冠卽以能文受知韓菼康熙庚午舉於鄉是科江南得人最盛而大受闈墨尤傳誦天下數上春官不第名日益起四方造門講藝者無虛日大受亦勤於接引喜獎借以故人彌親附焉己丑始成進士選庶吉士授檢討庚子主四川鄉試比還道奉命視學貴州黔中荒陋大受教諸生以讀書之法設書院義學爲置田資膏火拔士之尤者給之風氣爲之一變雍正聞其有聲命再任未幾疾作卒於官大受詩文超雋人尤愛其駢體弟士琦字天中康熙甲子副榜知永新縣有善政坐事去官民爲罷市亦能詩又諸生陳震字彥瑜大受女婿也從何焯游工書法能詩性孝友篤於交道臨川李紱

撰墓表極稱之

乾隆志

徐梅字若霖居貞豐里授徒洞庭東山愛湖山之勝尤愛葑山荷花曰此藕花深處卽予家也僑寓十年而歸爲人敦友誼重然諾長於古文詩宗唐人集唐句如出天然少與張大受何焯吳士玉諸人遊後諸人皆顯而梅以一衿終

吳門補乘

劉石齡字介于龍光子七歲卽能誦二都兩京諸賦及長篤嗜古學以能詩名尤工五言嘗北游恆岳南窺衡湘踰大庾登羅浮探奇歷險發於詩歌晚年詩益清遠奇麗韓菼陳元

龍欲薦之朝力辭以布衣終

乾隆志

陳鴻熙字賡載康熙辛卯舉人選授廣東樂昌知縣雍正元年調順德鹽務舊屬商辦會總督孔毓珣奏請官銷部議允行而順德尤積弊難理乃爲定官價平其直多設漿船巡海口私販罷而引通丁未歲饑勸富民捐賑自捐俸以倡擢廣州府理彘同知陞韶州府知府韶州多深山密箐彘獷悍而貧時出爲盜鴻熙設法給資督以農務其不率者繩以法彘人感德畏威不爲患十年擢兩廣鹽運使粵中竈戶苦稍食不足額每將餘鹽減價私賣引鹽壅滯商人因餽遺多輸餉屢後期鴻熙邵商人餽遺更按額量加竈戶稍食於是引鹽銷而餉如期會於讌會觸上官之忌妄以私貨征息密奏欽差侍郎吳應棻等至粵鞠理衆商號哭稱冤據情入告命往雲南以知府用乞養歸奉母居杭州五年返蘇以疾卒年五十五子樹華能詩精於左氏春秋

宋邦綏傳

王世琛字寶傳

縣見吳

六世孫父銓字東發康熙庚午副榜累官禮科給事中敦氣誼重然

諾善繪事書法世琛風度恬雅工詩文兼善書畫得父筆法康熙壬辰殿試第一授修撰雍正初充實錄纂修官晉侍講督山東學政勸實學斥浮僞青齊文體一變累遷少詹事

視學未竣以勞卒官

通志

徐葆光字亮直康熙四十四年南巡以諸生獻詩賦被取至京舉戊子順天鄉試壬辰會試不售欽賜一體殿試以第三人及第授編修五十七年奉旨充冊封琉球副使賜正一品麟蟒服葆光長身玉立儀度秀偉詩文雅贍兼工書法喜交當世文人名滿一時其使琉球撰中山傳信錄六卷考據精博爲向來未有歷二十餘年不遷以病告歸卒同邑蔣深字樹存工詩能書畫與葆光相善由國子監生以薦纂修書畫譜佩文韻府等書授餘慶

知縣終朔州知州

乾隆志

顧嗣立字俠君子咸子康熙己卯舉順天鄉試以修書勞議敘內閣中書壬辰賜進士選庶吉士逾年散館當外補未就而歸嗣立博學洽聞尤工於詩所居秀野堂疏池疊山環植竹木常集四方名士觴詠其中輕財好義家以日貧而風流文雅照映一時所選元人詩初二三集注昌黎飛卿二家詩詩林韶濩皆盛行於世

乾隆志

顧承烈字念楊華亭籍增貢生康熙壬辰召試爲內書房纂修官戊戌成進士選庶吉士充

古今圖書集成館副總裁致仕後隱居上沙因樹亭

道光志

蔣杲字子遵燦四世孫康熙癸巳進士歷戶部郎中廉敏勤慎爲諸曹最出知廉州府寬厚持大體而剖決明銳庭無滯訟上官皆重其才守輒檄攝鄰郡事所莅俱有聲以罪誤罷用薦監修海神廟工垂竣而卒杲少從何焯游文學博瞻兼長吏事未竟其用人多惜之

志通

李錦字綱文康熙乙未會試第一爲文融會先儒理蘊上宗王唐歷官翰林院侍讀雍正壬子主試湖北與修康熙朝實錄充文穎館纂修嘗引周禮條奏六事納監請在戶部收捐造倉廩以實積貯廣建書院造士賑饑請彙銀米詔旨俞允以疾乞歸終歲不見賓客不涉長吏庭卒年七十二弟文銳字鼎臣與錦同舉乙未進士殿試二甲第一人入翰林文名相埒乙卯典河南試與錦同修實錄嘗奏保舉人員及大臣蔭子將有理人之責必試以策論各一觀其指陳他日任民人社稷庶不同刀筆筐篋之吏上從之官至司經局洗

馬卒

志縣

尤秉元字昭嗣侗曾孫康熙甲午舉人出知四川樂至縣舊有鹽井井廢稅存力請上官除之山田苦旱築塘堰以資蓄洩社倉在城民艱運分建四鄉以均道里之遠近生平節儉

寡慾三十喪偶獨居三十餘年旁無媵侍公退焚香默坐閒賦小詩見者疑爲枯禪居鄉不與外事乾隆十四年卒年六十

潤道光志

徐陶璋字端揆源後康熙乙未殿試第一授修撰陶璋居心和厚學問醇實時論以公輔期之而恬於榮利乞假歸杜門掃軌研精經學晝夜不倦乾隆元年補前職纂修雍正朝實錄以病卒於京兄模戊戌進士亦以文行稱

乾隆志

陳景雲字少章吳江縣學生少從何焯游博通經史淹貫羣籍長於考訂凡譌謬處能剖析毫芒焯於及門中推爲異友性孤介游京師試不售年甫四十以母老遂不復出藩邸及大吏以禮敦聘俱不赴窮老杜門手不釋卷年七十八卒

乾隆志

顧大鵬字蒼羽歲貢生體氣素羸父歿哭不絕聲踊無數親屬前抱持之不能止比斂昏不知人強以湯飲進而蘇至七日匍匐一匍頓仆遂絕嘔血灑地斑斑如漬金石磨刮不可去大鵬早有文筆與里中高材生楊繩武陳景雲等以古今之業鏃礪馳騁然不辨於口故知之者少

何焯傳

謝志發字雲翼父文昌長於經學志發紹述之四十後專工詩晨夕苦吟每一詩成常三五

易稟

乾隆志

子有輝字立夫中雍正甲辰鄉試為懷寧教諭課士有方五年膺卓異知浙之

縉雲縣盡革陋規衙齋蕭寂至種菜自給凡二年以勘災中風寒病歿縉雲數廉吏至今

首屈一指焉

縣志

徐夔字龍友縣學生如珂

見吳縣

元孫能文章兼王詩歌有聲藝林家貧館穀不足供母甘旨

遊京師僻處蕭寺不謁貴人居半年無所遇歸惠侍講士奇視學廣東邀之往歿於其署

抱才抑鬱吳中人士咸悲之嘗箋注李義山詩王尚書士正精華錄極其典核有凌雪軒

詩稿其女刻以行世同時有顧紹敏字嗣宗歲貢生與夔友善年長於夔好以古文筆法

為時藝以是屢躋場屋詩古文皆溫雅拔俗嘗事聘修元和縣志與沈德潛分撰人物志

凡故家名德諸傳皆出紹敏手云

長元二志合纂

張錫祚字永夫始居南園後徙葑門之歸村再徙木瀆下沙塘屋不過三楹筇屐書卷外無

長物人比之東野移居客至不著冠對素心友齒在已下者不讓坐性好為詩終日苦吟

或晨突不煙詠歌自若年五十二歿無子友人謀葬於靈巖山麓高士陳炳題其碣曰詩

人張永夫墓

縣志參元和縣志

周準字欽萊諸生世居甫里中年遷吳之臨頓路生平無機事機心刻苦爲詩不事生產陳培脈字樹滋少負俊才與諸才士角逐名場老於諸生詩宗盛唐爲新城王士正所賞

和元

志縣

任時懋字又新少爲諸生有聲庠序康熙庚子舉鄉試辛丑試春官不第歸教授生徒不復就試吳中文章風尙漸衰時懋嚴守正軌不撓不惑對朋友恂恂如不出口及臨講席判剖黑白洋洋灑灑不留疑似生平篤於孝友婚嫁弟妹傾橐不吝人高其行郡庠生顧章高才年少美風姿已聘室矣讀書古寺中有貴官女入寺經其書齋見箸述欲委身事之章以非偶遁免時懋重其行禮之如嚴師章歿爲位以哭

志縣

許廷鏢字子遜康熙庚子舉人官福建武平知縣邑與粵之平遠接壤以分水坳爲界平遠豪族強佔坳北田廷鏢按圖勘理界始定罷官人歌思之先爲粵秀書院山長識陳宏謀於諸生中許爲公輔器後宏謀官於吳謁見不納相遇於烏鵲橋見之廷鏢曰所望賢者爲好官不負平生志學爾性豪放論史事慷慨激發尤善弓馬刀槊詩才綺麗歸田後時

與沈德潛輩往來

道光

蔣恭棐字維御一字迪甫先世自廣陵徙蘇州高祖燦由進士官至天津兵備道恭棐生四歲卽通四聲讀書過目不忘十歲爲文章有奇氣十四入學時華亭張文敏公照亦以五經受知學使者江左文士矜奇炫異而張蔣兩人獨守先正矩矱所爲文流傳都下安溪李文貞公見而歎曰是今日之思泉震川也康熙五十四年會試既中式以廷試違式落第歸益肆力於古至六十年成進士入翰林充玉牒館纂修官以父老乞歸里居七年極色養之樂乾隆初再至京供職充大清會典五朝國史館纂修官無何以原官休致盧見曾爲兩淮運使延主安定書院卒於揚州有詩文集詩文無專師於唐宗少陵義山於宋愛廬陵臨川藏書數千卷皆手評數過

錢陳羣傳

沈虹字衛梁雍正丙午舉人官句容教諭乾隆元年薦舉博學宏詞時吳縣陸枚字實君亦薦舉宏詞試罷以歲貢生終

志府

彭啓豐字翰文定求孫鄉舉之歲芝生庭中故自號芝庭雍正丁未會試第一殿試卷列第三世宗親擢第一授修撰旋直南書房歷充河南江西山東鄉試主考官乾隆三年遷翰林院侍講時許近臣奏進經史講義啓豐所上多切於治體嘗因論通鑑宋雍熙二年求



遺書事請廣採宋元以來諸儒遺書切於理道者呈進傳刊以惠士林詔如所請六年充江西鄉試副考官督學浙江歷陞通政使左副都御史內閣學士刑部侍郎任學政如故任滿還京奏論浙江利病四事一餘杭南湖之水發源天目注苕溪下灌杭嘉湖三府今沙土淤塞侵占者多西湖之水灌田萬頃今湖水淺狹葑菱蔓蔽其他會稽上虞餘姚慈谿諸縣之湖僅存其名難按其實夫水利不修則農田不治請敕下督撫酌議次第開濬之法一浙省收漕每石私加五六升至一二斗不等宜設法嚴禁一浙省官水陸往來其奉使馳驛者所用夫役有兵部勘合可稽而本省向無定額多者役及千夫少不下六七百人驛騷實甚宜加限制一溫台諸府斥鹵產鹽多有營兵以搜鹽爲名按戶迫索或將數家食鹽并少報多指爲私販送官邀賞亦宜嚴禁章下所司議令責成督撫凡諸湖蕩俱飭屬詳勘其漕鹽驛諸弊分別整治丁父憂歸十五年赴京補吏部右侍郎明年五月進見時高宗詢知啓豐母年高賜慈竹春暉扁額八月再出督學浙江尋乞終養母喪服闋入京仍直南書房二十七年秋充浙江鄉試主考官其年遷左都御史六月陞兵部尙書充經筵講官奏請疏通候補參將都司等官三十年秋充順天鄉試主考官時蔣史兩

侍郎有隙蔣訐史於上前且謂史於衆中詆尙書彭某高宗召問以弗聞對奉旨申飭罷史歸而降啓豐右侍郎三十三年京察以原品休致督撫延主紫陽書院三十五年冬入京祝皇太后萬壽詔與香山九老會繪圖賜杖四十一年春至山東迎駕復尙書銜卒年八十四啓豐生平坦懷接物徹去町畦意有不可或時面折人然已過輒忘以故人樂與之親爲詩文操筆立就既成必使人盡意抉剔俾無憾乃已所刻古文既出邵武朱仕琇歎爲規矩天成不煩繩削建昌魯仕驥尤盛稱碑版之文以爲虞伯生後一人而已子紹謙乾隆丁卯舉人歷任山東陽穀茌平新城章邱汶上知縣在新城於青沙泊築隄禦水民稱彭公隄在汶上導宋家窪水分洩於諸湖居民稱利終桃源同知紹觀乾隆丁丑進士選庶吉士授編修歷官侍讀學士在史館二十餘年諳悉掌故隨時間答無少舛竟歲纂集無間寒暑論者比諸唐吳兢元歐陽原功紹咸增貢生早卒紹升自有傳紹謙子希韓乾隆乙酉舉人

道光志

宋壽圖字南衡大業子九歲能作擘窠大字少孤外家王氏爲援河工例選永平府同知奉檄查北五府驛站時夫馬多缺額臨事雇募強取民間畜壽圖至先覈夫馬實數次革濫

應折給之弊天津初設水師營造戰船募工於浙三月集事且令教肄津工其後歲修不煩遠募京畿官田數百千頃豪猾倚勢爲奸貧民不得佃壽圖盡撤去之尋調真定府同知題授保定知府十三年擢清河道旋調通水道通永木稅向無例榜至是設之視太重者減之嘗閱視河工以爲治水之道在蓄洩得宜潮白溫榆諸河之水由密雲順義經北運河以達天津白溝兩淀之水復從千里長隄合子牙河由天津入海聚多洩少鮮不橫潰因於筐兒港青龍灣二處詢耆老具方略疏洩異漲加築壩工乾隆二年六月大雨河西務北隄且潰壽圖亟募民築新隄躬負土爲倡畚鍤雲集甫成而舊隄潰是秋復苦澇寶坻諸村尤甚壽圖核災民以十三萬戶口報上官嫌其多壽圖力爭乃許調往雲南補迤東道督濬金沙江勞績居最十二年金川用兵往軍前總理臺站兵罷乃旋尋卒於官年五十一後半月奉命遷按察使已不及聞矣

彭啓豐傳

沈謙字去爭幼師事何義門雍正己酉舉人考取內閣中書深爲大學士鄂文端公所許以父憂歸遂里居養母引疾不出年七十有七卒謙爲文千言立就辭旨婉麗近張匠門書

學顏魯公尤負盛名於時

府志引陸燿墓誌

周範蓮字效白雍正庚戌進士入翰林典乙卯貴州鄉試乾隆元年出知嚴州府土瘠山多緣谿田不可種地征如故建德尤甚範蓮履勘得實力請豁免桐廬災躬親賑卹賦重者請減舊額三之二淳安前直新安江水捍隄壞範蓮築新隄禦之尋調紹興府嚴州士民立去思碑與思范亭相望焉至紹興修江塘海塘清釐夏蓋湖官田濬餘姚汝仇湖郡大水上虞水及城垣觀察往勘饑民譁擾範蓮卽日發賑治爲首者一人衆乃服又築榆柳利濟二塘以工代賑存活甚多署甯紹台道旋以失察罪誤議鐫級乞養歸丁母憂服闋授南甯府同知署安定府卒於官年六十五年光緒乾隆己亥舉人官休甯教諭

道光志

宋邦綏字逸才照子乾隆丁巳進士選庶吉士父憂七年散館授編修充甲子河南鄉試正考官遷侍讀督學湖北旋丁母憂服闋充日講起居注官尋授四川東道二十一年遷河南按察使陞廣東布政使調山西二十七年擢湖北巡撫三十年授廣東巡撫奏請於鬱林等處山嶺土坡履勘勸耕酌借牛具籽種以盡地利又查出軍田十二萬餘畝給土勇狼兵戍守有資上嘉勉之鎮安府屬之小鎮安界連安南匪犯黃副團等糾衆滋事邦綏飭屬捕獲置之法奏革土巡檢岑純武職怕懷隘爲小鎮安門戶添設把總一員兵

十五名士勇二十名兼轄那波等村下部議行三十二年授兵部侍郎署倉場調戶部三

十五年卒

節道  
光志

宋英玉字應璜壽圖子諸生初知直隸新樂縣民有慈父之頌調吳橋緝獲巨盜馬癩子等  
寘之法境內肅然署東光地當河衝伏汎久兩山水暴發決口一百餘丈英玉親歷河干  
堵禦三旬而隄固遷河間同知署蔚州地多虎患下車日禱於城隍神一月中斃四虎民  
賴以安歷廣平順天順天屬邑文安本水鄉積淹民田周圍百八十里英玉設法疏濬涸  
出良田千頃陞正定知府謝保定陞通永道旋以屬邑旗租不及格挂吏議罷歸卒於家

年六十四

道光  
志

朱林字鄧雲少有神童之譽受業於金孝廉天倪讀書一過成誦而必滿百遍故所業終身

不忘年十三補縣學生工制藝試輒冠其曹爲中丞徐公士林所賞年二十有三卒

全上

沈德潛字確士先世自吳興竹墩遷居蘇州德潛初徙木瀆後居郡城爲諸生學詩於吳江  
葉燮燮數稱之新城王士正亦教書於燮稱許德潛詩桐城張廷璐督學江南尤器之乾  
隆初舉博學宏詞試罷三年始舉於鄉年已六十六矣明年己未成進士改庶吉士散館

廷試高宗見其年老詢之知爲江南名士授編修旋召至內閣命和消暑詩十首稱旨自是上作詩多命屬和累陞少詹事典中子湖北鄉試十年遷詹事上召見與論詩學源流因謂曰張鵬翀才捷於汝風格顧不及汝明年三月晉內閣學士請假歸詔封其三世賜詩寵其行六月還朝授禮部侍郎入上書房十三年充會試副總裁先是京察時德潛以年老乞休舉齊召南自代至是病瘖命解職專理上書房事明年上憫其年老准致仕俾校讎御製詩集卒事乃行上謂廷臣曰朕與德潛以詩始以詩終矣家居二十上年上常賜詩及諸藥物慰問德潛嘗進詩集求序上欣然許之十六年命食原品俸尋加尙書銜再加太子大傅食一品俸賜其孫維熙舉人再入京就皇太后萬壽與香山九老會上命工圖像親作歌以紀之德潛旣以詩受上知其所奏進陳善納忠於閭閻息耗四方水旱壹見於詩上嘗賜詩嘉勉之晚歲主紫陽書院以詩文導後進有一藝者必獎成之性和易與人交不爲町畦不爲逆億詩法盛唐以杜甫爲準的所選漢魏六朝唐明詩數十卷學者宗焉卒年九十有七詔贈太子太師入鄉賢祠予祭葬諡文愨卒後十年因東台已故舉人徐述夔詩詞悖逆德潛曾爲之序牽連追奪

道光志

顧詒祿字祿百進士三典從孫爲沈德潛高足弟子德潛及門中盛錦以詩鳴詒祿以古文辭鳴人比之韓門黜籍德潛乞休後詒祿權記室凡應酬之作皆其所捉刀詒祿偉軀能言爲人排難解紛有魯仲連之風

道光志

陳魁本姓吳字經邦歲貢生家貧僦居陋巷三旬九食詠歌不輟性介不妄交體羸善病而詩筆適健沈德潛周準皆器之卒年八十有一

上全

蔣重光字子宣燦四世孫少有異稟既長爲諸生恂恂安雅敦孝弟好讀書師同里沈德潛甚謹一時同門諸名士交相引重切劘文術益自奮於學屢試南北闈不售中年得末疾讀書不輟藏書甚富乾隆三十八年詔開四庫館徵四方書時重光已歿子曾瑩檢其所審定祕書百種進御天子嘉之敕賜佩文韻府一部親製七言詩書於所進職官分紀之首美其好古復惜其不遇人莫不整之弟含光字子宏貢生亦以文行著

上全

張冷字浣心貞豐之峽港人長於詩文居陳湖濱筆牀茶竈釣具孤篷自得其樂與甫里先

生相似著有鷗莊集

貞豐志

周明德字希白年十二爲文出語驚人南北鄉試不售以薦卷充四庫館謄錄議敘縣丞發

蜀省補用歷參戎幕嘗隨大帥至西藏西域人死不葬鬻割以喂鷹犬明德請於駐藏大臣和大司空琳出示嚴禁指荒山爲義冢夷民感動俗遂革藏中向無痘症間有一二卽棄山谷明德又請於大臣設立藥局凡患痘者卽赴局調治保全甚衆又隨至苗疆生擒首逆吳半生撫輯降苗並拿獲天主教匪德三嗎爾大邑縣謀叛首領王應龍杜潮舉武功卓越他如革地稅興書院建城郭置義冢循績炳著告歸日民勒碑以志去思製蓋相送數里不絕性孝友事親能先意承志與弟友愛始終無間才極英敏倚馬萬言可立待歸里後凡有益鄉里之事皆肩任不辭歷官由四川富順縣縣丞洊陞至永甯道改授內部員外郎著有內省錄苗民圖考樸園詩文集卒年七十有四

石韞玉  
墓志銘

尤世學字武書以樂善好施例選宿松縣丞乾隆十一年婺源被水災上官檄運安慶諸屬常平米振之自鄱陽泛舟至彭澤遇大風蕩舟衆皆失色世學曰此米乃億萬民命所託聖天子仁心實加被焉其必無患乃祝曰湖神有靈急來相視頃之風定遂挂帆而渡既至婺源知縣卽邀入官舍置酒張樂謝曰災黎未撫其敢宴飲爲樂乎遂納米於倉曉示居民翌日盡散之調臨淮歸家居再出選南城縣丞三十年江西大水建昌米價騰貴請



發常平社倉米萬餘石平市價從之市價以平是歲攝縣事明年以疾乞休去官日閣縣人置酒街衢或獻萬民衣及繖同官送者相顧語曰此愛民實效也

采訪稿

陸錦字素絲躬行孝友教子義方兩舉鄉飲大賓著有秀眉堂詩稿周易統宗

甫里志

馬萬字士延性不諧俗貧而介詩古文詞並臻妙品有旃檀閣集西山拾翠虎阜芳蹤填詞

行世

上全

張一槐開染店嘗中夜有人從屋簷隙下聞喘聲燭之乃里人子也貽布二疋錢一千勗其改行好言遣去始終不以告人後一槐年八十餘終其人已成小康特至靈前泣拜不休

或詢之曰全名活命之恩不可忘也

貞豐志

李繩字勉伯

同治府志作綿伯

世居莊渠後徙郡城舉乾隆六年鄉試選雲南恩樂知縣甫一載以

病乞休大吏留主五華書院繩早慧年十二卽好爲詩沈德潛見而異之令受業於門既

長遂以詩名吳中平生篤於倫紀其見於詩往往忠厚悱惻得風人遺意

吳門補乘

顧顛遇字未穆乾隆辛酉舉人幼有至性失母哀毀如成人長而好學爲文湛深經術會試

入都館於虞山蔣氏不干以私其課徒循循善誘每謂人曰吾日暮則計一日課程問心

無愧然後卽安晚歲孜孜理學專務克己省身年六十餘卒

道光志

陸桂森字廷儀號澹明居士乾隆壬戌進士官上林知縣未久卽告歸幼慧有神童之目十四入邑庠蚤登科第聲名藉甚後生執經受業者數百人錢槩以三元及第其尤著也子錫嘉字肇宇績學工文乾隆壬午舉於鄉官全椒教諭無爲州學正

上全

蔣元益字希元杲子乾隆乙丑進士選庶吉士授編修官至兵部右侍郎再充鄉試正考官三督學政戊戌京察以原官休致主婁東書院移主紫陽書院戊申卒於家年八十一祀鄉賢祠元益夙慧於書無所不讀乙丑會試卷進呈時名列第七高宗賞其清真改第一官御史時不輕建言癸酉秋上請更河臣一疏未幾南河決遂受主知素習騎射督學時校試武生最爲得人己丑奉命教習庶吉士向例庶常每月分課惟二八兩月大課元益改爲間月大課是科留館者多遂爲玉堂故事

上全

褚寅亮字播升九歲能文通九經大義乾隆十六年南巡召試賜舉人授內閣中書從梅穀成講算學遷刑部主事丁父憂服闋補員外郎明於律尤戒深刻研鞫無冤濫侍郎杜玉林嘗以疑獄屬之尋以疾假歸掌教常州龍城書院寅亮中年覃精經術宗惠氏之學一

以註疏爲歸三禮折衷賈孔尤通喪服時公羊何氏學久無習者惟武進莊侍郎存與默會其解而寅亮能闡發之世稱爲絕業至天文推步測算尤有神解嘉定錢大昕以所著三統述衍相質寅亮正其誤數事大昕服其精審乾隆五十五年卒年七十六上全

余蕭客字仲林一字古農年十五通九經尤耽古籍聞有異書必假鈔錄輯註雅別鈔專攻陸佃蔡卞就質惠棟棟曰陸蔡乃安石新學不足辨凡論著當務其大者蕭客遂請爲弟子同邑朱奐藏書甲吳中館之滋蘭堂因得博覽手一編常終夜不寢遂患目搆一室無牕戶上穴一方以通天光光修凡周室書冊鱗比潛心研究嘗慨漢唐諸儒舊註多散佚乃會萃各家輯古經解鈎沈直隸總督方觀承聘修畿輔水利志間至京師與朱筠紀昀善咸稱其學在王應麟顧炎武間因目疾劇薦休寧戴震踵成之蕭客狀貌奇偉頂有兩肉角疏眉巨眼口侈多髭如世所畫鬼谷子云乾隆四十三年卒吳門補乘

錢策字萬言中諧見吳縣曾孫乾隆甲戌進士兵部主事遷員外郎出爲九江知府府濱湖帶

江盜賊出沒無常策設法搜捕得其魁奸宄斂跡屬被水災請帑賑卹民得以蘇調南昌知府修築沿江圩岸石礮以護民田葺一軒於郡齋西偏取白樂天詩三年典郡歸所得

非金帛天竺石兩片華亭鶴一隻名曰鶴石自號鶴石居士旋擢吉南贛寧道地界閩粵山谷深險易於藏匪策嚴立保甲稽察周密數郡晏然修贛州濂涇書院延師課士兼管關稅安靜無擾商民稱便署江西按察使適值秋審斟酌平允是年九卿會勘江西獨無一改駁者既以在九江時保舉屬員不當部議降調有旨送部引見便道旋里遂引疾不出策性孝謹事母待弟與從子人無間言生平寡交游罷官歸杜門不與外事焚香讀書而已卒年六十

錢大昕傳

褚廷璋字左峨少稟異質乾隆十八年選貢授太和教諭二十二年迎鑾獻賦召試賜舉人以內閣中書用充方略館纂修於準夷回部山川風土最爲熟悉奉敕纂西域圖志書成賞緞二匹接纂西域同文志并通等音字母之學二十八年成進士選庶吉士授編修累遷侍讀學士尋以大考降官母憂歸僦居崑山未幾卒廷璋以文章受上知三典省試四校禮闈視湖南學政所至以得人稱奇豐額熊枚皆出其門下詩初學青邱既學元白書法出入右軍大令間性好推解姑適顧姊適高孀居無依攜養京邸故人顧虛齋窮而來歸生館死殯不少吝其厚德類如此

吳門補乘

周敬侯字伯恭國學生純孝性成積學稽古精醫理及奇門六壬卜筮之學宋冢宰榮撫吳

重其行遇事必式其廬咨訪舉鄉飲大賓陳鵬年墓志子維新字介祉貢生立品端介工書畫

喜撫琴好游足跡半天下曾幕游河南上治河瑣言并繪南河水道於河督張文端鵬翮

著有桐花館詩文集憶園叢鈔盛錦墓志

孫嘯字淡于少工制藝旋從李耘圃學詩性高介善奕棋嘗游揚州作探梅詩云一聲瘦鶴

月初上萬里蹇驢風正寒故人稱爲孫瘦鶴所交若尤文叔彭秋士皆一時名宿顧承吳門耆舊

記

李友杜字升九總角能詩爲沈歸愚宗伯所賞家甚貧旅館養母以孝聞於鄉三十餘無所

遇益肆力於詩後從陳雪竇游爲社中巨擘嘗手輯國朝詩八十餘卷續宗伯所選別裁

集後事未竟而卒著作散失金匱錢泳從敗紙中得詩數章綴以小傳梓行於世名曰澹

湖遺稿許墅關志

彭紹升字允初啓豐季子讀書慕高忠憲劉遺民之爲人忠憲講學地名東林廬山遠公社

亦名東林故自題其居曰二林中乾隆二十二年會試與兄紹觀同榜紹升年未冠啓豐

懷盛滿之懼故紹觀入翰林而紹升以疾歸旋丁母憂二十六年補殿試以知縣用不就  
選紹升少負經世志思有所建樹既以王路蕩平庶職受理諸兄任內外故遂韜伏家術  
一意讀宋元明諸儒先書由程朱而陸王以其餘力爲詩古文辭久之折而入佛斷肉食  
嚴戒律究心於內典最深既丁父憂閉關密課設近取堂以周士族施衣施棺放生次第  
舉行又置潤族田若干畝宗黨賴之嘉慶元年卒年五十有七

道光志參  
二林居集

錢近仁先世崑山人父母早喪貧不能自存寄食攻皮家遂習其業少長與塾中兒游漸能  
識字工作外讀書日夜不輟苦無書乃遍歷書肆及古寺院爲之傭不取值因得借觀羣  
書積四五十年凡經史子集九流百家流覽幾遍尤致力於孝經論語人稱之爲補履先  
生性樸訥不妄取一錢嘗於道上拾遺金數餅待失者至還之所居老屋半間貯破書萬  
卷無几榻鍋釜之屬彭紹升汪元亮過之歎爲沈麟士一流人乾隆壬子飢餓不能出門  
戶諸生王丙迎至家臥病百餘日而卒年七十有六無子郡中士大夫謀葬於虎邱西麓  
巡撫汪志伊題其碣曰錢處士墓

吳門  
補乘

彭績字秋士行先四世孫父景騷修長者行績少端植如偶人長而耿介不蹈非禮意所不

可雖千金弗屑也嘗一應縣試喧沓中斂手視日景遂投卷出自是絕意科舉而并力爲詩精靈超變不可方物未嘗數數爲文然有作輒工上全

沙維杓字斗初居下津橋

下津橋南爲長洲縣北爲吳縣

隱於商來往江西湖北長髯巨類如酒豪劍客詩

多悲壯激發之音哀枚賞其花氣半湖陰五字謂得五言佳境同里張岡字崑南隱於醫

豐頤紅頰神情怡曠好古琴詩多清和閒適之趣

湖海詩傳參隨園詩話

沈執中字立方增廣生先世自苕溪遷蘇州居葑門外之官浦執中屢赴鄉試不售年五十

餘不復應科舉時時鍵戶息心調氣題其室曰心太平居作太平吟四首以恬淡虛無分

屬焉同里陳子瞻性褊急有一子督責過急逃逝別居睽隔十年一日子瞻來讀恬淡虛

無詩恍然自失執中爲推言萬物一體之意子瞻感激涕流引咎自責由是父子宿嫌頓

釋執中卒年八十

彭紹升傳

曹炳市衣幼失學年二十餘猶爲人傭保後乃自知讀書遂以經教授鄉里不爲舉子業博覽強記祇以資爲詩性樸野足跡不接於貴人之門故世無有知之者仁和宋助教大樽見而奇之爲之延譽時錢塘袁大令枚以才力奔走一世或勸炳挾所業往可借以起名

炳笑不答年八十餘卒

吳德旋初月樓聞見錄

許名崙字蘊源甫里人國學生瀟灑有晉人風天姿穎悟自經史子集旁及釋典無不淹貫

工詩賦善楷書兼擅詞曲西林鄂相國搜羅奇才異能卷拔取冠軍所著文載南邦黎獻

集宮保高公撫吳舉博學鴻詞未仕有松鱗集行世

甫里志

于令儀字景樊相城人世業農家小康父命之讀延沈德潛至家為之師後入邑庠領鄉薦

為名孝廉同里陳景韓字秉德先世亦業辦幼時牧牛施姓墳畔見柏樹結子圓而碧取

玩之內有墨文曰蟾宮妙品因棄耕就讀游沈德潛門領鄉薦出宰四川某縣有政聲又

與同里陸肇域字豫齋嘗建先世甫里先生祠于虎邱下塘撰虎邱志若干卷施守基字貫

伯為明正統間狀元施槃之裔以德行重於鄉里二人並與沈德潛善

採訪稿

盛林基字嘉蔭乾隆己卯舉人歷官江西樂安知縣雲南新興知州威遠同知署臨安澁江

知府乞養歸其署南昌同知也有臨江客自湖廣回被船戶沈於江擒治伏法遠近稱神

其任威遠同知也向例鹽井滯塞竈戶預支薪本修治按月扣歸公款林基捐銀二千餘

兩修砌完固免其坐扣卒年六十三

道光



章棠字蔭南乾隆己卯舉順天鄉試會試闈卷溢額拔授內閣中書入軍機處行走授起居注主事調兵部職方司充方略館纂修兼提調三十九年陞武選司員外郎是年九月山東壽張民王倫爲逆上命大學士舒赫德提兵赴勦奏棠隨行棠治辦軍書百函並發事平巡撫楊保奏留補授濟東泰武道署按察使四十一年調補鹽運使惜商省費才譽翕

如署布政使事勤於職業纖悉必親以勞瘁卒年四十四

陸耀行狀

吳泰來字企曾乾隆庚辰進士二十七年迎鑾獻賦召試以內閣中書用泰來意致蕭閒才

情明秀有別墅在木瀆曰浚初園其中藏書數萬卷多宋元善本日與江浙名流爲文酒

之會作詩一本漁洋吳中數十年來自沈德潛外無能分手抗行者

吳門補乘

汪元亮字明之少工制藝年十八受知學使者夢麟有聲庠序通經史兼漢宋之學善詩古

文詞乾隆壬午舉於鄉與戴震任基振善又與同里江聲交往來討論相切磋焉五試禮

部不遇後得心疾遂歸時嘉定錢大昕主紫陽講席金壇段玉裁嘉定王鳴盛皆寄居吳

門各務著述元亮嘗曰今漢宋二學若有門戶疆界其實宋論理漢考制度名物皆不可

廢安得大聖人出而論定以息諸家之喙乎歿後遺書散佚論者惜之

道光志

宋鎔字亦陶英玉子乾隆壬辰進士由內閣中書歷官刑部左侍郎因事鐫級補鴻臚寺卿以病歸鎔居官勤慎嘗爲安徽寧池太廣道兼理蕪湖權稅不名一錢爲刑官治文書必得當乃已嘗謂治獄之難固不可使死者冤亦不可使生者倖爲順天府尹治林逆案別首從定罪不濫不寬朝野稱之道光五年卒年七十有九

陸鼎墓志

顧堃字堯峻初名陶尊諸生屢困場屋因族兄某籍宛平改名入順天府學父大文以詩名堃資性過人八歲能詩十歲讀經史略徧稍長受業於沈德潛詩古文辭具有根柢乾隆癸巳春高宗巡幸淀津召試第一賜舉人名噪京師既而聞父疾歸父歿服闋計偕至京周燮堂制府延請掌教大名天雄書院尋改歸原籍銓授丹徒教諭課士先行後文丰裁嚴峻自乙巳至丁卯凡二十三年陞常州府教授三年卒年七十二遺命葬丹徒

蔡之定墓志

張邦弼字清臣幼敏慧絕倫六七歲時詣里中師受讀琅然如夙誦未冠文譽已藉甚既入學歲科試輒冠其曹劉文清公視學江蘇最賞之每言大江南北才士必首及邦弼次則沈清瑞王芑孫乾隆庚子舉於鄉明年會試下第未幾得疾戊申力疾上春官復被斥明年歿於家同時鄴雲倬字步青癸丑進士官穎州教授王元辰字曜環諸生皆能詩與邦

弼結雅言堂詩社

道光志

程際盛原名炎字煥若乾隆庚子進士由中書官至御史所著有稻香樓詩集說文古語考

禮記古訓考周禮故書考儀禮古文今文考駢字分箋續方言補清河偶鈔

上全

錢棨字振威一字湘舫中諧

見吳縣

曾孫專志舉子業夜讀率至五更應童子試輒不利乾隆

三十一年補長洲學生第一六試棘闈不售四十四年應鄉試座主謝侍郎墉夢神人授巨筆上有經天緯地四字飾以孔雀毛光燄奪目覺而得棨卷遂置解首四十六年會試殿試皆第一御製三元詩紀瑞座王贈詩有千古第七人之句我朝開國以來三試第一者自棨始除修撰丁父憂服闋入京奉命在上書房行走充三通館纂修武英殿分校五十四年充會試同考官拔錢楷李鈞簡皆知名士五十九年充廣東副考官累陞至庶子嘉慶三年大考入優等陞侍講學士轉侍讀學士充雲南正考官出闈即奉提學之命四年補內閣學士兼禮部侍郎是年八月卒於滇年五十八棨事親孝持躬介親病割股以療通籍後不游權貴之門人皆重其品

吳門補乘

張鳳翼字儀廷映葵孫父光焯乾隆內子舉人官婺源教諭鳳翼幼聰慧有神童名登乾隆

辛丑進士以知縣用就教職選太平府教授丁母憂服闋補鳳陽府教授引疾不赴卒於

家年七十一

道光志

宋思仁字藹若邦綏子幼穎悟弱冠補諸生數舉不利援例授四川簡州時用兵金川軍營  
檄備牛馬他邑輒用民力牧養資送思仁自出資給之民不知兵上官察其賢委署保寧  
府保寧瀕嘉陵江江水齧城根城日蝕築護城隄鐵牛鎮之水患遂息丁父憂服闋補廣  
西橫州調西隆州州爲極邊煙瘴之地民夷雜處時方構亂督撫檄思仁往治至則擒倡  
亂者王抱久等十四人置於法州境以安庚子冬丁母憂服除謁選得安徽和州州俗多  
溺女不舉創建育嬰堂乙巳歲旱民饑請帑金五萬以賑於城外鉞魚嘴設救生船以拯  
江行遭風者州境香泉田圩舊被水不可耕治者一萬畝督民修治隄防其地復爲膏腴  
丁未陞山東泰安知府庚戌高宗巡幸山東登祀岱宗召見行在奏對稱旨與宴行宮賜  
錦緞荷囊詩章是歲調濟南癸丑遷糧儲道以在濟南時屬員有私釋罪囚者失察降職  
遂引疾歸十餘年卒年七十八思仁居官廉靜慈惠勇於興革其聽訟如家人反覆推求  
必得其情境有古蹟必訪求而表章之在粵西撰太平便覽在山東撰泰山記皆以誌古

今文獻生平無絲竹六博之好嗜吟詠著有橐餘存稿廣輿吟

道光志

彭希濂字溯周啓豐孫乾隆甲辰進士授刑部主事遷員外郎郎中明敏善斷入治曹事雖薄牒充棟必一一詳慎鈎決期得律法之平嘉慶戊午督學貴州以清嚴明恕稱丁卯充福建鄉試正考官戊辰典順天武鄉試歷升至刑部右侍郎二十四年三月從耕籍田以疾失儀降授福建按察使履任三月斷獄千數皆手自判決延建邵三府多猾盜希濂檄擒二十餘人戮之又戮漳泉盜十六人閭閻以安九月以疾卒於官希濂悃悞無華關節不到每召對知無不言看錄不盡與人溫敬終未嘗見喜愠之色卒年六十三

道光志

沈清瑞字吉人先世本吳江明副使啓裔孫清初遷郡城祖驚遠乾隆己未進士江寧府教授父懋祖吳縣廩生清瑞早慧讀書強識稍長工綴文吳下壇坫正盛往往凌其儕偶諸城劉文清公視學於吳清瑞應童子試劉公呼至堂皇面命十二題分詠吳中古跡不移晷而成文采斐然劉誦之擊節清瑞初名沅南劉公曰此生如芝草鳳凰清時之瑞也因改其名乾隆癸卯舉江南鄉試第一下未成進士年未四十卒詩文祖禰齊梁出入初唐四傑子沂曾字蘇羹嘉慶己卯舉人亦早卒兄起鳳字桐威乾隆戊子舉人歷祁門全椒

教諭工辭曲 道光志

嚴壽圖字華峯少應試不利彭元瑞侍郎督學江蘇經古外另試默經以箋疏爲上註次之經文爲下壽圖覆試爲蘇太一人卒以此入學爲人談諧調笑機鋒百出若和易近人無可無不可者有時激昂慷慨詞色嚴厲有不可一世之意與秀才案時顧南雅李子仙皆被逮壽圖非指名可倖免以與二公約慨然曰不可失信於友遂自拘就繫當事者疑有別情特提嚴訊之壽圖言詞慷慨顏色從容大刑在旁不爲少屈因愈疑其爲訟棍旁稽案牘十數年爲秀才無片紙入公門無可鍛鍊乃已

無近名齋文鈔

彭希洛字景川希濂弟年十五而孤毀瘠如成人讀書攻苦無間寒暑尤潛心理學乾隆丁未成進士授兵部主事充四庫全書分校乞假歸五十八年補武選司主事陸郎中勤於政吏不得緣爲奸非公事不見上官事不可行者必力爭不少屈尤諳馬政郵政時值軍興兼辦車駕司事鉤稽釐別稱允當焉嘉慶四年陞福建道御史疏陳官吏徵銀浮收及督撫勒屬告病州縣諱盜爲竊等事皆洞中時弊蒙頒諭通行尋以母疾假歸母卒哀毀致瘠居鄉族黨有急必力濟之年未五十卒弟希涑乾隆丙午舉人早卒希洛子蘊輝嘉

慶四年進士入翰林儀度玉立能文好善年僅三十一卒

道光志

人早卒

彭希鄭字會英希洛弟乾隆己未進士禮部祠祭司主事嘉慶初丁母憂歸越十五年始出以禮部主客司郎中出知湖南常德府勘水桃源之車湖武陵安鄉交界之鴨子洲皆減賦禁民溺女訟者即拘審并許民口訴殊示於門禁書役無攔阻道光元年護岳常澧道

二年因病解任歸買屋齊門外陸墓卒年六十八

彭翊述

王芑孫字念豐祖世琪有文行官宣城教諭芑孫幼有異稟年十二三能操觚為文既冠為諸生不屑為時俗科舉文字獨肆力於詩古文縱橫兀稟力追古人至京館於董文恭公邸第乾隆戊申高宗巡幸天津迎鑾獻賦召試入格賜舉人以官學教習除授華亭教諭婦曹氏貞秀亦工詩善書世方之鷗波夫婦云

秦瀛墓志

吳嘉泰字東屏諸生與同郡顧純李福陶賡等相友善詩札往來殆無虛日尤精於鑑賞少從錢宮詹大昕游母徐孺人嘗割臂肉療姑疾嘉泰乞宮詹作孝婦傳一時名士以詩文贈者數十家子根從孫重熙皆吳縣諸生亦精鑑賞次子仁榮

見吳縣

自有傳

家述

曹永植字範遠先世自歛遷蘇弱冠為福建長汀縣丞以才能輒權劇縣在永定或於家祠

謙其族屬族屬於酒中中蛇毒斃者二人前令鍛鍊成獄將以謀殺抵永植廉得其實釋之自奉儉約爲縣人建書院設膏火資爲前令償逋賦三千兩補以贏羨民無追呼既去人尸祝之乾隆己丑陞諸羅知縣縣在臺灣海中永植到官卽精練鄉勇以備倉猝未一年有黃教賊起擒賊首石雙等三人事平以失察降官權雲南永昌府經歷六旬中決獄百餘皆當郡守賴之

宋翔鳳樸學齋文錄

吳雲字潤之乾隆庚戌進士選庶吉士授編修歷官山東道監察御史河南彰德府知府致仕里居二十有二年九十一卒爲御史時疏劾兩江總督某直聲震朝野官彰德時年且七十精神強固鞠獄勘災勸農課士一不假他人手有蘆商控毀壩一案力持其平尤爲人所稱兩充鄉試主考官一充順天鄉試同考官皆得士里居不與外事篤於友誼執友方水部元鷗卒經紀其喪卹其兩椋凡故人著書或未版或已版而毀多爲刊布

以上據行

而已之詩文無專集所傳醉石山房詩文鈔六卷其後人所搜輯也子信中籍吳縣自

有傳

府志

汪美基字吧瞻長洲廩生讀書敦行誼少受學使李因培之知李家溟南歿後子姓不能歸



美基卜地爲營葬嘉慶十九年重游泮宮時年七十八

道光志

陳基諸生耽吟詠游袁枚之門枚詩話中所稱陳竹士者也嘗題其卷云雕刻之辭可憑人

力清脆之響必自天來唐有溫飛卿宋有姜白石元有薩雁門明有高青邱近乃有陳竹

士其見賞如此配金氏繼配王氏並能詩金號織織名尤著

上全

周鉢字寶傳課徒自給貧不受人餽有戚屬俟其身後語其子曰願任斂葬事其子曰先君

子臨歿云束修所入歲有餘貯敝篋中汝啓而斂我葬我足矣若受人餽非我子也不敢

其廉介類如此耽於詩以布衣終年七十有一

上全

宋翔鳳字于庭簡

見元

子嘉慶庚申舉人泰州學正丁憂服闋改旌德訓導保舉知縣試吏

湖南以才幹爲大吏所知歷任劇邑以州牧致仕咸豐己未重宴鹿鳴加知府銜明年卒

年八十七翔鳳少跳盪不樂舉子業嗜讀古書不得則竊衣物易書祖父夏楚之不能禁

比長淹貫羣籍尤長於經謂大學爲禮記四十九篇之一首尾完具脈絡貫通無經傳之

可分無闕亡之可補爲大學古義說上下兩篇念論語鄭注佚弗傳輯爲十卷又爲論語

說義十卷於孟子則有孟子趙注補正六卷別輯劉注一卷平生精治小學爲小爾雅訓

纂六卷又有過庭錄十六卷樸學齋文錄四卷兼工詩詞雋雅可誦子景宣字穉宣監生

亦能詩先翔鳳卒

吳嘉淦墓志陳泰來壽詩堂詩話解谿叢書合纂

徐頌字直卿嘉慶乙丑進士第二人及第授編修十七年二月大考翰詹頌名列第一擢侍

讀學士充日講起居注官提督安徽學政任滿回京充咸安宮總裁文淵閣直閣事國史

館總纂二十二年四月特旨命直上書房歷少詹事道光元年陞詹事充山東鄉試正考

官二年陞內閣學士兼禮部侍郎再提督安徽學政三年卒於任年五十二特贈侍郎銜

賜子綸舉人諭祭葬頌少從元和江聲游聲傳惠氏學尤精於說文頌得其指授

府志

陶樑字寧求嘉慶戊辰進士改庶吉士授編修出為直隸永平府知府擢清河道署按察使

兩次因公降調後由湖南漢黃德道歷官江西布政使入為太常寺卿再轉至禮部左侍

郎年八十餘卒樑少工詞翰與董觀察國華齊名有陶董之目時東南壇坫千里相望王

昶孫星衍趙翼吳錫麒輩各以所著傾動一時樑與為師友詩名播遠近其詩始學樊川

晚似香山其遭際昇平克享大耋固似香山也

府志

顧元熙字麗丙嘉慶戊辰鄉試第一己巳會試第二選庶吉士授編修洊擢侍講侍讀督學

廣東卒於官年四十一元熙多病能厲志慎交游詩古文辭俱雋雅工制藝沈刻清剛可

鎮浮靡道光志尤工書學歐陽率更而近文待詔身後人頗重之府志

過元岐字穆君小習舉業屢試不利遂棄去專心史學上下古今治亂興衰之際著二十二

史言行略四十二卷其友謝希曾刻之希曾字孝基工小楷嘗刻楔蘭堂帖亦風雅自命

者道光志吳門表隱合纂

毛鼎亨字湖汾為諸生有聲嘉慶辛未三甲第一名進士分吏部浮沈郎署二十年晚年出

守曹州移兗州未幾即移安歸主講東林書院年六十四卒府志

蔣慶均字春祺嘉慶甲戌進士選庶吉士散館以知縣用選湖北應山縣告近改河南確山

調杞縣杞當衝要民號難治下車之日懲強暴撫善良俗遂漸革重修先賢冉子墓戊子

獲鄰盜李二等十三名咨送引見以知州用會兄泰階歿於御史任慶均念父春秋高遂

乞養不復出年六十七卒上二人又

彭蘊章字琮達一字詠莪啓豐曾孫以舉人官中書充軍機章京道光乙未成進士改主事

累官尚書軍機大臣武英殿大學士前後值樞垣最久明習掌故敬慎恪恭受文宗特達

之知入內閣不由翰林異數也時中原多故內寇外侮警報沓來蘊章殫竭智慮寢不解衣鬚髮爲白嘗議設院南歸德二鎮又議固守天津北塘皆一時碩畫胡文忠曾文正等建議東征蘊章裨贊廟謨專力倚任卒成大功鈔票科場諸案起時大臣用事者屢興大獄多連朝士蘊章婉辭調護頗爲奸黨所忌以疾求罷車駕北巡蘊章方在告密疏挽留並陳時務六事疾間趨赴行在固請回鑾文宗亦深鑒之以迄穆宗恩遇如一同治元年卒年七十有一賜祭葬諡文敬文敬原本家學誦法洛閩道光朝視學福建修考亭書院建朱子墓堂諸儒之裔皆加甄拔膺殿庭考考之任凡二十四充會試總裁一督學政一

所著詩文集四十二卷讀書記四卷並行於世

史臣工列傳羅惇衍撰墓志潘祖蔭撰神道碑合纂

曾公勉開題

彭翊蘊章弟隱居不仕并力爲古文有議兵議律議法議鈔幣論海運諸篇可見諸施行生平好施與嘗捐田義倉及永仁善堂各數百畝不邀獎敘爲族中無後者立別祠歲時祭祀惟謹性無所戀爲人似其族祖紹升所學亦近之其歿也遺命不立行狀故無可紀就見於所著無近名齋文中及衆著於鄉黨者如此

附志

彭翊蘊章墓志

祁啓萼字子蔭又字涵香道光戊子舉人大挑分發江西歷知德興新喻吉水靖安瀘谿縣

所在有政聲已亥庚子分校鄉闈所得多知名士咸豐丙辰引疾歸卒年七十有二顧復初傳

啓華爲顧太史元熙入室弟子元熙輯生平知交文如李銳江沅皆鄉黨名宿不得志於

場屋者凡七人曰冰苙集未竟而歿啓華續成之爲制舉文一宗先正有澹遠堂制藝行

世述家賦與書田壽食又承口善堂谷幾百斛不遺焚餘氣烈中無爲答位限師遺朝景

王嘉祿字綏之生有文在手曰井故號井叔芑孫季子爲詩宗法漢魏盛唐出入有明前後

七子年十四爲諸生當乾隆中海內全盛揚州爲嵯賈所集尤稱殷富運使曾公煥開題

襟館招致四方知名士自爲之領袖後三十餘年曾公再任時鹽筴凋劫乃悉反所

爲幕下寥寥三五人而嘉祿以少年參廁其間聲望無愧前人也年二十八而卒遺言屬

元和蔣茂才志凝定其詩志擬論詩嚴好譏彈嘉祿高才盛氣好夸詫已作二人似不相

能至是嘆苦心孤詣不可及也吳嘉淦傳朱綏墓志合纂以幾來諸事

沈傳桂字隱之道光壬辰舉人生而穎異及長好爲詩尤工於詞兼有晚唐及南宋諸家之

勝嘗一主松陵講席後依其故人邵大令堂於中州登嵩少涉淇渭縱覽名山大川作爲

詩歌瑰偉雄傑與小長蘆相頡頏邵公歿於汜水任其孤扶柩歸貧無以葬傳桂集金以

謀窳窳其篤於友誼如此

吳嘉淦墓志陳彬華傳合纂

韋光黻字君繡諸生少受業於顧太史元熙所爲制舉文與書法皆酷肖之尤工於詩始學

李長吉怪偉奇特錢唐陳大令文述而賞之一時名大起嘗自刻其少作八卷名在山草

堂詩草中年後出入盛唐名家有詩六十餘卷工畫善鼓琴兼通醫理

府志

褚逢椿字錫庚諸生六歲能詩有神童之目比長工詩古文辭隸楷並渾厚秀潤幼失恃事

繼母至孝父歿撫其弟教養備至性介律已甚嚴而不露圭角

沈寶謙傳

施溼字水雲諸生博涉經史尤工詩以詩名吳下者四十年爲人樸寒與人交未嘗戲言卒

年七十有一配陳氏筠湘字琳簫亦工詩兼善書畫

家述

陳奐字碩甫諸生先世自崇明遷蘇州咸豐元年舉孝廉方正始年二十五從吳縣江明經

沅治古學二十七受學於金壇段大令玉裁玉裁以所註說文命奐讎對朝夕問難日所

請益夜必條記二年而學有端緒入京師識涇胡給事承瑛承瑛治毛詩奐亦治毛詩先

爲義類及承瑛卒遺言以所撰毛詩後箋草本遺奐奐知承瑛所治毛詩僅條例章句未

爲完書遂有意採義類作疏草創於道光十五年春迄六年而定成毛氏傳疏三十卷又

表毛公所說制度文物可補禮經之闕與東漢諸儒異趨者爲說一卷又準以古音依四始爲毛詩音四卷放爾雅例編毛傳爲義類十九篇一卷又以鄭多本三家詩與毛異爲鄭氏箋考徵一卷又少作有詩語助義三十卷晚年校刊之書如金氏求古錄胡氏儀禮疏郝氏爾雅義疏皆行於世卒年七十有八

戴望  
行狀

吳毓汾字管涔少時入都考取天文生歸里後就童子試年已四十餘湯學使拔置第一家貧窶而性偃蹇養親於寺觀負米炊爨不憚勞也曾拜段若膺爲師學極淹博觀書洞然

師器之

陳奐師友  
淵源記

顧震濤字默菴家居仁孝里性狷介而謙和潔修內行幼專譜學尤好吟詠吳中山林古蹟題詠殆遍終年著述無間寒暑著有燃松堂文集四卷隨筆八卷小辟疆園詩稿九十四卷吳門表隱二十卷吳郡忠孝彙錄十卷其他著述不下數十種平生好闡揚潛德請旌孝子及節孝貞烈婦女數十人修建先賢名宦祠十餘所士紳重之

采訪  
稿

王嘉福道光丁酉舉人甲辰大挑二等授淮安府安東教諭以協獲擒匪功保舉知縣授廣東始興知縣廣東多盜而始興尤甚有某村爲盜藪大吏議火之嘉福持不可曰此中豈

無良民柰何玉石不分然自是盜風亦漸息廣西髮賊入其境嘉福率鄉勇擊退之加同

知銜旋以老病乞罷貧不能歸士民醵資助之乃歸卒年八十有二

家述

陸元綸字績銘道光癸卯順天副貢生爲秀才時文名滿吳下歲科試及書院月課屢冠其曹所居與陳徵君奐掃葉莊相近故與徵君及其弟孝廉炯過從最密所學亦似之頗究心六書音韻而於三禮義疏用力尤深間爲詩晚年好宋五子書卒於咸豐九年有九所著遭亂散佚

上全

孫麟趾字清瑞諸生有才不遇久客於外晚乃歸里居城東陋巷賃屋一椽析其半爲臥室麟趾偃仰其間客至則邀入茶寮酒肆掀髯談藝自言作客數十年不名一錢惟以十餘卷詞付之梓人而已後有寶山令張某嗜詞延之入幕歸未數月蘇城陷不知所終

吳嘉注二

詞人傳按傳中又一詞人爲宋志沂見忠節傳

江湜字叔諸生少時不得志於場屋入貲需次浙江嘗攝長林場鹽課司中年歿於浙其論詩以情爲主而歸於一真字又不肯隨人步趨故其詩純用白描骨肉朋友之懷死生離別之感言之沈著痛快才力亦充然有餘用筆能展轉不窮屈曲透達吾吳數百年來



詩家中未有此派 葉廷珪感 逝集小傳

汪獻珩字彥石為諸生澹于榮利詩初效溫李既而悔之一意歸依韓孟蘇黃力掃疲軟熟

滑論者謂於東野山谷尤肖年逾三十遽卒 上全

楊介工詩有晚唐人風致家貧甚以切帛為業人呼為束帛居士性高潔日握刀自食其力

不妄取人一錢 府志

馬學易字吉人道光辛卯經魁壬辰禮部試第一官刑部主事為人慷慨好義勇往任事與

金昀善吳嘉淦友善早平著有節錄舫遺詩或相傳為順天貢院土神云 歸僕庵叢稿儀 宋堂集合纂

子世騏字次謀咸豐壬子舉人隨侍京邸未成立而孤事繼母以孝聞家無儋石泊如也

庚申避地北鄉旋卒 陳傳隱蛛 齋詩集

顧沅字湘舟濟美 見元和 曾孫生有異稟不事浮華喜收藏宋元舊籍及金石文字築藝海樓

儲之圖書之富甲於東南家故有辟疆園饒泉石亭館之勝所交游多名流耆宿賞奇析

疑日觴詠其中姬侍亦皆能誦詩繪事嘗畫繡餘讀書圖徧徵題詠風流文采著稱於

時著有元妙觀志八卷詩文集若干卷手輯吳郡文編二百四十六卷校刊賜硯堂叢書

百種出家藏五百名賢圖勒石滄浪亭摹勒秦東門關漢東海廟碑殘字梁舊館壇碑傳

於世家述

許鑑字香浦少讀書不屑事帖括豪俠好客急人之急嘗手散數萬金無吝色著有小丁卯

廬詩子其淮字蓮友個儻不羣游幕十餘年早卒有小丁卯廬撫餘稟妻蔣氏蕙亦能詩

共賞集按府志長洲列女許其淮妻蔣氏夫故絕粒三日死而藝文香浦父子著作誤入吳縣當從共賞集更正

李文通字聽雨諸生幼秉宿慧七齡能作聽雨詩遂以自號曾刊武林惠山鄧尉紀游詩其

讀岳武穆滿江紅詞長歌為一時絕唱善畫雁懸壺於胥門萬年橋北擁書樓與錢辰楊

煥華朱文標交好唱和喜談兵不能為時用復遁而之丹術抑鬱無聊寓吳江之蘆墟卒

楊字翰香布衣買藥朱字嘯雲舉人獅子諸生精書法篆刻共賞集參瀛珠仙館遺稿及見錄

龔文藻字澹安相城人廩生以善書聞周旋世家大族間必諄諄勸建義莊贍族人多樂從

鑒於己巳水災偕堂弟承毅創設南安仁局捐助田畝充作地方善舉又好獎勵後學刻

學塾應用書甚多芸窗必覽國朝詠物詩文迎台選能與集等年七十卒弔者盈門采訪稿

許紹洙字芝生長庠生婦翁李子仙孝廉吳中知名士愛其文以女妻之益自勤奮性狷介

不受人聘里中善舉則竭力贊成著有野芳退翁遺稿子鼎梅字楚琴善承父志以十二歲應童試卽入吳庠

共賞集  
二編

朱承龍號蘭汀武生以千總投効撫標咸豐十年委署楓橋汎協防遏丹陽潰兵金閶數十里藉獲安堵蘇城陷時猶血戰拒賊鎗傷左乳奪圍而出至香山募集義勇勢不支未幾赴上海見巡撫薛煥委赴金墅光福等鎮倡立密團備官軍嚮導同治二年蘇城克復委收城鄉各鎮尸骨不下萬具加五品頂戴八年隨李文忠勦辦東捻賞戴藍翎後派委撫院巡捕光緒二年總督沈葆楨因承龍技藝較優補用遇缺守備七年卒子永璜同治辛未武進士善率更書

家述

張宗洛字季英道光己酉拔貢由中書加戶部正郎工小楷姿態骨力俱造絕妙咸豐間襄辦團練城陷前數日親率練勇巡邏達旦不寐迨事無可爲經親友苦勸始出僑居海上藉筆墨餬口克復後郡紳舉爲餉捐局董事解餉入城巡撫李奏請賞加道銜年六十五

卒

采訪  
稿

徐人鳳字石卿澣墅關人早食廩餼中同治丁卯舉人文名藉甚後官金山學訓導士林宗

仰上全

趙信孚字交如諸生通經術擅岐黃取與不苟庚申亂後僦居善人橋授徒自給以醫術濟人貧病不受謝人皆高其行誼沒後無子友人爲營葬山中時有殷輅字新之與朱斗同受業吳寶恕之門輅入長庠與信孚交好亦徙善人橋爲儒醫著有鳩拙軒詩草斗字嵩南元和諸生工書畫通醫學上全

彭慰高字訥生蘊章子嗣蘊輝後道光癸卯舉人國子監助教分發浙江補溫州府同知攝紹興府篆在浙凡二十年先後司鹽茶轉運諸局務多惠政行路稱頌會長子翰孫任廣州府有迎養之請慰高宦情本淡遂解組歸隱游林下課孫自娛年七十七卒述家

汪景純字仲良廩貢生任浙江烏鎮同知烏鎮爲兩省七邑交界之區盜匪出沒號爲難治景純不分畛域嚴密查拿鄰封驚異以嘉湖溺嬰惡俗特捐廉收養偕紳士勸建保嬰公所於署東偏俗乃大革此外禁火葬保貞節興復書院禁宰耕牛諸善政未易更僕數癸酉卒於官述家

朱淦字枚厂咸豐戊午順天舉人早失怙恃家徒壁立性淡泊不慕榮利李鴻章撫蘇聞其

名屢遣使徵辟不就教授生徒鄭言紹孔廣彪龐慶麟王楨徐謙劉昌熙等皆出其門暇輒與吳中耆舊楊引傳胡元濬顧彭壽諸君集社觴詠著有守約堂叢鈔兵燹時遺失僅存商聲館詩草多感懷離亂之作時人稱爲杜史卒年五十

采訪稿

戴延年字壽愷善度曲詩古文法書皆工性蕭冷旅居京師閉門枯坐不問世事晚居吳江

著有吳語秋燈叢話搏沙錄叢桂山房詩

鷗波漁話

秦雲字膚雨諸生工詩詞與汪芑朱堦友善自號胥母山人著有伏鸞堂詩賸四卷裁雲閣

詞鈔二卷

采訪稿

諸文淵字鍾秀周莊穎村人少治經書後嗣父家法繪山水士女工筆溢爲花草壯歲習兵

家壬遁書究醫術雖務博覽一衷儒者

行狀

子福坤字元簡增貢生善古文宏博奧衍取材

兩漢有杏廬文鈔

陶然字芑孫周莊人咸豐辛酉拔貢少有雋才性好詞章著有味閒堂課鈔食古齋集暨詩

古文辭散見於同時諸家詩文序跋題詞中蘇松常鎮諸郡咸慕其名惟才名藉甚朝考

時某親貴子問字然鄙其文反其幣而揮之出卒以此功名蹭蹬絕不介意琉球國聞其

詩名遣使徵聘然不就嘗與凌淦合著無雙譜詩各百首刊行于世

柳以蕃墓誌銘

張世翰字子蓉南塘人咸豐十年粵軍入蘇城從堂叔蔭杲辦團練勦賊唯亭蔭杲殉難世翰以後至免屢破敵敵銜之而世翰以叔死亦恨敵刺骨誓必滅之顧團勇寡不敵衆率敢死士數十人投李軍門靄堂軍轉戰江浙聞克復六十餘城無役不身先矢石同治二年攻常州流彈飛入左頰血流至踵猶奮前不少却事後以軍功累擢五品花翎從軍五年殺敵數萬人有功不居旋歸家居恂恂若儒者或見左頰創痕詢之曰此天幸也卒年五十有五南塘張氏先有張霈生道光中捐貲辦普濟善堂其後蔭楷建立義莊松蔭隨堂叔金照倡辦白頭局堵截敵軍蔭杲與世翰禦敵外鄉皆錚錚佼佼者也

采訪稿

馬安瀾字春和善子咸豐十年青黛湖之役善拒李秀成戰死安瀾請軍火至常熟還大勳誓復仇時蘇屬各鄉團勇俱潰散與永昌徐佩瑗聯軍爲援同治元年擊敗譚紹洸於雲和塘徐軍潰力孤不敵率衆從致和塘破敵壘而赴上海效力官軍奉合肥李鴻章檄爲鄉導隨統領程學啓攻蘇城攻克城外十壘無役不從其克黃埭也有敵將騎白馬衝圍出安瀾手刃之曰今而後差可洩吾仇恨矣爲人精悍有血性世業佃漁事平請免魚苗

稅至今咸賴其利云 采訪稿

蔣德馨字心齋道光乙未進士授工部主事成豐間絀吏議去官歸里歷主書院講席汎覽

羣籍手不釋卷晚歲主正誼書院最久與諸生相切礪評判課卷動數百言所著有且園

雜體文存年八十四卒 復齋外稿

陳倬字培之少熟文選能背誦好講明古人制度師陳奐教以吉禘時禘之辨殷學周學之

分路寢太廟與昭穆太廟不當合一制遂作禘祫宗廟學校諸大典數篇奐以為然咸豐

壬子次場題勿士行校行微解從奐疏說主司沈兆霖知此說爰舉於鄉已未成

進士後官至戶部郎中著有隱蛛盒文集 家述

陳鼎字霄卓同治丁卯舉人家寒素性情磊落兀傲不羣而制藝雄一時彭翰孫費念慈皆

出其門下後選授句容教諭子之桐爵歲貢生桐翰光緒己卯舉人聯捷進士內閣中書

改浙江知縣 范迪謙函述

彭惠高字子方希濂孫少丁家雖以承分發福建改山左時捻匪騷擾僧忠親王統大軍

進勦檄辦糧臺巨細畢舉同治初補滋陽縣甫到任即繕完城郭如待敵然賊屢至不得

逞亂平調益都曹縣復回滋陽任服官二十餘年以清廉著

陸懋宗 嘉誌

潘鍾瑞字馨生號瘦羊增貢生太常寺博士少孤力學精篆隸工詞章究心文獻熟諳掌故

遇有關風化事輒表章之潘本吳中望族而於祖功宗德尤惓惓致意西圃韡園文勤諸

公交相推重性嗜山水淡於榮利所游諸名勝皆有記考證所交皆當世知名士非其人

不屑也三十喪偶不再娶光緒庚寅卒年六十有八著有香禪精舍集若干卷

采訪 稿

施傳鏞字雲門恩貢生工詩文制藝家郭巷與尹山袁學瀾蠡墅王國寶竝負時名有西臺

詩草粵軍漸逼見各處設鄉團局有絳帳師儒偏講武青衿子弟半談兵之句蓋閱吳中

文弱作諄勉語也晚年名益噪嗜酒伴狂且無餘子而誘掖後進成就者以數百計故人

亦交譽之

家述 參 共賞集

胡元濬字春波廩生工制藝有名大家氣息應紫陽正誼兩書院課輒膺首選每一藝出人

爭傳誦省試屢荐不售馮宮允修府志分纂吳縣人物志十餘卷卒年六十許又有趙鈞

字晉卿同治甲子舉人亦與修府志善奕棋官終江甯縣教諭

采訪 稿

周圭原名希旦字恂卿副貢生光緒元年詔舉孝廉方正力辭不應里中儒寡會每月親自按戶



送錢贍養雖雨淋日炙不以爲苦選授高郵州訓導力革澆習詔諸生恪守臥碑違者注劣於是無敢爲刀筆事者己丑卒於任所年五十有六

上全

王頌蔚字芾卿號蒿隱光緒庚辰進士改庶吉士散館改戶部主事補軍機章京弱冠就馮中允聘修郡志與葉鞠裳管申季最善同爲常熟瞿氏校定鐵琴銅劍樓書目通顯後撰周禮義疏及明史考證攜逸若干卷嘗慕朱蓉生梁節庵爲人曰得居言路吾願足矣終日抄寫直胥吏事耳後試御史第一意謂素願可償矣乃軍機處以熟手奏留不果然敢言之志不衰安御史曉峯院撫阿克達春之貪黷北洋購買兵輪之浮冒疏稿皆出爲手性廉介嘗派工程監督差廠商按例饋節省銀兩不納曰陳嵇亭先生官部曹印給公項且不取况此提工價之十一耶我輩取與之間不可隨俗浮沈也潘文勤翁文恭爲其座師然非論學不輕造文勤龍門高峻獨雅重頌蔚奉諱歸里時嘗曰吾家居讀禮敷門卻掃蒿隱云何或得其書則曰蒿隱規我矣其見嚴憚如此甲午中日釁起會翁文恭入軍機乃進言曰樞府有總持軍機之責尤當先知戰地情形今軍機處中并高麗地圖而無之每遇奏報軍情地名且不知所指安有運籌帷幄決勝千里之望乎於是樞府始令

北洋進高麗地圖至則所圖並不開方計里疏略殊甚繼遇友人東游歸得日本報館所  
有圖凡鐵道港口電線一切皆羅列乃歎曰敵人謀之非一日我乃臨渴掘井如何制勝  
既而王師失利割地償金益悲憤悒悒以乙未七月卒於京師年四十八有寫禮頤遺著  
凡文集詩集讀碑記古書經眼錄各一卷行世

家傳參奇  
觚廡文集

戴錫鈞字藝鄂同治甲戌進士與王頌蔚齊名生平篤尚風義人有求無弗應咸以窮孟嘗  
稱之光緒丁亥隨李文正督辦河工文正倚如左右手庚子京察一等出守大名值拳匪  
亂有張寶慶者倡天一會謀起事偵知偕文武嚴防不得逞獲犯祇誅首惡餘逆散去時  
畿輔地靡不仇教獨大名幸免明年苦旱禱雨烈日中感暑熱先因亂時募兵捐廉濟餉  
心血大虧又會府試疲甚一夕遽卒貧幾無以歸所著不薄今齋初二集采百集已刊行

日記藏於家

述家

彭祖賢字商耆號考庭蘊章第四子咸豐乙卯舉人補員外郎歷官至順天府尹同治戊辰  
陝西張逆北犯各援軍星夜追勦糧臺落後祖賢請撥部帑二十萬解直督分饋各營再  
議截漕濟餉疏上悉准施行癸酉永定河北四工漫口東南兩路災黎求食與直督籌賑

撫卹資遣回里全活億萬計光緒戊寅授江西布政使庚辰擢湖北巡撫慎選官吏監河大水災民爭子貝淵隄聚衆械鬪祖賢特爲籌款疏濬柴林河以息爭端建朝天閘以備宣蓄又因楚省經粵匪三陷三復士女死難者衆應表闡潛德幽光爰聘名宿纂修通志未幾權湖廣督篆而卒

述家

潘馥字小雅以世業浙鹺入杭州府庠由內閣中書累官刑部員外郎咸豐庚申粵軍破蘇松等郡奉旨隨辦江南團練時團練大臣龐鍾璐等議乞師湘楚馥與錢鼎銘請以身任乘番舶往而大江兩岸砲台林立炮子洞船腹馥等氣不餒卒達曾國藩軍營涕泣陳辭至得請乃迎師南下亂平巡撫李鴻章疏請獎加四品銜賞戴花翎

述家

徐淮字筠心華嶽孫世居西津橋爲長洲諸生篤謹渾厚文如其人弟恩培字子厚元和廩生詩文均工雅軼俗秋試屢黜時論惜之

述家

姚元鏐字鄰梅少從石梅蓀游工隸書行草筆意蒼勁畫墨梅疏落有致光緒初授浙江長浦司巡檢調署南潯新民俗好訟請勸至泣下始息中年謝病歸數門不出自號野橋

居士以書畫自娛

述家

信里蘇州寒其齋跋文以東菴編輯日本辭譜

許起字壬瓠職貢生性敏力學工詩古文善書法少從同里顧惺游得醫學真傳嘗避兵滬  
上獲交道州何媛叟而書學益進歸里立詩社於清風亭倡酬其中晚年擬修里乘屬稿  
未半而歿年七十有六

述家

許象樞字洗桐諸生事親孝爲人倜儻不羈善屬文下筆萬言惟於制藝帖括輒鄙夷不屑  
爲生平崇拜美利堅之華盛頓甲午上書當道不報戊戌政變憤慨異常以有老母在不  
敢有所爲母歿哀毀逾恆未幾卒時光緒二十八年有所著孟子註若干卷

述家

浙

病心痛

公卿問海

爭端建朝天開

友聘名宿

學

女

家

... 二十九年官復落... 未幾卒

... 不勝其... 其... 其... 其...

... 不勝其... 其... 其... 其...

未半而返乎... 十有六

... 其... 其... 其... 其...

... 其... 其... 其... 其...

吳縣志卷第六十八下

列傳七

元和縣 雍正三年未分  
縣前俱入長洲

清

顧濟美字兆槐曾祖國本歲貢生私諡貞孝祀鄉賢祠濟美起家雲南通海知縣興利除弊  
 有鐵面青天之頌擢嵩明知州入覲以母老乞假省親世宗溫語褒嘉擢紹興知府增置  
 大成殿兩廡修稽古閣六賢祠葺山書院濬三江水閘丁母艱百姓遮道請留大吏以聞  
 奉旨在任守制時方亢旱濟美回任雨大沛擢浙江鹽驛道再擢按察使折獄明允調福  
 建按察使臺灣一郡孤懸海外姦宄之徒混迹其間濟美嚴流民渡海之禁臺郡肅然擢  
 布政使調廣東護巡撫篆卒於官年六十有七子載光善事親母陸病心痛刲股肉以療  
 卒年二十二 馮府志引  
蔣恭棗傳

鄭弒字季雅少好學典衣購經史日夜讀之尤肆力於詩遊京師以能詩聞公卿間海甯陳  
 公延至賓館與纂賦彙卒於京師年四十有九子廷暘字嶠谷書法褚中令小楷尤工詩

吳縣志卷第六十八下 列傳七

不多作意到語工自然神妙

湖海詩傳

凌封祝字正衡長洲庠生後分屬元和幼孤學於父友吳陳杭刻苦讀書一以朱子為宗小學近思錄通鑑綱目諸書咸貫串其義指一時知名士皆從問性命之學澣關有前吳後凌之日家居無一戲言燕處必衣冠雖溽暑不暫去嘗謂修身齊家是儒者事業素位二字乃真經濟聞者以為名言

陳鶴傳

子奎字景躔亦諸生工畫山水秀潤絕倫

許聖志

沈士駿字文聲髫齡時能誦六經三史稍長肆力於唐宋百家濡筆伸紙纏纏數千言靡盡乾隆乙丑年十六受知於安學使以第一人冠軍巡撫陳公聞其名試以藝立成數體擊

節稱賞後聯捷進士入翰林歷官至中允

願諒祿吹萬閣序

願肇培字元植少秉異資讀書一二過輒不忘稍長治經義不為浮詞稽古益力崇尚經學以漢儒釋經各有師承博徵遠引或不盡純粹然近古有據謂三禮與三傳相表裏其間異同頗多信周禮不如信左氏以周官多可疑而左傳有徵也尚書專治禹貢自秦決河灌大梁漢元光中河決而南九河入文已失故道因取河渠溝洫桑經酈注諸書以攷其

異著有禮經傳集要四卷禹貢彙纂二卷

願氏家乘

宋宗元字光少乾隆戊午順天舉人直隸成安良鄉知縣歷官天津清河道遷光祿寺少卿乞養歸於舊居葑谿南築網師園以奉板輿建義莊以贍貧族諸從子皆受析產弟文元兆元調元文元以諸生終兆元歷湖北平江巴東湖南長沙知縣調元歷江西德安武寧鄱陽知縣分寧知州廣西東蘭知州終刑部郎中

同治府志

顧元揆字端卿九思

見長洲

八世孫父祖望陝西富平知縣母韓氏文懿公葵季女工詩元揆

舉乾隆九年順天鄉試除浙江龍泉知縣調餘姚民有以謀逆告者按驗無迹盡釋之而置誣告者於法擢南塘通判攝平陽再攝淳安會水災不待請即放賑臺司駁減銀二千兩有奇至鬻宅以償回南塘任築室曰吏圃日於其中作書作畫泊如也故事歲一巡魚斷有供給錢六百緡元揆弗往擢雲南羅平知州丁繼母憂起補貴州黔西知州調古州尋卒元揆不名一錢清俸之餘猶時時分贍族人雖盜無儲粟弗顧也工詩書學顏平原畫亦入妙

同上

惠棟字定宇士奇

見吳縣

子初為吳江縣學生改歸元和幼承家學於經史諸子稗官野乘無

不通經取注疏史兼裴張小司馬顏籀章懷之注諸子若莊列荀揚呂覽淮南古注亦並



及焉小學本爾雅六書本說文餘及急就章經典釋文漢魏碑碣玉篇廣韻而下勿論也  
甲子鄉試用漢書語爲考官所黜自是絕意進取乾隆十六年詔舉經明行修之士兩江  
總督黃廷桂陝甘總督尹繼善交薦之會大學士九卿索所著書未及進罷歸嘗以顧炎  
武左傳補注雖取開成石經校其異同而義有未盡因發明公羊何氏之學附以羣經作  
補注四卷於尙書採摭史記前後漢書及羣經注疏以辨後出古文之僞定鄭康成之二  
十四篇非張霸僞造爲真古文梅賾之二十五篇爲僞古文作古文尙書考二卷爬羅剔  
抉句疏字櫛摘其僞之由來皆郝敬閣若璩所未及以范蔚宗後漢書因華嶠而成古人  
嫌其缺略而東觀漢記謝承之書不存取初學記藝文類聚北堂書鈔太平御覽諸書作  
後漢書補注十五卷又以漢儒通經有家法故五經師訓詁之學皆由口授古文古義非  
經師不能辨自其家四世傳經恐日久失其句讀作九經古義二十卷於易理尤精著易  
漢學七卷周易述二十卷凡鄭君之爻辰虞翻之納甲荀諝之升降京房之世應飛伏暨  
六日七分世軌之說悉疏通證明由李氏集解以及其餘而漢代易學燦然又撰易微言  
二卷易例二卷以闡明之因學易而悟明堂之法作明堂大道錄八卷禘說二卷謂古之

明堂治朝太廟靈臺辟雍在其間考之堯典春秋月令王制無不合少嗜新城王尙書精華錄爲訓纂四十二卷搜採博洽貫穿掌故亦爲世所重

王昶墓志

方懋祿乾隆戊辰進士歷知江西新城南城清江山東棲霞海陽商河諸縣其在清江也當

袁贛二水下流泛溢爲害舊有隄弗能堅懋祿築之屹爲巨防互五十餘里其在商河所

轄王化莊爲盜藪前官弗能捕懋祿至偵知姓名籍記之歲除率丁壯二十餘人冒雪馳

至莊案戶收捕無得脫者秋潦傷稼懋祿周歷部屋策馬行泥淖中或竟日不食爲令十

年授廣西德勝同知調桂林又調百色擢襄陽知府當秦豫之衝民剽悍喜帶刀小不合

裂皆相向懋祿下令輸刀於官倍價償之傷人之案漸希隔江樊城夙稱巨鎮稂莠蘖芽

其間懋祿捕其魁置之法又於沿江添置舢舨分遣邏卒巡警羣盜聞風遠遁署安襄兵

備道告歸愛松陵地幽勝徙居之卒年七十三

金學詩墓志

顧德懋字慎衡乾隆辛未進士授江西南昌知縣猾吏舞文置於法吏不敢犯內擢刑部主

事歷禮部郎中清介自持同僚敬憚以疾乞歸尋卒

道光志

李炯字澹成父逢春早卒母督課之夜讀與紡織聲相和達旦乾隆元年以五經舉於鄉十

七年成進士授廣東茂名知縣題其堂柱曰窮秀才做官何必十分受用活菩薩出世不過一點良心每聽訟平心察理有重獄或牽連一二十人必案實縱舍所羈候一二人而已所莅黃塘在山谷間暴雨水溢居民多死水退請上官發官銀收斂有續報者太守難其請卽捐俸益之其生者爲起竹屋復爲粥食之初紹興沈生在幕府頗通賄賂炯謝遣之及是客府衙構於太守遂以不勝任改教官去之日士民執香送者接踵有誓百餘人製布袍獻炯誓曰貧不得錦恐不當公意炯曰服之矣誓前捫炯衣果布也則大喜舟過梅棗鎮商民設樂餞飲燭行金爲壽炯卻之已而舁炯徧歷鎮中曰公去矣俾鎮人一識公旣歸卜居靈巖山下野服條然未嘗謁官府時與及門諸子遨遊山水間卒年七十一

彭啓  
豐傳

吳德基字南勤沈文愨公德潛高弟子爲文取法歸茅靜穆淵懿

王昶舊雨  
文傳跋

姜晟字光字先世本山東萊陽縣高祖琛曾祖實節並見流寓晟乾隆丙戌進士分刑部授提牢廳補主事歷官右侍郎湖北湖南巡撫洞庭湖盜賊爲商旅害晟專派緝拿獲積年大盜董舒友等傳首湖干湖氣以靖祁陽零陵大水晟撥庫銀六千兩按戶散給貴州苗

變湖南永綏廳苗人石三保等應之晟馳往辰州會同總督畢沅進勦既而上命雲貴總督福康安統領大兵合勦晟駐辰州俟支糧餉火藥軍裝器械一切先事周備又分兵守城防隘口奉旨賞花翎旋加總督銜時福康安與四川總督和琳薨於軍晟與明亮額勒登保德楞泰鄂輝等和衷集事嘉慶三年苗疆事竣加太子少保陞湖廣總督調直隸以永定河決革職奉旨發永定河工効力工竣給主事銜刑部行走旋授刑部侍郎擢尙書賜紫禁城騎馬調工部以前在直隸任內失察藩庫虛收銀兩降四品京堂乞休回籍晟在刑部受純皇帝知最深派審直省大小獄二十餘案虛心推究務得其平在湖南清釐州縣倉庫務求實貯後值軍興糧餉賴以無誤尤愛惜人才爲巡撫未嘗輕劾一人常曰人各有能有不能棄短取長人人可用若因一事之失而斥之後來者未必賢於前人也

道光志

顧聲雷字震蒼乾隆丙戌進士官陝西石泉知縣調興平捐修漢唐陵墓歲旱出常平粟賑濟給籽種免民流亡調咸寧平反商州民趙成殺死牛姓六人卸罪於子一案鞫得實寘趙成於法擢廣東惠州知府歲饑倡捐賑濟全活甚衆

韓是升傳

林蕃鍾字煜奇先世自閩遷蘇州蕃鍾少孤從同里沈懋祖學沈愛其早慧以女妻之舉乾隆戊子鄉試善書力追晉唐尤嗜董文敏得其神解慨師道放失子弟之率不謹而婦女習爲惰偷著師法一編閨範一編爲婁縣教諭未幾卒年三十九子衍潮字孟韓亦工書父遺碑帖墨迹臨摹殆徧文宗韓柳兼擅雜家之長詩刻苦不輕下筆不喜爲舉子業母命就試補長洲博士弟子員卒年二十六

道光志

次子衍源元和優增生善古文痛父之誤

於醫也專心醫學每治一病焦思苦索以冀其愈晚年醫名頗著

家述

陳初哲字在初祖震有學行爲河義門入室弟子初哲幼而岐嶷弱冠善屬文工書日寫千字文一本乾隆己丑進士廷試閣臣擬第二上以條論切直擢第一授修撰充武英殿協修習國書通音義散館第一上曰漢人中不易得此充乙未會試同考官陝西鄉試主考官戊戌分校禮闈京察一等授湖北荊宜施道江水暴漲沙隄壞初哲親督吏民用土囊塞之七晝夜水漸落民得無恙捐俸築隄益鞏固會荊關監督官裁缺初哲以道兼理權務吏不敢欺丁母憂歸尋丁父憂丁未六月一夕暴卒年五十一弟希哲字復初乾隆乙

酉迎鑾獻賦召試賜舉人授內閣中書

蔣元益傳

李堡字紹韓乾隆辛卯進士陝西會寧知縣歲歉捐廉賑饑就食者數萬不能給以工代賑  
城郭衙署儒學煥然一新而民亦得食會寧爲關中衝要乾隆四十九年四月有逆回田  
五倡亂初在平涼府鹽茶廳之小山中焚西安州土堡旋入靖遠陷通渭會寧四面受敵  
城中無井去河遠堡聞警卽戒嚴移附城居民於城毀其屋賊來率軍民登城鼓譟幸城  
外無民房不能焚掠去而復來者數次堡守益堅下令軍民有殺獲一賊者賞若干賊往  
來於境蹂躪於村墟者以千萬計而不敢至城下未幾官兵集欽差大臣福康安偕內大  
臣海蘭察大學士阿桂至賊以四月十五日退事至七月十四日殲於石峯堡事平堡年  
五十餘兩月中鬚髮盡白明年改教南歸錢泳履園叢話

葉元符初名幹鱗字根天士寬

見吳縣

孫父樹滋大定通判元符乾隆三十九年順天舉人補

內閣中書遷侍讀嘉慶初出知河南汝寧府俗有盛刀會每歲二月羣攜械入市互誇拳  
勇莫敢誰何元符懲之俗遂革調衛輝府濬縣民婦邢福姐其姑導淫不從與惡少致之  
死元符廉得實抵姑與惡少罪而祭邢氏墓漢徵士黃憲墓在正陽沒荆棘中元符立石  
表之輝縣西當濟瀆下流每漲發田廬輒淹元符尋舊隄址堅築之水患遂息丁父憂歸

旋卒 趙懷玉傳

顧宗泰字景嶽乾隆四十年進士為諸生時試輒冠軍與吳縣諸生劉璜齊名家有月滿樓

文酒之會無虛日袁枚稱其詩清冠等夷海內知名之士無不交投縞紵官吏部主事出

為廣東高州知府罷歸 吳門補乘

馮培字仁寓居錫山乾隆壬辰 選舉作庚寅 舉人內閣中書軍機處行走戊戌成進士選庶吉士

改吏部主事歷刑部郎中擢御史轉給事中為人篤內行務切近之學與人交和而介非

義與之弗受也服官三十年錄無一椽歷主浙江崇文江蘇紫陽書院門下士多所造就

年七十二卒 道光志

韓封字禹三年二十登乾隆丁酉拔萃科以部屬用分刑部悉心讀律平反滇南盜案超雪

三命升郎中屢從讞諸省大獄出為廣東高廉道升福建按察使痛懲械鬪頂兇之習升

廣東巡撫署總督時洋匪蔡牽土盜朱潰不靖封分路勦捕斬獲甚衆朱潰斃於礮於零

丁外洋獲朱渥等擊張保仔於荷包洋保仔等投誠賞戴花翎先後奏定潮州械鬪逞兇

案例及良民被脅結盟及畏累出錢並未結盟罪例有差授刑部尚書兼兵部尚書賜紫

禁城騎馬平反山西烈女趙二姑獄尋以失察候際清案左遷未幾復補刑部右侍郎以疾告歸年七十六重遊泮宮未幾卒

尤世楠字文叔祖怡字在京精岐黃術世楠性和粹躬修內行嘗謂門弟子曰學者舍卻主

敬存誠四字從何處下工夫長於制義試輒冠其儕偶乾隆五十年恩貢生嘉慶元年舉

孝廉方正子維熊乾隆五十四年拔貢生官雲南蒙自知縣能詩

吳門補乘

徐承慶字夢祥自號謝山乾隆丙午順天舉人大挑知縣分發山西補孟縣調陽曲遷平定

州解州署汾州府引疾歸覃精小學著段氏說文解字注匡謬蓋段先作說文解字讀密

行細字每册寸許凡四十册晚始刪繁舉要為說文解字注又恐老而不及成未免求速

轉多漏略匡謬之作心平而氣和辭達而理舉與鈕樹玉說文段注訂意同而說加詳

宋本

翔鳳傳

宋簡字長文乾隆庚戌進士歷官雲南麗江貴州玉屏山東高密知縣清廉有守其署大定

府水城通判時有土自犯事以多金關說簡罰以充書院膏火即定讞自是無敢以賄賂

嘗者年六十五卒於官

道光志



江聲字叔灃六世祖禹奠自休寧遷蘇州聲幼聰慧絕倫七歲就傅問讀書何爲師以取科第爲言聲求進於是者年二十九父病聲晨夕侍牀蓐手製藥餌滌穢窻以驗疾之進退及居喪哀毀骨立逾三年容戚然如新喪者遭母喪如父喪性嗜古年三十師事同縣惠棟四十始爲尙書之學病唐貞觀時爲諸經正義自詩禮公羊外皆取晉人後出之注而漢儒專家師說反不傳惠棟既作周易述聲亦撰尙書集注音疏存今文二十九篇以別梅氏所上二十八篇之偽造取書傳所引大誓湯征諸篇逸文按書序入錄探說文經子所引書古文本字更秦漢之隸變及唐開元改易古字之謬輯鄭康成殘注及漢儒逸說附以己見而爲之疏以明其說之有本凡四易稿積十餘年而成時王鳴盛撰尙書後案亦以疏通鄭義爲書延聲至家商訂疑義又病後世深求說文考老轉注之義至以篆迹求之因爲六書說謂建類一首卽始一終亥五百四十部之首也同意相受卽凡某之屬皆從某也嘉定錢坫韙之而休寧戴震以爲貫全部則義太廣聲折之曰若止考老爲轉注則義太隘且諧聲一義不貫全部乎聲嘗爲畢沅校刊釋名疏證用篆書之其爲尙書集注音疏亦用篆書灋字蘧字說文不載灋據淮南作屨蘧用爾雅義作孟人始或怪之

後乃知非臆說聲不爲行楷數十年雖尋常尺牘皆依說文書之不肯用俗字嘗爲說文解字考證後見金壇段玉裁作乃輟筆并舉稿本付之又欲舉經子古書俱繩以說文字例名曰經史子字準繩又爲論語竅實俱未脫稿而老疾矣聲生平不爲詩賦時文而好填詞有烏雲春山櫻桃金蓮諸闋柔情旖旎絕似宋元人筆墨嘉慶元年舉孝廉方正卒年七十九子鏐吳縣學生亦好古敦學

孫星衍傳錢泳履園叢話合纂

孫沅自有傳

殷如梅字果園諸生工詩筆瓢屢空嘯歌不輟其詩爲王昶袁枚所稱

同上

吳智字始乾歲貢生少務經世之學博覽經史旁及諸子風烏壬遁慨然以古賢豪自期不

遂其志退修一室以老

上全

陳鶴字嵒亭嘉慶元年進士授工部主事工部有三君子之稱棲霞牟昌裕陽山鄭士超及鶴也志節堅苦授徒自給外吏贈遺一介不取與顧純交極契以道義相切礪生平學術以錢詹事大昕爲歸官京師出無車馬自長官以至同列多未識其面故以候補主事終精史學一生精力在明紀一書書凡六十卷手輯至五十二卷而卒後八卷乃其孫克家

續成也

復齋續稿

章騰龍

府志藝文作盧騰龍

字觀韓博涉多才藝數應試不雋轉入長庠為武生其甥吳江楊俊任廣

西興業縣往佐之掌書記并遊粵東多得江山之助學益進凡地勢奇峻民俗詭異一皆

筆之於書成嶺南雜志粵遊紀程二集晚年采輯里中故實作貞豐擬乘其原本頗不俗

多為後人改竄乃失其真周莊志然此後若顧時鴻撰甫里志沈贊唯亭志陳樹穀陳墓志

陶煦又撰周莊志皆踵章氏而起者也

陳鍾麟字肇嘉號厚甫嘉慶己未進士歷官至杭嘉湖道博通經史尤工制藝嘉定錢大昕

主紫陽講席亟賞其文有款正草人習誦之即錢為之序馮志

吳廷琛字震南嘉慶壬戌會試第一廷對復第一甲子典試湖南旋督學政丁母憂歸服闋

散館京察膺上考出為浙江金華知府移杭州杭為省垣臬使治所刑名總匯案涉疑似

多取決於廷琛遷直隸清河道護臬篆畿輔京控案如緇絲廷琛按日鞫訊夜繕稿至三

鼓弗休詰旦詣轅制府顏某據以入告即蒙俞允終其任未嘗干部駁遷雲南按察使有

宜良江川通海三縣民被盜吏諱為竊民上控廷琛選屬吏往勘得盜劫狀上之督撫頗

猶豫廷琛力爭乃罷三令而議守望巡防之法權藩篆知銅庫虧乏弊由廠員乃徹底清

釐覆盡發一月後東西兩道報各廠豐收銅政大起未幾內召以四品京堂用踰年引疾

歸主講正誼書院旋卒

朱志

蔣廷恩初名棠字華輝嘉慶己卯進士幼慧勇於進取所為文務聲音華采以求合有司之  
尺度雖屢擯不改以貧故恆遊四方南踰嶺北渡河客京師最久通籍時年六十八矣授  
中書一年歸歸三年而卒廷恩自年三十置有改過日省之書以自治事親孝居喪哀撫  
羣子姓以慈凡族黨鄉鄰任卹不倦弟子來學者必使有所成就江沅徐香祖其尤著也

宋翔鳳僕  
學齋文錄

從兄華字豹文恩貢生

道光

王慶瀾字靜波歷官河南郟縣典史濟源巡檢太原縣丞調赴河工嘉慶二十四年補陳州  
府沈項縣丞沈項回民雜處慶瀾常易服微行懲奸嚴道光三年正月為革役劉萬雲所  
戕事聞奉旨加知縣銜並建專祠以彰循績

同上

李銳字尚之章埭

見吳縣

從子諸生幼開敏從書塾中檢得算法統宗心通其義遂為九章八

線之學後得嘉定錢大昕指授學益進王孝通緝古算經詞理隱奧罕能通者銳與陽城  
張敦仁共著細草詳論二十術又得秦九韶九章算經乃窮究天元一術嘗言時憲乃致

治之要著算法通考惜未成書銳潛心經史不屑爲詩文然頗工制義從學者多登第而  
銳終身困於場屋以卒

阮元傳

顧廣圻字千里後以字行更字澗蘋弱冠稱萬卷書生不爲科舉業年三十始補諸生從江  
徵君聲遊得惠氏之傳盡通經學小學論經學云漢人治經最重師法古文今文其說各  
異混而一之輻輳不勝矣論小學云說文一書爲六書發凡非字義盡於此欲取漢人經  
注作假借長編未果從兄之達字抱冲亦邃於學多藏宋元舊本書廣圻一一爲之訂正  
校刻列女傳以行爲孫觀家行校刻宋本說文古文苑唐律疏義爲黃孝廉丕烈校刻  
國語戰國策爲張太守敦仁校刻撫州本禮記單疏本儀禮爲胡中丞克家校刻宋本文  
選元本通鑑爲秦太史恩復校刻鹽鐵論揚子法言駱賓王集呂衡州集爲吳侍讀稟校  
刻晏子韓非子每一書成綜所校爲考異或爲校勘記又摘宋儒語錄爲遯翁苦口以教  
學者其所居號思適齋取北齊邢子才誤書思之更是一適之語自爲之記卒年七十

李兆

洛墓

孫瑞清字河之咸豐壬子舉人能世其學

蔡雲原名靖字立青後更今名仍其字嘉慶甲子優貢生最工制義歲科試及書院課屢冠

其曹門下多知名士子錫昌吳庠生早卒亦善攷據梁氏庭立紀聞采其說

馮志

陸嵩字希孫文

見吳縣

子廩貢生鎮江府學訓導道光壬寅京口之亂集江洲人成一旅隨同

克復鎮江城咸豐癸丑賊逼京口又春檄團集南鄉義民九十九村凡自郡城徙避之鄉者設法保護老穉婦女皆得晏然忘流離之苦後以洲中人五百投常州汪方伯本銓防守要隘向帥移營之役賊勢下趨得洲人扼其衝而安庚申以前蘇常一帶無震鄰之恐教士以品學爲先家政肅然生平著書尤富

志府

子懋修自有傳

張肇辰字子同代業賈至肇辰始與兄肇榮寓志讀書爲制藝操筆立就精深奧衍自成一  
家道光戊子舉於鄉大挑二等選安徽懷遠縣訓導以母老不赴歷署寶山縣鎮江府訓  
導改桃源縣訓導喜獎借後學於寶山識陸生豫於桃源識尹生耕雲後二人一爲循吏  
殉節一爲御史皆卓卓有表見道光三十年大水大吏檄調回蘇襄辦事竣保陞知縣任  
直隸隆平知縣甫三月卒年五十一肇榮諸生亦知名

家述

朱綬字仲環先世自崑山遷郡城父鑑習名法家言工於詩世所稱阿顛先生者也綬道光  
辛卯舉人以詩古文著聲大江南北論詩痛詆袁枚而稱蔣士銓黃景仁其詩大不及士

銓超不及景仁自謂得力於潔故晚年更字仲潔古文亦以潔爲體初多峭邃之作後乃從容大適卒年五十有二

馮志

蔣志凝字子于諸生工詩詩才繁富而能約用之其體嚴潔朱綬曹懋堅輩皆推服之性兀傲以貧故常爲人幕下客然不可其意卽謝去又不得於其婦恆獨居僧舍最後依懋堅於京師未幾卒懋堅爲刻其遺詩而歸其骨於鄉

吳嘉淦傳

陳炯原籍崇明自其祖始遷於蘇炯幼慧而體弱年二十六始補博士弟子員踰歲食餼道光壬辰舉於鄉炯少從江陰經沅學又從其從兄奐講習故通漢學旁肆力於詩兼及書

畫中年而歿

金有容傳

王兆辰字康民嘉慶丁丑進士官穎州府教授精時藝工書法請業者盛名譽日隆克承先志力修長元節孝祠與顧鳳藻震壽王斗華等纂續祠志同倡清節堂佐修學宮偕韓崧等請增忠孝鄉賢闕祀者祀祀復舊祠內同垂俎豆

唯亭志

俞濂字冠三廩貢生精訓詁之學於學庸注疏多所發明教授生徒循循善誘中年後品益粹爲後生表率初濂入泮時有白鶴翔於庭至嘉慶二十三年重謁泮宮復得白鶴來翔

之異余金熙朝新語稱爲人瑞洵不誣也卒年八十有五

周莊志

韓崇字履卿是升

見吳縣

幼子山東維口批驗所大使乞終養歸事母林以孝聞母歿遂不出

咸豐初粵軍將至曹侍御懋堅疏舉得旨協辦團練勸捐事宜郡城奏設協濟局崇亦與

其事以勞屢被甄敘加鹽運使銜賞花翎銜嗜金石耽吟咏工書入香光之室又逼肖何

吧瞻著有寶鐵齋詩集金石跋尾均刊行

家述

錢綺字子文號映江浦莊人父士銓諸生壽九十五綺於書無所不讀詩宗晚唐三十以後

按明季事實著南明書三十五卷四十以後潛心經學及天文曆算諸書成左傳札記七

卷朱蘭坡宮贊稱爲必傳之作鈍硯卮言一卷曰天文地理及一名一物之微皆能精思

其理彭文敬序謂能發古人未發之祕從游者數百人林文忠撫吳時延入署咨訪政治

極爲賞異常熟翁文端以國士目之咸豐初文端入相欲以經學薦致書力辭卒年五十

有六所著未刊者尙有四書管見及純硯廬詩文集長子樹恩字巽甫諸生工詩鐵筆篆

隸次朝棟字敏甫諸生精算學著天元啓蒙兩卷小詞逼近宋人早卒

府志參錢榮高家傳

門人曰尹錫瓚諸生亦精算學

續時人傳



盛樹基字良山少習舉子業既爲諸生卽棄去併力爲詩既而薄爲小技不足爲復棄去講  
求古聖賢躬行實踐之學年二十七而歿朋友中最相契者長洲江湜同邑顧世鎮樹基  
歿後湜收其詩未幾湜又歿吳縣葉廷瑄得其殘稿選入感逝集中世鎮初名世沅諸生  
早歿事父孝篤於倫紀詩似宋人極自然之致亂後盡散佚

馮志

李恆嵩字靄堂世居陽城湖之澱涇鎮少有大志不拘小節上海劉麗川作亂從薛煥軍首  
先登城賞以五品軍功旋粵軍踞金陵蘇常相繼失守遂投効吉巡撫營張文毅公芾一  
見奇之曰此非行伍中人落口必爲國士咸豐十年上海道吳煦聘美將華爾教練鎗隊  
名曰常勝軍卽命恆嵩爲之副官統領時已迭獲戰績授參將同治元年華爾陣亡易以  
白齊文不善控制幾釀譁變由是裁常勝軍爲三千人命恆嵩與英將戈登同領之自此  
所向披靡迭克名城如松江奉賢青浦嘉定慈谿常熟太倉崑山蘇州無錫江陰常州宜  
興溧陽等城功績甚偉李文忠公倚爲干城歷保至總兵特賞果勇巴圖魯名號記名提  
督一品封典亂平入都陛見欽賜荷包尙方珍物派充丹國換約事務員嗣授浙江衢嚴  
鎮總兵服官三載乞休歸田優游林不者八九年壽逾花甲光緒二年卒於私第

家述

唐際會字冠時國學生長身鶴立議論風生與朱春霞陳玠韓來潮以詩文相質難著有靈

巖贖稿工詩得趙吳興筆意

周莊志

吳詩庭字質夫廩貢生道光癸卯科考取優貢薦舉孝廉方正均未應朝考以著述自娛刊

有傳家寶訓一書行於世

采訪稿

汪亮鈞字和卿廩貢生授鎮江府學訓導時上下游皆爲敵踞鎮江以孤城扼敵衝敵兵攻撲無虛日亮鈞單車赴任奉檄治團防昕夕徒步衢巷間譏察奸宄間諜無所容城守益固江南肅清敘勞奏獎五品頂戴國子監典籍銜兵燹之餘絃誦輟業以校官月課諸生視若具文因別創冬榮春滿齋會課評鶯鶯當捐給花紅於是江南北能文之士爭先投卷以待品題先後得科第以去者踵接一時稱盛會焉乙巳重游泮宮庚戌卒於任年八

十四

家乘

朱駿聲字豐芑父德垣貢生稱孝子駿聲四歲解四聲年十三授說文解字一讀卽通曉戲爲孔方傳文似馬遷時目爲神童十五冠郡試補府學生錢詹事大昕主紫陽試院講席一見奇其才遂受業門下專力古學以著述爲事嘉慶戊寅舉鄉試選授黟縣訓導道光

未詔許海內文學之士獻所著書因繕寫說文通訓定聲四十卷上之文宗優詔褒嘉加

國子監博士銜旋升揚州府學教授引疾未之官僑居黟縣石村卒年七十一凡十經三

史諸子騷選並有撰述尤精算術七百八十三座之星能指而明之有歲星表天算瑣記

數度衍等書行述參時人傳三編子孔彰字仲我少穎異克紹家學以長庠生中光緒壬午舉人仿

李元度先正事略撰中興將帥傳略今刊本中興名臣事略即此書

程世勳字雪門侍御際盛子諸生好吟咏善丹青五七言近體尤詩中有畫不減摩詰著有

古香籀詩鈔孫希孟字松恩貢生以古學受知於張學使芾曾幕游江右還家楓橋市

浜亦工詩善隸法及見錄參采訪稿

袁學瀾字文綺元靜春居士易後世居尹山鄉袁村家素封獨溺苦於學從吳江殷壽彭游

補諸生以能詩著聲吳下構靜春別墅更字春巢兵燹後奉母遷居城中課子若孫所著

詩文皆自刊定其南宋宮詞百首姑蘇竹枝辭百首蘇臺攬勝百詠尤為時傳誦或以詩

史詩虎稱之乃有廬雜著許鏐異苔同岑詩合纂

管慶祺字心梅庠生嘗手校陸氏釋文長洲陳奂曰釋文宋本當於集韻求之今尙書釋文

經開寶中陳諤等刪改之本集韻則未經刪改者段玉裁尙書撰異可爲入道門也慶祺以爲然又爲免治病與時醫異服其藥得愈

家述

袁蘭升字青士世居尹山諸生嘗作高士贊十九首以自況吳江費宮詹督學河南延聘襄校所過名山大川皆有歌詠所著有銅井山房類稿

采訪稿

黃賡唐字韻士歲貢生候選訓導困躓棘闈者數十年同治庚午鄉試主司已擬置第一會三場以疾未終卷落解光緒元年舉孝廉方正未就試十九年重游泮宮家居教授及門多知名士登甲乙科者踵接王頌蔚曹允源皆其弟子年八十一卒

復齋外稿

顧文彬字蔚如號子山晚號艮菴道光辛丑進士改刑部主事升員外郎郎中出爲湖北漢陽府擢武昌鹽法道以父憂去職後補甯紹台道當在刑曹時律章訟比悉心甄究務得廉平嘗隨節按事瀋陽同官病累年滯獄獨任研鞫浹辰決盡故事使旌入境有司歸餼暨贈賄必極華腆文彬概屏不受旋以知府發往湖北奉總制官文恭委署軍諮時武漢初克簿領闡委往來風雪中恆至丙夜撫軍胡文忠尤器重之嘗目爲端人正士左文襄爲某鎮所誣文彬知文襄非常人力請於文恭獄得解庚辛之際粵軍據全吳幫辦團練

創議逆師皖中反復陳譬舟饗籌備始獲濟師用成合肥李文忠平吳之功事平文恭走書幣聘不就丁日昌撫吳具疏力荐遂觀察浙東未五稔引疾歸晚築怡園弄藏法書名畫著有過雲樓書畫錄及詩詞各若干卷子承字駿叔諸生翰林院待詔更有印譜錢譜及選訂過雲樓叢帖藏於家

采訪稿

韓文和字育萬道光甲午舉於鄉由內閣中書補用山東直隸州歷任煩劇愛民若子所至有循聲初任濱州大風雨夕河堤危岌以億萬生命迫於俄頃不及具文稟陳而鳩工固築省報以擅自工作例不開支公帑或勸中止公曰寧毀吾家毋使萬民失所也工竣賠款七千餘金繼任鄒縣拒捻保城閱五月不寐邑建碑誌德政鐫曰民不能忘後任安邱以歲旱請分別蠲緩紓民困陵回力爭被議去官當是時年姻故舊居顯秩處要津者不乏其人而公雖歷遭磨挫從無一字干謁其性之耿介如此光緒十五年歿著有寒碧齋

詩稿

采訪稿

王炳燮字樸臣先世歙籍爲元和諸生喜爲先性理及一切經世之學事母單極孝粵軍方盛遷居木瀆與金蘭沈淵輩結碧螺吟社自號胥山瘦人事平還郡領同治甲子鄉薦馮

中允議減賦炳燮與有力焉其上李撫軍狀論省城善後事宜上曾侯相書論外交換約事深識遠慮洞若著蔡辛未補知縣李公留辦賑濟及北河工程光緒丙子進士官邯鄲知縣有政聲卒著有毋自欺室文集閻然居詩鈔

行狀參  
本集

顧濟乾字子和恩貢生嘗游浙幕遭難歸作杭城紀事詩並集蕭選四言成哀江南文為朋

輩傳觀已復就某總戎幕書記舟營無定幾瀕於難後居鄉教授舉文會二百數十次為

遠近導師著述甚富又工楷行草各體行狀子有櫟字虹玉同治丁卯舉人

蔣肇熊字芾君諸生庚申之變避難崇明馮桂芬在滬寓書招之言於合肥李鴻章檄辦常

郡撫卹事甲子東南大定歸食廩餼舉優行發憤治浚長學精經術旁及金石文字秦漢

瓦當弄藏甚富嘗採訪孝悌貞節至三百人臚陳事實並得旌如例母善病又患目疾肇

熊侍湯藥惟謹以口舐母翳障旋退聞道家有捷訣斗能卻病肇熊以母故持之無間日

又嘗過郡校得斷碑洗心二字拓懸諸壁以自警云

節潘遵  
撰傳

劉宗城字野萃諸生工文辭嘗講學花步寒碧莊劉昌熾昌熙幼時師事之操守不苟為鄉

里式咸豐庚申卒

劉昌  
熙述

錢家謨字訐堂以世家子游幕燕趙咸豐末隨鄒中丞官粵西督練義勇數千往來柳鬱高廉間由軍功累得縣丞移浙江委辦軍需局終秀水丞乞歸有半舫吟草乃有廬雜著孫人龍字友夔拔貢安徽舒城知縣

費金綬字若卿先世吳江籍父秀元遷居周莊為都司洪楊之役以團勇保衛鄉閭金綬繼之年十八通曉兵機旦夕訓練待援蘇大軍同治二年李文忠遣淮揚水師總鎮陳東友駐周莊金綬隸部下先率所部攻敵南川新渚急水港養鴨湖等處毀庵村以下各敵壘浮橋隨攻克同里復吳在冬十月移營黃天蕩隨大軍攻葑婁門外敵營四日盡破平之遂復蘇州又隨提督程忠烈進兵克八斤平望黎里殲敵唐家浦收王江涇三年隨復嘉興移駐夾浦口分巡吳淞泖澱堵勦肅清奏保副將補常州營守備光緒九年法越事起辭官隨北洋大臣吳大澂至朝鮮未幾弟金組駐軍鎮海擊沈夷艇金綬復回浙助防得記名總兵迭署象山平陽嘉興協副將禽斬鹽梟王康南孔光明等皆積年諭拏之大憝也卒於官賜祭葬廕一孫六品諸補

曹元爵字松坡武生蘇撫標營把總庚申為里人辦團練屢卻土匪後敵軍至身先士卒揮

刀奮鬪受重傷而退至少里港復假舟拔難民數百人登彼岸而已殿其後事平遂不仕

采訪稿

丁士涵字泳之庚午舉人官工部員外郎幼受業陳奐以經學著名同治甲子兵燹後任采訪節孝事興修王仁孝祠辦理長元學兩旁先賢春秋祭祀十餘年積書數十萬卷閉門謝客年六十餘猶鐙下著述不少衰貴箴黃子壽方伯聘爲學古堂山長晉謁見拒其高尚如此著有管子釋文集韻從子有庚子卯舉人選授江都縣教諭

采訪稿

陸懋修字九芝元和廩生考授恩貢以儒醫濟世詩集外有世補齋醫論其補張仲景傳一篇援據詳明尤足訂范史之闕又撰內經難字音義一卷於聲音通段之故塙有會心如素問四氣調神大論腎氣獨沈據周禮壺涿氏鄭司農注謂獨濁古通平人氣象論前曲後居據漢書邳都傳注謂居與倨同刺腰痛篇至頭几几然據說文定几讀若殊痿論主閏宗筋據徐楚金繫傳閏之言攔謂潤當作煩攔解凡此諸條皆非精研古學者不能道妻程氏亦能詩工楷法子潤庠甲戌殿試第一人官至大學士

家述

管禮耕字申季別號操敦元和恩貢父慶祺諸生遂於經學禮耕少穎慧作文一字不苟下



馮宮允奇賞之肄業正誼書院助教說文段注攷證及在校邠廬襄纂府志多年治三禮並精算術與王頌蔚葉昌熾齊名端靜寡言笑好顏氏習齋學說平日常親至孝孺慕如嬰孩不肯輕離膝下以數奇南北闈屢試輒左丙戌汪柳門視學廣東招往襄校以病歸旋卒年四十後費念慈爲哀輯遺文刊之

述家

袁寶璜字渭漁舉人泰生子幼承庭訓受知於馮宮允纂修蘇州府志光緒壬辰進士刑部主事充日本出使大臣隨員甲午中日失和隨軺回國主蘇垣學古堂講席鑒於世界大勢謂變法當自書院始以~~夫~~爲四民之首也由是增治事一門厥後院生之應經濟特科者入選之多甲於他省由寶璜提倡之卒年五十一著有袁氏藝文金石錄二卷寄謁廬

詩文集各若干卷袁昶爲刊入漸西村舍叢書中

述家

柳商賢字質卿橫金人同治庚午舉人首議築太湖石塘分纂府志爲馮中允高弟晚官浙江寧海縣購湖州桑秧以興蠶業圍築花嶼塘沙灘田二千七百畝給貧民耕種創建清節堂育嬰堂並忠義孝悌及貞孝節烈祠獎勵文學立藏書樓於縵城書院解組後居木瀆遂初園著有橫金志蘧庵詩文鈔各若干卷未幾卒寧海士紳追念德政請祀名宦祠

家述參  
采訪稿

錢榮高字子欣綺從子諸生習漢儒學應浙江學使劉廷枚瞿鴻禛聘襄校試卷得士稱盛  
曾佐馮中允纂修蘇州府志居恆篤嗜著述星纂露鈔積稿厚數尺著有經解二十卷孟  
子義疏十卷經義雜錄十六卷湖北省志職官表二十卷座右銘訓學良規經畚堂詩賸  
等均藏於家 王頌  
蔚傳

顧紹丙字吉甫遼州直隸州人春芳子諸生候選訓導洪楊之役後舉董事辦善後事宜遣

送流民嘗以寶山新興沙田產十之三捐入女普濟堂貧賤賴之 家述弟紹申字尹甫弱冠

入元庠即研求經義輯先儒語為易書叢說又以康熙字典乃小學淵藪博采經史及諸

子百家附益於每字之下曰字典叢釋所為文根柢深厚有先正典型光緒二年舉於鄉

旋卒 俞樾  
傳

陶維坦字仲平周莊人父煦通百家言好吟詠 續輯貞豐志  
著租覈一書惟坦諸生久客同郡潘公霽任

所課其子又佐吳大澂會辦北洋幕府歷海徵習騎繫補廣東鹽大使河南鄭工合龍以

勞績著東事敗歸居半載忽忽不樂卒 杏廬  
文鈔

陳永奎字少山童年值洪楊之役同里費金綬練民團永奎從其弟金組戲爲擊刺備禦之事迨金綬以民團隸撫標水師帶新後營遂隨攻平望黎里等鎮及蘇州葑門敵壘吳江嘉興等城積功保舉守備銜並賞藍翎事平歸長江標借補金陵營左哨外委終

采訪稿

孫金彪字少襄世居盛澤幼善騎射年十二補元和縣學武生咸豐庚申之變蘇浙異軍蠶起金彪倡議辦團練簡里中丁壯千人教以兵法擒斬巨魁朱法大法二孝王胡昇汶潛師來襲金彪率團勇邀擊官塘大敗之盛澤保衛局義勇之名遂震遠近金彪部勒其衆嚴整有紀律同治二年巡撫李鴻章誓師上海規取蘇州金彪投軍前自效李飭編所部爲魁字副營屯同里李朝斌程學啓以大軍來會金彪從大軍十月定蘇州嗣克無錫解常熟圍攻常州府城累保游擊銜花翎都司江南旣平擒匪橫行河朔間豫撫李鶴年以張曜薦調金彪赴河南剿賊筭嵩武軍營務處兼統馬步親軍時擒匪任賴二股方由湖北竄唐裕襄葉進逼許州金彪截剿於八里橋南大敗之追至穎橋石固驛生擒悍酋林慶喜李如貴復與毅軍窮追破賊鄭州賊趨山東由戴廟渡河擾汶上曲阜濟南戒嚴督師大臣李鴻章定扼守運河并軍兜剿之策檄金彪駐戴廟防運河賊屢來犯擊卻之復

出奇兵繞前夾擊賊遂不復窺運河東捻平擢游擊遣母喪歸里時張曜爲河南布政使主軍事以捻酋張總愚勢復熾敦促出助戰遂馳抵東昌剿賊於平原德平玉林鎮累戰皆捷斬俘萬餘賊復撲運河金彪會大軍合擊盡殪之總愚投水死西捻平轉參將敘功再遷副將七年隨張曜統嵩武軍西征回寇十月軍過寧武衆畏寒思歸金彪溫語撫之皆奮甫抵河曲立壁壘而回寇東竄報至金彪夜拔營疾行襲賊於府谷邊外發火燒河灣賊倉皇潰遁獲糧械無算追至鄂爾都斯之準噶爾殺賊千餘盡毀其壘回大創不復入晉邊八年春回踞磴口烏拉特等處蔓及纏金金彪從張曜穿河套循包頭節節進剿連敗賊於纏金沙金託海間道趨定遠力戰解其圍賊精騎殲焉又進規寧夏時甘回方斂兵守而陝回則東西竄擾金彪督理轉饋且攻且防迭克王洪杜寨王瞳老巢進薄通昌通貴納家閘等寨縱火焚其壘擒悍酋四十餘拔漢民千餘寧夏以西三縣底定十年寧夏平論功以總兵提督記名簡放賜黃馬褂是秋隨諸軍規河湟攻黑山黨川回壘盡平之肅州既克督師大臣左宗棠檄張曜率金彪諸軍駐防金積堡撫卹遺黎督治耕鑿十一年宗棠議大舉出師關外命金彪駐安西經理屯田金彪躬率所部巡歷郊原畫疆

分井分給糧種及秋果大熟蓋金彪吳人習農事程功尤易也光緒元年大軍集哈密進征烏魯木齊賊出精銳繞後路斷運道各路戒嚴金彪移軍哈密西路築斥堠謹烽燧運道復通三年進兵南路金彪率前隊循天山南麓西行偵知賊精兵悉集魯克沁戒所部棄所蓄糧疾馳掩敵敵驚潰復魯克沁攻連木沁勝金台下之乘勝逼叱魯番賊力守滿漢二城會湘蜀軍一鼓克之由是南路阿克蘇等八城門戶洞開大兵所至摧陷新疆平駐軍庫車分守哈葉英和四城英吉沙爾纏回有糾衆結盟潛謀不軌者立誅之督師左宗棠劉錦棠上其前後功各一品頂戴優敘九年秋法越事起詔嵩武軍入衛京師會款議成督濬京濠張曜爲山東巡撫調戍煙台朝議方經營威旅大三口金彪督所部平治威海登府間山路三百里兩年戡工未役民間一夫張曜專疏論薦謂金彪能讀書饒幹略請破格錄用十三年補漢中總兵仍留防煙台二十年中日失和金彪誓死守東撫李秉衡退守萊州煙防益警威海潰勇五千人突至將譁亂輕騎撫諭盡收其械旅順難民千人踵至亦分給餼糧慰遣之兩役凡用白金三萬與東海關道劉含芳分任之不費公家一錢商民爲勒碑誌功德二十五年袁世凱撫山東特薦金彪充武衛右軍先鋒隊右

翼翼長移防德州六月拳匪擾畿南蔓延至德州界金彪悉捕斬之扼險要保教民堵潰  
勇既而英德法聯軍至亦服其威信相率引去調補湖南永州總兵未赴官疾作乞假回  
蘇州二十九年江督魏光燾蘇撫恩壽合詞奏留江蘇辦理營務統蘇浙飛划緝私水陸  
諸軍擒積匪高東山撫降幫匪沈小妹凌得勝優旨獎敘三十一年赴永州鎮任是冬卒  
於官宣統三年江督張人駿據蘇紳請臚敘金彪戰功事實請優卹立傳並於立功省分

建祠

采訪  
冊

顧厚焜字少逸世駿子光緒癸未進士刑部主事派赴日本美利堅等處游歷後補安徽廬  
州府江防同知著有日本新政考美國地理兵要巴西地理兵要及祕魯加拿大古巴等

處政治考

采訪  
稿

汪鳳池字思贊又號藥堦亮鈞長子世有陰德績學善屬文癸酉科拔貢乙亥恩科順天鄉  
試舉人同治甲戌官內閣中書協辦侍讀升起居注主事調刑部主事折獄平恕不附長  
官意旨光緒辛丑授山東道監察御史時直隸總督兼北洋大臣袁世凱權勢熾盛疏請  
裁抑摺留中向例留中摺歸軍機處存檔慈禧太后特命軍機大臣取此摺進呈留覽壬

寅四月京師盛傳兩宮將復出順天府尹密飭大興宛平兩縣拘留大車二千輛備用人  
心惶惑羣臣噤不敢言鳳池抗疏力爭奉旨以風聞不實申飭然其事遂寢癸卯京師苦  
旱疏請停正陽門不急之工以其款飭備荒政又外省籌辦紳捐動多勒派疏請諭飭各  
省慎重將事嚴禁苛派紳富捐由是停止其他指陳得失類皆關於政要爲他人所不敢  
言者政府深慕之戊申簡授湖南衡州府知府調補長沙府正躬率屬請託不行巡撫岑  
春萱倚重之遇事諮而後行己酉正月以疾卒於官年六十一

述家

江標字建霞光緒己丑進士改庶吉士授編修甲午授湖南學政以實學勵多士會與日本  
失和戰敗割地償金憤甚力求富強實學卽長沙舊有之校經堂改訂章程分史學輿地  
算學方言諸門以課士講求五洲形勢中外政教之異同以正心術敦品行學求實用爲  
諸生勉湘人士之啓閉塞而進開通日趨新學途徑皆標提撕誘掖之功任滿以四品京  
堂擢用戊戌政變爲言官劾罷未幾卒

述家

林昶雋字養庭廩生受業黃膺唐之門咸豐庚申被擄至廣德州中途乘擄者不備以計格  
殺之得脫兵燹後回鄉先至角直鎮訪尋父骨歸葬著再生記一卷辛巳得恩貢己亥舉

孝廉方正門弟子三百餘人善治病夙著醫名活人無算常言遇難後子然一身化爲一家十三口歷四十年辦吉不辦喪皆由病不誤藥之所得也年八十無疾而終著有硯耕堂文集七卷待刊

采訪稿

浙江